

**KOS oo NKATININ e BIBILIA te NKIPANGATA:
CBS
(Chronological Bible Storying)**

**EMBUKU oo LARIKOK
Inkatinin oo Nkisumaritin 42
natii Eleso e Nkatinin e Bibilia**

Kimaasai

**Compiled and Edited by:
Serge Bible Storying Team Kenya
Revised February 15, 2025**



INKISUMARITIN NAATII

(* Keitodol ena * toki inkatinin intomoni uni nindim atagelu aasishore
tenimiata erishata aiteng'en pooki artam oare.)

<i>EMPISHA</i>	<i>ENKATINI (arashu IMBAA)</i>	<i>ENKARTASI</i>
1	(*1) ENKITOBIRUNOTO O LMALAIKA	4
2	(*2) ENKITOBIRUNOTO E KEPER O ENKOP	6
3-A	(*3) ENKITOBIRUNOTO O LPAYIAN O NKITOK	9
3-B	(*4) ENKITOK O LASURAI	11
4	KAIN O ABEL	15
5	(*5) NOA O LOIRRAG LE NKARE	18
6	(*6) ENKIPOTOTO E ABRAHAM O ENKISILIGATA ENKAI	22
7	(*7) OLASAR LE ISAK	25
8	ISAKA, YAKOBO, O ESAU	27
9	(*8) ENKIDETIDET E YAKOBO	30
10	YAKOBO, LABAN, RAHELI, O LEA	32
11	ETUPUPUNGARE YAKOBO ENKAI	34
12	(*9) YOSEF	37
13	EINOTO E MUSA I ENKISIKATA ENYE	41
14	(*10) ENKIPOTOTO E MUSA O ESANAG NAYUPUYUP	44
15	ILMEITA	47
16	(*11) ENG'IROROTO	49
17	(*12) ELANG'ATA E NAIPOSHA NANYOKIE	51
18	(*13) OLDOINYO LE SINAI O NKITANAPAT TOMON	53
19	(*14) OLASHE LO SUYAI	55
20	(*15) OLNG'OBOR O ENKOLONG' ENKITISINYATA	57
21	ILAIKITALAK TOMON OARE, ORPURKEL, ENG'UDI O SUYAI NATAA OLASURAI, ENKOP E NKISILIGATA	59
22	ILAIGUANAK	62
23	(*16) ETAYIEUTUA ISIRAELO LAIGUANANI - OLAIGUANANI SAULO O ILMALEKI	64
24	(*17) OLKINKI DAUDI	68
25	ELIYA O LOIBONOK LE BAAL	70
26	(*18) ENAIBON NAIPARTA ELOOTUNOTO O LAITAJEUNONI	73
27	(*19) EINOTO E YESU	76
28	(*20) ENKIBATISA E YESU ENTETEMA SHETANI YESU	79 82
29	EIPOTO YESU ILOOITENG'ENI LENYENA	85
30	(*21) ENKISHIUNOTO O LTUNG'ANI OILENYE	88
31	(*22) ENKITOK O SAMARIA	90
32	EITOTIO ILTUNG'ANA INKALIFUNI IMIET	93
33	(*23) EISHIUNYE YESU ENKAYIONI NAATA OLOIRIRUA	95

	OIDURUK	
34	(*24) EITIOIWUOKI LAZARO	97
35-A	YESU o LBARNOTI KARSIS	99
35-B	NIKODEMO	101
36	KEITUKU ENKAING'ONG'KONI INKEJEK OO YESU	104
37	(*25) EMISA NABAYIE	107
38	(*26) GETSEMANE, EIBUNG'AKI YESU NEIGUENAREKI	109
39	(*27) ETASHOKI YESU	111
40	(*28) EMPIUNOTO E YESU	114
41	(*29) ELOTOTO EMAUS	116
42	(*30) ENKILEPATA E YESU	118
	ENAIKUNUNO INKIKILIKUANAT	

INKATININ OO NKISUMARITIN

1. ENKITOBIRATA OO LMALAIKA

Ore apa eton eitu eitobir Enkai iltung'ana, neitobiru Enkai ilmalaika kumok oleng'. Nemanya kulo malaika tenebo ninye te shumata. Neitobira apa ninche aa supati nemeata ing'ok. Ore ilmalaiki naa inkiyang'eta. Neitobirr ninche pee eserem, neisiai ninche ninye. Nesperem neaku ilaisiayak lenyena.

Ore olmalaika obo oitobira Enkai naa ng'en oleng naa eisidai sii alusoo too lkulikai. Neji enkarna enye Lusifa. Neishoo apa Enkai Lusifa erishata e tipat tiatua shumata. Ore pee elusoo erishata newuasa Lusifa oleng' naa keyieu neaku kitok anaa Enkai. Netii sii kulikai malaika ootegelutua aasuj Lusifa aagolong'aki Enkai.

Kake neyiolou Enkai indamunot e Lusifa o lelo kulikai malaika. Nelaikino atogolong'aki ninye. Amu keyiolo Enkai pooki toki neata sii engolon alang' Lusifa o lelo kulikae malaika, amu Enkai naitobirua ninche pooki. Ore tenkaraki engolong'u enye, nearaa Enkai ilmalaika oogolong'u aitung'aa shumata. Ore Enkai naa ole sipata ninye, nemenyoraa aaku tenebo aibung'are lelo oogilunore ninye. Nejo sii Enkai ore kenya enkolong' nabo naa keitame lelo malaika oogolong'u tenkaraki ing'ok enye.

Neiblekeny Enkai enkarna e Lusifa ajo Shetani. Ore ena arna naa "Olalejani." Ore Shetani o lasujak lenyena pooki neaku ilmang'ati le Nkai. Negilunore inkipankat e Nkai inkatitin pooki. Neaku, ore tena rishata, ore ilmalaika asujak le Shetani, naa ninche inkiyang'eta torrok. Nesuj Shetani negilunore esipata. Nemeyieu Shetani niking' Oreori le Nkai. Neaku ena enkiting'oto enkatini.

ISOMA: Nehemia 9:6; Yoab 38:4-7; Olkerempe Le Nkai 99:1-3, 103:19-21; Isaya 14:12-15, 45:12; Esekiel 28:12-15; Nahum 1:2-3; Luka 10:18; Yohana 8:44, 12:31; Ile Efeso 2:2, 6:11-12; Ilkolosai 1:15-16; 1 Timoteo 3:6; 1 Petero 5:8; 2 Petero 2:4; 1 Yohana 3:8; Yuda 6; Embolunoto 12:7-9, 20:10

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Tadamu erishata tiatua enkishui ino kitaleja likae tung'ani.

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
 - o Eitobirua Enkai ilmalaika - pooki pukunoto naata enkiyang'et
 - o Neisiai ilmalaika Enkai etii tiabori enkitoria enye.
 - o Keata Enkai engo'olon alang ilmalaika, naa Keidim Enkai aitamio ilmalaika torrok anaa enatarayie ninche aitung,ua shumata.
- **Amaa, kaji eiko ena atini teneutaki iyiook ajo keyiolo Enkai pooki toki? Netii pooki wueji?**
 - o Etayiolo Enkai aitobiru ilmalaika.
 - o Neyiolou Enkai ajo ainyoo egira adamu Lusifa o lasujak lenyena torrok.

o Neyiolouen aiko pee eibooyo enkipangata e Lusifa o lelo asujak lenyena.

- **Amaa, kaji eiko ena atini teneitodol iyiook inchere aisinyati Enkai? (kaasipani, Neishooyo inkitanapat, Neiba ing'ok, Neipotu keeya metaa elaakinoto o ng'ok.)**
 - o Ore pee eitobir Enkai ilmalaiki naa bayarot, sidain nemeata ing'ok.
 - o Ore Enkai naa ole sipata nemenyoraa aaku tenebo o lelo oogilunore ninye.
 - o Keishiakino Enkai atum enkisisa o seremata aing'uaa ilmalaika supati.
 - o Meatai hoo likae obo oidim aawa erishata Enkai. Amu ore Enkai nemengarie enkitoo arashu enkitoria enye aitoki nabo naishu.
 - o Ekenarikino Enkai, netum sii enkisisa o eseremata ieng'uaa lelo Malaika sidain.

KAINYO KINTENG'ENA ENA ATINI NAIPARTA SHETANI?

- Ore Shetani naa olalejani, olaimonk'oni. Neyieu nerikoki ilkulikai atua e ng'oki o engolong'u.
- Ewuasa Shetani neyieu netiu anaa Enkai. Neyieu nejing erishata Enkai.
- Keiba Shetani Enkai naa kenyok agilunore inkipankat Enkai.
- Kake meata Shetani engolon anaa Enkai. Meidim pii atimira arashu elej Enkai.

INKIKILIKUANAT NIKIASISHORE TE NKIBELEKENYATA E NKISHUI

- Kaji inko pee ibulu te nkiyang'et ino pee ining' ororei le Nkai oleng' tiatua enkishui ino?

2. ENKITERUNOTO E NKOP O KEPER Enkiterunoto 1:1-2:3

Ore apa te nkiterunoto e pooki toki, neitaa Enkai keper o enkop too inkolong’i ile. Ore apa enkop nemeeta shoto, nemetii toki, naa enaimin ake natii oriong’ o enguton oo nkariak. Ore Enkiyang’et e Nkai neloolo tioriong’ inkariak.

Nejo Enkai; “Inchoo metijing’a ewang’an.” Nejing’ ewang’an. Nedol Enkai ajo aisidai ewang’an. Nerishu Enkai ewang’an aitung’uaa enaimin. Neipot Enkai ewang’an ajo endama, neipot enaimin ajo enkewarie. Neaku eetae enteipa o entadekenya enkolong’ e dukuya.

Nejo Enkai: “Inchoo metaa ketii oloing’ang’e erishata oo nkariak, naa inchoo metirisha inkariak e shumata o nkariak e abori.” Neaku neijia. Neipot Enkai oloing’ang’e ajo Keper. Neaku teipa neaku tadekenya enkolong’ e are.

Nejo Enkai: “Inchoo inkariak natii abori e keper eiturrurrokino pooki nebo, naa inchoo enkop natoyio eibalayu.” Neaku neija. Neipot Enkai enkop natoiyio ajo Enkop, neipot inkariak naaiturrurro tenebo ajo inaaiposha. Nedol Enkai ajo aisidai.

Nejo Enkai: “Inchoo enkop metoiu inkaitubulu, o lkeek loo lng’anayio ooii ilantera too mpukunot enye te enkop.” Neaku neija. Nedol Enkai ajo ai sidai. Neaku teipa neaku tadekenya enkolong’ e uni.

Nejo Enkai, “Inchoo metaa keetae iwang’aritin to loing’ang’e le keper peyie erishu endama te nkewarie, neaku sii ilooitodolu ilmonek too nkatitin oo nkolong’i o larin.” Neaku neija. Neitayu Enkai iwang’aritin are sapuki – naa enkolong’pee eitore endama, o lapa pee eitore enkewarie. Neitayu sii ilakir. Nedol Enkai ajo aisidai. Neaku teipa neaku tadekenya enkolong’ e ong’uan.

Nejo Enkai, “Inchoo metijing’a nkariak ntokitin naaishu (anaa sinkirr), inchoo sii imotonyi meshomo to loing’ang’e le keper o meiputa enkop.” Nemayian Enkai ninche pee eponari too mpukunot enye. Nedol Enkai ajo aisidai. Neaku teipa neaku tadekenya enkolong’ e imiet.

Nejo Enkai, “Inchoo enkop meiputa ng’uesi pooki naaishu, inkishu o ng’uesi e ntim o ng’uesi naaiserpepiari te nkop.” Neaku neija. Nemayian Enkai ninche pee eponari too mpukunot enye. Nedol Enkai ajo aisidai.

Nejo Enkai; “Emaitobira oltung’ani te nkitanyaanyukoto ang’ onyaanyukie iyiook, nikincho ninche meitoria pooki toki naitobira. Neaku etaasa Enkai ina. Neitayu Enkai oltung’ani te nkitanyaanyukoto enye makewan, olee o enkitok. Nemayian Enkai ninche, nejoki “Entoisho, entoponari, emputa enkop. Entoria enkop pooki o pooki toki naishu. Neisho sii Enkai ninche inkaitubulu sidan meinosa aita endaa. Nedol Enkai ajo aisidai oleng’! Neaku teipa neaku tadekenya enkolong’ e ile.

Ore te nkolong’ e naapishana, eidipa Enkai aitobira pooki toki, neyeng’iyeng’a. Metaa etamayiana Enkai enkolong’ e naapishana neitisiny, amu teina olong’ apa eyeng’iyeng’e Enkai te siaai enye pooki nataasa e nkitobirare.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kaji eiko pee kepasha oltung’ani o ing’uesi? Amaa, kainyoo pee eisidai oltung’ani oleng’?

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI?

- **Kaji kinko tenikidol tena atini inchere keata Enkai engolon?(neata,enkatoria te pooki toki?)**
 - Meata ninye Enkai enkiterunoto, eitu eitobiruni ninye. ketii apake ninye.
 - Enkai naitobirua pooki toki(ewang'an, oloing'ang'e, enkop, inaaiposha, enkolong ,olapa, ilakirr, inkaitubulu,ilkeek,imotonyi, isinkirr,inguesi, oltungani.
 - Eitobira pooki toki meata entoki nagira aasishore. Meata aitoki pee eiteru aitobiru intokitin pooki.
 - Ororei ake eiroro Enkai neitobiru pooki toki.Eng'olon oo rorei lenya eitobirunye nena pooki.
 - Neitobiru Adam te nterit, neitobiru enkitok to larasi le Adam.
 - Enkai naitobirua pooki toki neaku keata naa enkatoria te shumata pooki toki.
 - Neitobirr Enkai pooki toki pee eramat enkae, enkae.

- **Kaji eiko ena atini teneutaki iyiook inchere keyiolo Enkai pooki toki? Netii pooki wueji?**
 - Etayiolo apa Enkai enaiko teneitobiru pooki toki.
 - Etayiolo Enkai aitaiki oltung'ani ewueji sidai tialo iyieunot pooki e tung'ani.
 - Keyiolo apa Enkai enaiko teneitobiru entoki eidipa enkae oo too rishat enye naishiaakino.

- **Kaji eiko ena atini teneutaki iyiook inchere Aisinyati Enkai? (Keitoriori, oloosipat, Neishoru iutarot, neiba ing'ok, neitashyie keeya metaa ninye olekoisiayio loo ng'ok.)**
 - Ore pooki toki naitobirua ninye Enkai naa bayaroti. Nejo openy " Aisidai!" neitobiru ewueji sidai pee ebikie oltung'ani.
 - Neitobiru pooki toki too mbarakinot.
 - Neitobira Adam anaa ninye makewan, meata ng'ok.
 - Neitobirr pooki toki metaa keata imbarakinot, apa nemeata.

- **Kaji eiko ena atini teneutaki iyiook inchere keata Enkai empiris? (Kenyorriso, neata olong'urr tialo ilaing'okok, neirorie sii iltung'ana?**
 - Eitobiraka Adam encholiek arashu enkaretoni sidai. Neitayu oleo o ng'oruoi.
 - Neitobiraki Enkai oltung'ani enkop sidai pee emany neshipakino.
 - Neisho Enkai oltung'ani pooki aitubului meitaa endaa. Neisho ninche impukunot naapaashipaasha.
 - Neisho ninche enkop sidai, o intokitin tuani napaashipaasha.
 - Neitayu Enkai oltung'ani aitanyaanyukie kewan, Neisho enkidimata pee eidim ataa oloata

KAINYIOO KINTENG'ENA ENA ATINI NAIPARTA OLTUNG'ANI?

- **Kaji eiko ena atini teneutaki iyiook inchere keata oltung'ani tipat te Nkai?**
 - Eitobirua oltung'ani te siadi. Nejo openy inchere aisidai oleng, oleng ena rubata nikintobira, mme duoo ake sidai kake oleng.
 - Neisho oltu'ngani enkop sidai namany.
 - Neisho ninye endaa nanya. Neisho ninye terisioroto oo nkolati pooki naata.
 - Neisho ninye enkatoria te shumata kulie kitobirat enyena pooki.
 - Neisho oltung'ani nyaanyukie e Aisho enye, inchere eidim atayiolo ninye Enkai,eidim atonyorra Enkai,eidim atoning'o neas enayieu Enkai, neata anyit sii.

INKIKILIKUANAT NIKIASISHORE TE NKIBELEKENYATA E NKISHUI:

(Tegelu nabo arashu kuna kilikuanat pokira tujurru oleng.)

- **Kaji kinko tenikidol taata inchere eton ake eata Enkai engolon?**
- **Amaa, iwa aikata iyie erishata aingor, anyikaki asipu nena naitobirua ninnye- esidano naata, iruburubat naata, elalai naata pooki? Tenias neijia ainyo idamu enaikununo Enkai?**
- **Amaa, kainyoo kincho nena toning'o tiatua kewan, tenidamu Enkai nidamu kewan? (Isoma Olkerempe le Nkai 19).**
 - Eton taata eidim ataasa pooki toki arashu aitoki ake ninnye teneyieu?
 - Kaing'ai likintobirua ninnye iyie? Keata Enkai enkitoria te iyie? Keata esipata pee kiliki iyie enias arashu kiutaa?
 - Atiaji indim anoto eninko pee iyiolou Enkai? (te ninnye ake-to rorei lenye)
- **Amaa teneton eyiolo Enkai pooki toki, kaji eas ina te nkishui ino?**
 - Keatai ewueji niindim ashomo pee isudori iyie te Enkai?
 - Keyiolo Enkai pooki nias? Indamunot inono pooki? Irorei linono pooki? Pooki bae sidai arashu torrongo?
 - Amaa naa tenimindim aisudoriyie Enkai, Kainyioo naa eishiaakino nias?
- **Kainyioo naa taata enkitadedioto nikindim aatodol te nkop tialo sinyatisho e Nkai? Arashu inchere eton aa Enkai oo nkiririkinot? Naa amaa tenaa aisinyati Enkai te sipata, kainyioo kincho ina toning'o iyie? Naa kainyioo naa naishiaakino nias?**
- **Aitiakua oitoi eton ake kidol olong'urr arashu empiris e Nkai tialo iltung'ana te kuna olong'i?**
- **Kakua mayianat itang'amayie iyie det te ninnye? Kainyioo idamu iyie tialo Enkai nikitaasaka nena? Naa kaji iyie netiu enkishui ino e anaake?**

3-A. ENKITOBIRATA o LPAYIAN o NKITOK Enkiterunoto 1:1-2:3

Ore apa tenkiterunoto pee eitobira Enkai keper o enkop, eitobirua Enkai olpayian o enkitok te nkolong' e ile. Kayieu naliki intai kaji eiko pee etaasa Enkai neijia.

Ore te dukuya, etuuno Enkai olchamba sidai. Neitubulu te nkop ilkeek pooki oitiship inkonyek naa sidain sii te ndaa. Ore te mpolos e nkurma, etuuno ilkeek oare oata tipat oleng', naa Olchani le Nkishui o Olchani le Ng'eno oo supati o ntorrok. Naa eitobira oltung'ani te nterit enkop. Nekutaki inkumeishin enyena entooma e nkishui, neaku oltunga'ni oloota enkishui. Ore enkarna enye naa keji Adam.

Kepik ilo tung'ani oitobira atua olchamba peyie etur neramat sii. Neitanap Olaitoriani Enkai oltung'ani ajoki, "Ore pooki shani otii atua enkurma indim ainosa, kake ore olchani le ng'eno oo supati o ntorrok minya ake, amu ore kenya enkolong' ninya, meeta inchere pee miye."

Neaku ore pee eing'or Olaitoriani Enkai Adam nejo, "Meishiaakino neton olee aa ninye ake, ekaitaiki enkaretoni naishaakino ninye." Neaku keyau Olaitoriani Enkai ng'uesi o inkishu o motonyi pooki enetii Adam, pee edung'oki inkarn enyena. Ore pee edol Adamu ing'uesi pooki etodua ajo metii enkaretoni naishaakino ninye.

Metaa etipika Olaitoriani Enkai injo naairosi ilo tung'ani meirurayu. Ore eirura, neitayu olarasi obo lenye nenuk ine wueji too nkiri. Ore ilo arasi oitayio Olaitoriani Enkai te ilo tung'ani neitaa enkitok, nerikoki ninye ilo tung'ani. Ore pee edol Adamu enkitok enye eing'asia, nejo, "Esipa ele taata oloito loo loik laainei, naa eoroti osesen lai. Ekeipoti ninye aajo enkitok amu eitayioki ninye tiatua olee."

Metaa eorore olee menye o ng'otonye, neibung'are enkitok enye neaku pokira are osesen obo. Ore apa ilo tung'ani o enkitok enye meeta apa entoki naishopito nemedol enkurruna.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamua erishata tiatua enkishui ino pee kitaleja likai tung'ani iyie? Kainyioo ining tialo ina?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneutaki iyiook inchere keata Enkai engolon pooki?** (keata enkitoria pooki, netii shumata pooki, neata enkitoo pooki.)
 - o Neitobiru Enkai oltung'ani te nterit e nkop, neitayu enkitok to larasi lo lee.
 - o Neisho Enkai oltung'ani entooma akutaki atua ninye.
 - o Keata ninye enkitoria teshumata oltung'ani amu ninye oitobirua ninye.
 - o Neisho Enkai ing'uesi meshomo tedukuya ninye Adam pee eitodol ninye inchere keata eyieunoto tialo enkaretoni naishiakino ninye.

- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Eitayiolo apa Enkai enaiko teneitobiru olee o enkitok.
 - Etayiolo inchere keliyio apa olee.
 - Etayiolo aitobiraki entoki naitobirr naishiakinore neaku encholiek o lee.
 - Etayiolo inkitanapat naidim ataret olee pee eilepu aponari.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekosiayio loo ng'ok)**
 - Ore pooki naitobirua Enkai naa aisidai oleng.
 - Neitobirru Enkai Adam aitanyaanyukie kewan, meata eng'oki.
 - Neisho Enkai oltung'ani enkitanapata naipirta olchani le ng'eno (oyiolounyie isupati o ntorrok, neisiligie ninye enkitamioto tenegolong'u. Enkai ake nagelu ajo kainyioo esidai tialo naa kainyioo entorrono.
 - Ore enkitamioto arashu olekosiayio le ng'olong'u naa keeya. Meboitare Enkai eng'oki. Meboitare ilaing'ok tenebo Enkai.
- **Kaji eiko ena atini teneiteng'en iyiook inchere keata Enkai empiris?(kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - Neishoru Enkai ewalet tialo eliyio e Adam. Neitobiru ilo laa ninye encholiek sidai te Adam.
 - Neisho Adam o itawa inkaitubulu pooki meitaa endaa meteleku nabo ake.
 - Neitanap Adam inchere ketii olchani oinyial ninche.
 - Neisho ninche enkang, ewueji sidai oleng, nebikie.
 - Neisho oltung'ani esiai sidai oleng' naas, pee eitore neramat enkop.
 - Neirorie sii apa oltung'ani.

KAINYIOO KINTENG'ENA ENA ATINI NAIPARTA OLTUNG'ANI? (tiatua inkatinin pokira are o nkitobirata)

- Neliki iyiook Enkiterunoto ematua edukuya inchere ore Enkai:
 - Eitobirua oltung'ani te nkitantaanyukoto enye keata oltung'ani tipat te dukuya e Nkai.
 - Inchere keata oltung'ani enkiyaget (neata sii osesen.) Keata enkidumata pee eyiolou pee enyorrisho, neyanyit sii Enkai.
 - Neaku ninye oltung'ani omayiana neata encholiek, neata enkitoria pooki te shumata inkitobirunot pooki, neata sii endaa.
- Keata Enkai enkitoria tialo oltung'ani.
- Neirorie Enkai oltung'ani. Ore shoruetisho naa keata tipat te Nkai.
- Neisho Enkai oltung'ani esiai e tipat naas. (Neiput enkop neitore inkitobirat pooki.)
- Ore olee neton tiatua shoruetisho tenebo enkitok enye. Keata enkiyama tipat te Nkai.
- Ore olee o enkitok naa sidain pee eitobiruni ninche, meata eng'oki. Neineishopo kake medol enkurruna.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aiteng'enayu.)

- **Tia oitoi kidol engolon e Nkai o enyorrata enye taata tialo ina oitoi nikintobirunye iyie arashu ina ninyorr?** Kainyioo ining tialo ninye o tialo kewan ino? Tia oitoi indim atang'amu ina golon enye te nkoitoi naashari alang oashi ake ening'amu?
 - Kaji eiko engolon enye pee kiret tiatua enkishui ino?
- Eitu eibeakenya Enkai, neton ake aa sinyati neiba eng'oki, NAA keyiolo sii eng'oki ino. Kainyioo ining tialo ena? Keidim aibeakenya enkishui ino?
 - Aikinchoo Enkai kulie kitanapat pee isuj kake italaikine atasuja? Amaa tenaa kore olekosiayio loo ng'ok naa keeya, kainyioo osiligi lino?
- Aing'ae oitobirua enkiyama? Tia oitoi igira iyie ayanyit Enkai te nkiyama ino? Tia oitoi migira ayanyit Enkai te nkiyama ino?
 - Amaa tenaa keshetuno enkiyama ino te shumata olkitamanyunoto lo rorei le Nkai, kainyioo naitodolu ajo kepaashare ninye ae kiyama tiatua olkuak lang?
 - Ore apa pee engamu Adam enkitok, netishipe oleng. Lolewa, kainyioo idamunye iyie enkitok ino? Kaji inko tenintodol ninche inchere igira Adamu aisho enashe ninyorr sii.
 - Nakituak, kaji inko tenincho enashe, niyanyit olee lina anaa olarikoni naa olaramatani lino?

3-B. ENKITOK o LASURAI Enkiterunoto 2-3

Ore apa olasurai naa aing'en oleng' alang ing'uesi pooki naaitobira Olaitoriani Enkai. Ore enkolong' nabo, etii enkitok atua enkurma e Eden. Nelotu olasurai enetii ninye. Nejoki olasurai, "Amaa, eji ketejo doi Enkai, "Eminya ilng'anayio lo lkeek pooki otii ena kurma?" Nejoki enkitok olasurai, "Mme neijia! Aikiindim iyiook aainosa ilg'anayio pooki loo lkeek le nkurma, kake etejo Enkai, "Eminya ilo ng'anayioi leilo shani otii empolos enkurma, olchani le ng'eno o supati o intorrok, nimiseyieyie hoo ninye arashu iyeye." Kake etiaka olasurai enkitok, "Miyeye ntae; amu eyiolo Enkai ajo ore tininosinoso ninye nebolo inkonyek inyi, nitiuu anaa Enkai, niyiolouu isupati o ntorrok."

Ore peyie eing'or enkitok ilo shani nedol ajo sidai te ndaa, naa olchani sii oitiship inkonyek, naa olchani sii oiteng'en oltung'ani pee eng'enu, neitayu olnng'anayioi neinos; neisho sii olupayian lenye embata, neinos sii ninye. Ore teinakata inkonyek e pokira nebolo, neyiolou ina kata aajo meishopo. Nerip mbenek aita nkilani aaisudoo iseseni.

Ore inakata nening' ninche oltoilo lo Laitoriani Enkai elo te nkurma. Ore olupayian o enkitok enye neisudori tiatua ilkeek le nkurma peyie medol Enkai ninche. Kake eipoto Olaitoriani Enkai ilo tung'ani nejoki ninye: "Kaji itii iyie?" Neng'amaa ajoki, "Atoning'o oltoilo lino te nkurma, naureishoyu amu atoduaa ajo maishopo naipirri aisudori."

Nejoki Enkai. "Amaa, aing'ae likitiaaka minchopo? Inosa olnng'anayioi lo lchani laitanapa apa intae ajoki eminya?" Nejo ilo tung'ani, "Ore ina kitok apa nikinchoo metaa tenebo nanu, ninye naaishoo olnng'anayioi lo lchani mainosa." Ina pee ejoki Olaitoriani Enkai enkitok, "Kaa bae ena nitaasa?" Nejo enkitok, "Olasurai laateleja nanya."

Nejoki Olaitoriani Enkai olasurai, "Ore amu itaasa ena, kitediaaki iyie aaitulus too nkishu pooki o ng'uesi pooki entim, keaku iserpepiari te nkop, naa enterit ninye endaa ino, too nkolong'i pooki e nkishui ino. Ekapik olomang'ati erishata ino o enkitok. Neijia sii etiu erishata e ishoi ino o eishoi enye. Ekepurd ninye elukunya ino. Naa ore iyie niony entutunyo enye."

Nejoki ninye enkitok, "Ore amu itaasa ena, kitediaaki iyie. Kaaponiki nanu emion te ishoi ino, te mion sapuk iuu inkera. Ore iyieunot inono pooki keaku ino olupayian lino, neaku sii ninye likintore iyie."

Nejoki ninye Adam, "Ore amu itoning'o oltoilo le nkitok ino naa eitu kining', ninosa ilo ng'anayioi lo lchani laitanapa ajoki 'Minya,' etediaki enkop tenkaraki iyie, ekeaku enenkinyinyiret ake inya te nkishui ino pooki. Nebulu ilkiku o nkaitubulu torrok te nkurma, ometaba anaa nirrinyokino enterit, amu teine apa kintobiruaki. Ira enterit naa enterit irrinyokino."

Neisho ilo tung'ani enkitok enye enkarna ng'ujuk ajo Hawa amu ninye ng'otonye oo iltung'ana pooki ooishu. Neitobiraki Olaitoriani Enkai Adam o enkitok enye inkilani oo ndapan, neishopoki ninche.

Nejo Olaitoriani Enkai, "Ng'ura, tenaing'uaa kulo tung'ana tiatua olchamba, keidim ninche aaitorioki enkaina enye olchani le nkishui aainosa, neishu ninche

intarasi." Metaa eitayio Olaitoriani Enkai ninche te nkurma e Eden. Nearaa ninche pii, nepik Enkai olmalaika lo lalem oyupuyup pee errip enkoitoi olchani le nkishui.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Tadamu sii iyie erishata nitetema aisudoo entoki tialo ilo likindim aitamio? Kainyioo ining tialo ina?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneutaki iyiook inchere keata Enkai engolon pooki?** (keata enkitoria pooki, netii shumata pooki, neata enkitoo pooki.)
 - Keata engolon o nkitoria pee earaa Adam o Hawa tolchampa.
 - Keata engolon pee eitame eng'oki, eimunyie ildeketa o eararoto enye meshomoita boo.
 - Keata enkitoria pee eirriu olmalaika meiboi oltung'ani peyie menya ake ilng'anayio leilo shani le mpuaan.
 - Keata enkitoria pee eishoru inkitanapat naibung, neas oltung'ani tearakinoto.
 - Neata engolon te shumata sheitani arashu (olasurai) pee edek ninye.
- **Kaji eiko ena atini teneutaki iyiook inchere keyiolo Enkai pooki toki** (netii sii pooki wueji)?
 - Etayio Enkai ajo einosa ninche ilo ng'anayioi apa lemeishoro.
 - Eitu eidimayu pee eisudoriyie ninche Enkai.
 - Keyiolo apa Enkai enaasai teneinosa ninche ilo ng'anayioi leilo shani le mpuaan.
 - Neyiolou inchere inkilani oo ndapan sidan te ninche tialo enkisudoroto o seseni lenye.NAA nena kilani sii nang'amaroi te ninye.
- **Kaji eiko ena atini teneutaki iyiook inchere aisinyati Enkai?** (keitoriori, kaasipani, ninye oishoru inkitanapat, neiba ng'ok, neipiru keeya ajo olekoisiayio loo ng'ok.)
 - Enkai naitobiru inkitanapat. Keatai supati neatai ntorrok.
 - Keitame Enkai lelo oogolong'u. Naa ore enkitamioto oo ng'ok naa keeya.
 - Kainyioo enkipirta e Nkai pee etejo " keeya" eiting'oki engolong'u
 - Eoro e Nkai tialo mbaa Enkiyang'et.
 - Eoro o seseni tialo Enkai tenebau keeya o sesen.(Naa iye nirrinyokino enterit.)
 - Enkitamioto oo ntarasi tiatua olbalbal le nkima.
 - O tialo ildeketa lo lee o le nkitok. (Neiteru inyamalaritin tialo shoruetisho olee o nkitok, anaa emion eini inkera, esiai o nkinyinyiret o pooki nyamali nagira ajing'u enkop)
 - Netarayioki apa ninche aipang'ie tolchampa.Negila enchula enye tialo Enkai.
 - Neitu apa enyorraa Enkai pee ebik olaing'okoni tenebo ninye.
 - Ore apa inkilani naitobirakitia ate pee eisudoriyie emasipaisho enye netaa apa inemeng'amaroyu te Nkai. Meatai oltung'ani obo oidim aita kewan olang'amaroyu te Enkai.
 - Ore apake inkilani nang'amaroyu te Nkai naa nena ake naitobirua ninye. Nena ake kilani naishoruaki eimu keeya eng'ues peyie eaku olkipoket tialo ing'ok e tung'ani. Eibukoyioki apa osarge pee eitobiruni kuna kilani.
- **Kaji eiko ena atini teneiteng'en iyiook inchere keata Enkai empiris?**(kenyorrisho, keata olng'urr tialo ilaing'okok, nenana oshoke, neton ake eirorie oltung'ani)
 - Ore tenkaraki olng'urr le Nkai neisho ninche inkilani nang'amaroyu te ninye, hoo nemenarikino apa.

- Ore tenkaraki oldeket tialo olasurai nikidol enkisudoroto e dukuya tialo osiligi lolaitajeunoni oini kenya ake enkitok, olaitajeunoni laa ninye kenya olotu amirr sheitani, olalejani, ilo oyau keeya, nemirr ninye nabo kata o te pooki rishata. Neshuk pooki deket otii tialo oltung'ani.
- Neisho ninche Enkai erishata meirridutu. Keyiolo apa Enkai enetii ninche te dukuya kake neisho ninche erishata meirridu nenyorraa sii ajo ilaasa loo ng'ok.)
- **Kaji eiko ena atini teneutaki iyiook inchere keisiligayu Enkai?**(meibelekenya, neibung inkitanapat enyena, neas pooki naajo)
 - Etejo apa ninye inchere ore enkinosata eilo ng'anayioi naa keeya eiting'oki, neaku ake ina. Ore nabo kata ake neorore Enkai tenkoitoo enkiyang'et.
 - Eishorua apa Enkai enkisiligata Olaitajeunoni inchere kelotu, eishoi enkitok napurd elukunya e sheitani, neishu ildeketa apa pooki oetuo tialo oltung'ani pee eas eng'oki.

KAINYIOO KINTENG'ENA ENA ATINI NAIPIRTA OLTUNG'ANI?

- **Kaji eiko ena atini teneutaki iyiook inchere keata olung'ani tipat te Nkai?**
 - Enoto Enkai olng'urr tialo indapan oo ng'uesi, o tialo erishata naigila aishoru tialo oltung'ani pee eirridu, o tialo enkisiligata tialo Olaitajeunoni olotu.
- **Kaji eiko ena atini teneutaki iyiook inchere olaing'okoni oltung'ani nenarikino enkitamioto e Nkai tenkaraki ing'ok enyena?**
 - Enoto oltung'ani entemata pee eyieu netiu anaa Enkai. Etawuase neaku ole makewan.
 - Neanyare oltung'ani enkitoo e Nkai.
 - Netum oltung'ani enkurrana nelo aisudori.
 - Neiteru aiteenikino meata olemeitolonyaki olikae tialo entorroni enye.
 - Neiteru sii ajo kintajeu ate eimu pee enyok aisho ate nena apa naata too nkolati enye alang teneirishakino Enkai anaa apa te dukuya.
 - Neyawua oltung'ani keeya atua enkop tialo eng'oki enye.(o keeya o ng'uesi sii.)
 - Enkitadedioto inchere ore keeya(arashu eoro te Nkai) netijing'ua enkop, neiteru pooki toki ainyialari: Enkurrana, aisudori, enkiteenikino, nenyok ajo kintasheiki ate too nkolati enye, nenyok aram inyamalaritin enye(anaa eripata oo mbenek) amu Enkai apa eing'orita te dukuya.
- **Kaji eiko ena atini teneutaki iyiook inchere keyieu oltung'ani Enkai amu meidim katukul aitajeu kewan?**
 - Etanya Enkai eng'amaa inkilani naitobirakita ate, neisho ninche Enkai enkoitoo. Eishopoko ninye Enkai inkilani ninche.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Elotu ake enjeunoto eimu enkoitoo e Nkai. Ore enyuata enye pee enyok aisudoo ing'ok enye netabatate apa. Neisho ninche Enkai inkilani sidan. Nelioyu pee eitadoyio oltung'ani kewan, neng'amaa eretoto e Nkai.
- Eretoto naishorua Enkai eimu olasar losarge, eimu enkoitoo naye entoki naje.
 - Neitaa Enkai iloong'amaroyu to rrekie ake le nkibukoroto o sarge. Ilo sarge le nena ng'uesi nataraki metuata otaretuo ninche metaa iloong'amaroyu.
 - Neutu ina ilo Aitjeunoni olotu meibukori osarge tenkaraki oltung'ani.
- Eyieu ake neisilig oltung'ani inchere ore inkisiligat e Nkai tialo ilo Aitajeunoni naa kesipa.

KAINYIOO KINTENG'ENA ENA ATINI NAIPIRTA SHETANI?

Keiba Enkai, olalejani, neiba oltung'ani, neyieu neinyialisho, neinyial kewan, nelimu mbaa nemesipa, nepik atua indamunot e tung'ani ilng'ashi, netem oltung'ani meirishakinoi kewan ake, neyau irresheta, neipot Enkai ajo olalejani, neisho ina nalioo aa sidai eaku torriono, neibelekeny esipata.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aitung'enayu.)

- Keata apa Enkai enkitoo tialo Adam o Hawa nalikinyie ninche ina sipa o ina nemesipa. Neata sii enkitoo pee eitameyie ninche tenkaraki engolong'u. Amu kira eishoi e Adam o Hawa, amaa keata sii Enkai enkitoria tialo iyiook pooki? Kaa eas ena kitoo tialo enkishui ino?
- Kore duoo ninye kidol ajo keyiolo Enkai pooki toki, eton ake kinyok AISUDOO ingok ang te ninye. Inteeniki oshi iyie ilkulikae tialo nkitarruorot inono? Kaji kinko ena atini tenikiret tupuku tiatua nkisudorot nitii?
- Amaa kaji iyie kitoinyieki? Atua arashu auluo enkurma e Eden? Kakua iloo nkakuyiaa linono? Ekitoiwuoki iyie tiatua olmarei le Nkai o tiatua enchula enye anaa teboo ina?
- Amaa tenemeata inchere pee eitu eitame Enkai ing'ok ang te nkoitoi naorie iyiook kewan, kainyioo ining iyie tenidamu iorore ninye ntarasi o ntarasi?
- Keton ake taata etem iltung'ana inkoitoi naapashipaasha peyie eaku iloong'amaroyu te Nkai o toolkulikae tung'ana? Tiakua oitoi? (kakua pukunot oo " mbenek" easishore iltung'ana aitoipie inkitarruorrot enye?) Keng'amu e Nkai iltung'ana tenenyok aitiship ninye too nkoitoi enye maate? Kakua oitoi inono makewan itonyuaa iyie aitishipie Enkai alang tenisuj inkoitoi enyena?
- Kakua oitoi taata oshi easishore shetani alej arashu ayesekie iltung'ana? Oo tolkuak arashu te manyisho inyi? Kaji kinkuna tenikilej iyie makewan kulie rishat? Kaa lejare naipirta Enkai arashu enkorrok ino makewan eya nikitemi iruko inchere kesipa? Iwa aikata iyie erishata Enkai te nkishui ino?
 - o Kelioo olwuasa te nkishui ino? Tia oitoi? Kaji inko pee irridu tialo nena ng'ok?
- Tia akua oitoi kidol oldeket le Nkai tia olee o nkitok taata? Keton eisho nkituaak te mion taata? Keton enya iltung'ana neok tenkinyinyiret taata? Ketii enkop inyamalaritin taata oshi? Naa kakua?
- Kaji eiko Enkai teneitodolu empiris enye too ltung'ana taata oshi? Tia akua oitoi? Kakua mayianat naing'uaa Enkai idolita iyie tenkishui ino?
- Aitia, oitoi eibung'a Enkai ina kisiligata natejo apa keloju Olaitajeunoni omirr shetani nemeigil aitashe? Eton ake eisho Enkai iltung'ana erishata pee eirridu. Irridua iyie ing'ok inono ninteru aisilig Olaitoriani? Kainyioo nikigira aibooyo iyie pee mirridu nisilig Yesu?

4. KAIN O ABEL

Enkiterunoto 4

Ore ake pee eidip Enkai aipang'ie Adam o Hawa te nkurma, nenutayu Hawa neiu enkayioni. Ore egira Hawa aisho nejo, "Te nkidimata Olaitoriani aidima atoiu olee." Neipot enkayioni aajo Kain. Ore pee elusoo erishata, neitoki Hawa aiu enkayioni neipot enkarna ajo Abel. Nebulu Kain neaku olaturoni le nkurma. Nebulu sii ninye Abel neaku olchekut lo inkerra.

Ore nabo olong' neyaki pokira Enkai olasar. Neyau Kain olasar le nkurma enye, ilng'anayio o kulie pukunot oo ndaiki enkurma. Neyau Abel irbalelo le dukuya oopir loo nkerra enyena, neitayu olasar neibukoo osarge. Nenyoraa Enkai olasar le Abel kake neany olasar le Kain.

Negoro Kain oleng'. Nejoki Enkai Kain, "Kainyoo pee itagore? Ore pee ias embae sidai, naa kaanyoraa." "Kake tenaa ias embae torrongo, kigira ing'ok aarresh te kutuk aji." Naa iyie eyieu nikimbung' kake eishiakino nimir ninye."

Ore pee elusoo erishata naje, nejoki Kain olalasho lenye Abel, "Maape enkurma." Ore epoito tiatua enkurma, near Kain Abel nelo aing'uaa.

Neaku, nejoki Enkai Kain, "Amaa, koree olalasho lino?"

Nejoki Kain ninye, "Mayiolo nanu. Amaa, kara olaing'orani lo lalasho lai?"

Nejoki Enkai, "Aaishiraki osarge lo lalasho lino te nkop! Kitediaaki! Mikintoki enkop aiki ilng'anayio. Miata inchere pee ming'uaa ene wueji nilo amanaa tenkop pooki."

Nejo Kain, "Oi! Kegol ena oleng' te nanu! Kintayu nanu aitung'aa enkop. Kintayu nanu aitung'aa enkomom ino naa ore pooki laadol na kaar nanu matua!"

Nepik Enkai olmoniekie Kain nejo, "Ore oliking'em iyie, naa kalaaki inkatitin naapishana." Neaku nelo Kain amanaa too nkuapi pooki.

Neaku enotito Adam o Hawa enkai ayioni, neipot enkarna enye ajo Seti pee ejing' erishata e Abel otua. Netum Kain inkera, kake inkera torrok nemeisis Enkai. Netum sii Seti inkera. Naserem ninche Enkai.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata ninoto olom tialo likae tung'ani, nikirikoki ina taasa entoki torrongo? Imaki tenebo ilo liboitare litaaniki.

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
 - Keata enkitoria peyie edol easata e nena yieunot enyena tenkaraki ninye oitobirua iyiook.
 - Etaraayie Kain meipang'a alool

- Eitanap iltung'ana meyau olasar oshiakino pee enyikakinyieki ninye te nkoitoi e seremare.
 - Neisho Adam o Hawa Seti te rishata e Abel.
 - Nepik olmonokie le mitunoto Kain.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Etayiolo indamunot o ltau le Kain.Neyiolou Engoro, olom, sura.
 - Keyiolo oltau,o enetaasa Kain peyie eyau olasarr oishiaa te dukuya Enkai.
 - Nejo, "Aaipotito osarge lo lalashe lino tenkop."
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Eitamio Kain tenkaraki ing'ok enyena nearaa, nedek enkop tenkaraki o tialo ninye.
 - Eidim ake oltung'ani ayeu enetii Enkai tenkoitoi najo ninye ake. Eiyieu Enkai olasar oshiaakino pee enyikaki oltung'ani ninye. Neidim oltung'ani ayau ilo asar tiatua enkirukoto.
 - Ore tenkaraki naatai olasar sidai o Itorrone, neitodolu ina inchere Aisinyati Enkai.
 - Ore olasar le Abel netang'amayie Enkai te nchipai. Amu eyawua Abel ilo asar tiatua enkirukoto.
- **Kaji eiko ena atini teneiteng'en iyiook inchere keata Enkai empiris?(kenyorrisho, keata olng'urr tialo ilaing'okok, nenana oshoke, neton ake eirorie oltung'ani)**
 - Eishoo Kain erishata pee eirridu. Amu eikilikuana enetii olalashe lenye. Naa Neikok ninye te naipirta ing'ok naarreshito te kutukaji enye.
 - Neishoru enkoitoi pee errinyokino oltung'ani shoruetisho o Enkai tiatua olasar osipa.
 - Neirorie Enkai oltung'ani aliki enaiko tenerrinyunyie alotu enetii ninye te nkoitoi e seremare.
 - Etipikaka kain olmonekie arrip ninye, ata tenaa olaing'okoni arashu hoo nemenarikino.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Eishoo Adam o Hawa Seti te rishata e Abel.
 - Etolikio ajo ore kenya naa kerriu Olaitajeunoni tiatua eishoi e Hawa. Keitabaya enetejo tiatua Seti.
 - Etejo keidim atorripo Kain, neas.

KAINYIOO KINTENG'ENA ENA ATINI NAIPIRTA OLTUNGA'NI?

- **Keitodolu ena atini ajo keata oltung'ani tipat te Nkai? Tia oitoi?**
 - Keyieu Enkai shoruetisho enye. Neaku eitobirua enkoitoi pee eirridu iltung'ana neshukunye aserem ninye.
- **Keitodol ena atini ajo keata oltung'ani ing'ok naa keishiakino pee eitame Enkai oltung'ani tenkaraki ing'ok enyena?**
 - **Amaa, etii aji etoiwuoki Kain o Abel?** Mme tiatua enkurma e Eden, kake ti aulo! Etoiwuoki anaa ilaing'okok tenkaraki ing'ok o intoiwuo enye. Ore pee eini, netii boo e nchula e Enkai neata sii iltauja ooyieu negolong'aki Enkai.
 - Neijia sii etiu iltung'ana pooki. Etoiwuoki tiauluo olchampa le Nkai.Tia uluo shoruetisho e Nkai.
 - Keyieu apa Kain nenyikaki aashu eserem Enkai te nkoitoi enye makewan, mme ene Nkai! Eitu eyau olasar oshiaakino.Neitu elotu te nkirukoto anyorraa inchere olaing'okoni neyieu enjeunoto naing'uaa Enkai.
 - Kegoro Kain neata olom.
 - Etayiewua apa Kain nearr olalashe lenye tenkaraki ing'ok natii atua oltau lenye.

- Kain, nesuj enkitanyaayukoto o Shetani.
- Etejo Enkai, “Kegira ing’ok aarresh te kutuk aji anaa olapurroni. Naa keyieu nikimbung’. Ore anaikoni teneirishi ing’ok naa olarrabal oidipunye ilo. Amu keyieu neibung’ iyiook.
- **Keitodol ena atini ajo keyieu oltung’ani Enkai kake meata engolon naidim aitajeunye kewan?**
 - Ore pee enyok Kain anyikaki Enkai te nkoitoy enye makewan, neany Enkai ninye.

KAINYIOO KINTENG’ENA ENA ATINI NAIPIRTA OSOTUA OLTUNG’ANI O ENKAI? (ENJEUNOTO)

- **Keitodolu ena atini ajo keidim oltung’ani ayeu enetii Enkai eimu enkoitoy e Nkai ake, mme enkoitoy enye? (te yieunoto Enkai o nkipangata enye makewan?)**
 - Eewuo Abel aserem Enkai te nkoitoy Enkai, neaku tiatua enkirridunoto o enkirukoto. Neitodol enkirukoto enye tiatua olasar lo sarge. Neaku etang’amua Enkai ninye.
 - Eidimayu netuutaitie intoiwuo enyena Abel tialo enaiko tenlotu enetii Enkai, anaa apa enatuutayie Enkai ninche te nkiterunoto.
 - Nelotu ninye Kain enetii Enkai te Nkoitoy enye makewan kake eitu enyorrarri te dukuya Enkai.
- **Keitodolu ena atini ajo keshiakino pee eata oltung’ani enkirukoto o enkirridunoto pee eitiship Enkai netum sii enjeunoto?**
 - Etonyorrarayie Enkai Abel amu eteserema Enkai te nkirukoto. Neyawua olasar oitiship Enkai, olasar lo sarge, lkuo oisul naa olkikau. Nelotu temborron. Neibalunye ing’ok enyena, nepik osiligi lenye atua Olaitajeunoni olotu eyau olasarr oitoriori. (ilhebrania11:4,6)

INKIKILIKUANAT NIKIASISHORE TE NKIBELEKENYATA E NKISHUI:

- Amaa, kaji kitoywunyeiki? Tiatua enkurma e Eden arashu ti aulo? Kitoywuoki te ishoy e Hawa? Neaku ira nyoo arashu ng’ae? (Olaing’okoni) Amaa, ketii oltung’ani hoo obo lemeas ing’ok?
- Amaa, oshi tenias ing’ok, ng’ai igira aitame? (Enkai! O iltung’ana sii.)
- Amaa, keata Enkai engolon arashu enkitoria te shumata iyie? Kainyoo?
- Amaa, keton eyiolo Enkai pooki toki? Keyiolo inkiasin inono? Aashu indamunot? Amaa, ketii ewueji hoo nabo nindim ashomo pee medol Enkai ing’ok inono?
- Amaa, keyieu Enkai nikias enayieu ninye? Keiba ninye tenikigolong’aki? Meishiaakino teneitame Enkai iyiook tenkaraki ing’ok ang?
- Amaa, keton eata Enkai olng’ur to ltung’ana otaasa ing’ok? Eishoo iyiook enkoitoy pee kilany enkitamioto?

5. NOA O LAIRRAG LE NKARE Enkiterunoto 6-9

Ore pee eidip Enkai atediaa Kain, enoto Kain enkitok neiu inkera. Netum sii Seti, olalashé le Kain, enkitok neiu sii ninye inkera. Ore te siadi, too ishoritin enye, neaku kumok oleng' iltung'ana le nkop. Nenyor iltung'ana kuti ake Enkai, kake negolong'aki kulikae tung'ana kumok Enkai. Nearr olikae olikae too nkatitin pooki. Nedol Enkai ajo ore indamunot pooki o ltauja loo ltung'ana naa eitorrok pi! Ore pee edol Enkai ajo kaji eikunono inkiaasin torrok oo ltung'ana, nejo "Kamut tioriong' enkop iltung'ana laaitobira, tenebo ing'uesi pooki."

Kake enoto olpayian oji Noa omom too nkonyek o Laitoriani. Ore apa Noah naa oltung'ani oitashé too sipat. Neiriamariyie Enkai. Nejoki Enkai Noa, "kaata osina sapuk to ltau tenkaraki aitobira oltung'ani tenkop." "Neaku, kamut tioriong' enkop iltung'ana o ing'uesi pooki tenkaraki ing'ok sapuki oo ltung'ana. Kake kaitasheyie olning'o lo sotua lai o iyie, Noa. Iyie ake, Noa, oishu o ntomononi ino o ilayiok okuni linono tenebo intomonok enye. Kayieu nishet empeut sapuk, naji esafina, amu kayau ilopir le nkare sapuki oleng' amut enkop. Ore pooki toki naishu o pooki sesen, ing'uesi o imotonyi, iyau maare e pooki pukunoto atua ena safina,aa olee o elipong'. Ore sii too ng'uesi sidain to lasar, iyau iloin'gok oopishana o lipong'a naapishana. Iyau endaa sii."

Neliki Enkai Noa eneiko teneitobir esafina. Neliki ajoki pee epik emilanko nabo. Neas Noa pooki toki natolikio Enkai ninye. Neasisho Noa ilarin iip nabo o tikitam ashet esafina. Ore pee eidip Noa atasheta esafina, neliki Enkai ninye ajoki lasima pee ejing esafina tenebo olmarei lenye o ing'uesi pooki. Neaku etaasa Noa neijia. Neiken Enkai emilanko.

Nedanya Enkai inkonyek oo nkariak naagut naaruko. Neshaike enchan e shumata enkop inkolong'i artam o nkewaritin artam. Nenukari enkop pooki tenkare, ata ildoinyio oodo. Neaku meidim ilkulikai tung'ana ailanya enkeeya. Kake ore Noa o Imarei lenye o inguesi natii esafina naa eitajeuoki tiatua esafina tioriong' enkare.

Ore pee eidipayu inkolong'i artam, Nedamu Enkai Noa neitasheyie enchan. Nebik Noa tiatua esafina olari olulung'a. Nedoyio inkariak pee eirragie esafina oldoinyo. Nejoki Enkai Noa o Imarei lenye, "Entupuku te safina." Nepuku Noa o Imarei lenye o ng'uesi aaing'ua esafina. Neshetaki Noa Olaitoriani ewueji olasar, neitaki Enkai olasar opejori neserem Enkai.

Neshipa Enkai tenkaraki olasar. (Etishipakine Enkai olasar.) Nejo Enkai, "Maitoki aekata amut enkop te nkare." kapikaki olokirrai lai atua enkatampoi naa keaku olmonekie lo sotua lai o enkop.

Neliki Enkai Noa o Imarei lenye pee eisho inkera kumok neiput Enkop anaa enatolikio Adam o Hawa. Nejoki Enkai Noa, "Kaaisho ing'uesi pee eaku endaa. Kake, minya osarge. Ore oloibukoo osarge lo ltung'ani, naa oltung'ani oibukoo osarge lenye, amu eitayio Enkai oltung'ani te nkitanyaanyukoto enye makewan." Ilayiok le Noa eishoo inkera kumok neaku iltung'ana kumok tenkop.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nikinchoo likae tung'ani iutarot naado, negol esujata pee ias embae naje? Kegal nena utarot esujata? Keyieu ipalari?

ENKATINI: Toliki enkatini ningiligili tenebo anaa olturrur pee eyiolo pooki ng'ae

Enkilikuanat e N KING'ORARE

- **Indim atoliki iyiook enkatini anaa enaikunono tialo inaatasate?**
 - Kainyoo pee etagore Enkai? (Amu etodua entorroni o ltung'ana.)
 - Kainyoo ing'ok oo ltung'ana? (Keara ninche, neeta indamunot torrok o ltauja torrok.)
 - Kaji eikununo iltung'anak te rishata oloirrag le nkare? (Eitorrok indamunot enye pooki, o ltauja lenye inkatitin pooki!)
 - Kainyoo epaashare ninche o Noa? Kaji kinko pee kidol ina? (Amu etaasa Noah pooki toki natiaka Enkai.)
 - Kanu eishunye erishata pee eirridu iltung'ana? (Enkata naikeno Enkai emilanko.)
 - Kaa enkoitoi nabo ake najeunyie kulo tung'anak? Netii imilankoni aja esafina? Kang'ae oikeno emilanko?
 - Kaing'ae otii esafina?
 - Kaji eiko pee eyiolou ajo kanu ejing' arashu kanu epuku te safina?
 - Kaji eikuna pee eyiolou ateshet esafina?
- **Entolikioki intokitin pooki naitanapa Enkai Noah metaasa tiatua ena atini.**
- **Tolikioki intokitin nataasa Noah.**

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikunono enkatini

KAINYIOO KINTENG'ENA ENA ATINI NAIPIRTA ENKAI?

- **Kaiji eiko pee elimu ena atini ajo keeta Enkai ENGOLON sapuk? (Ashu keata enkidimata neitorisho?)**
 - Keidim aishie pooki toki pi. Neitore inkariak naruko.
 - Keeta esipata pee emut amu ninye oitobirua.
 - Keitore pooki toki
 - Neiteru enchan, nebol abori enkop pee epuku enkare.
 - Neitashyie olairrag le nkare nabo kata.
 - Nemayian Noah o layiok lenyena nejoki "Entubul."
 - Nejoki pee ejing' esafina, neitoki aliki erishata napuku boo.
- **Kaji eiko pee keitodol iyiook ena atini ajo KEIYIOLO Enkai pooki toki? (Netii pooki wueji?)**
 - Etayiolo Enkai intorrok oo ltung'ana o ndamunot enye pooki.
 - Neyiolou sii Enkai enaiko teneshet esafina. (Eitu aikata edol Noa entoki naijo ina!Ebaiki eitu aikata edol enkare sapuk.)
- **Kaji eiko pee keitodol iyiook ena atini ajo sapuk EISINYATISHO e Nkai? (Ashu enkitisipata enye, aashu keiba ng'ok , neitame sii.)**
 - Eitamio ng'ok oo ltung'ana, neishie (nemut ninche).
 - Neisho Enkai enkitanapata pee meibukoo ake osarge lo ltung'ana.
 - Neisho inkitanapat naaje, tialo enaikunono tenesheti esafina.
 - Amaa, eisidai enkoitoi e Nkai te iyiook? (Ee, ata tiatua enkiguana o lairrag le nkare kindim aatodol enyorrata o empiris enye.)

- o Neiken Enkai emilanko. Neaku meidim likae hoo obo atobolo. Amu eishunye erishata pee eirridu iltung'ana.
- **Kaji eiko ena atini teneiteng'en iyiook inchere keata Enkai empiris?**(kenyorrisho, keata olong'urr tialo ilaing'okok, nenana oshoke, neton ake eirorie oltung'ani)
 - o Eting'iria tiatua ilarin iip o tikitam aisho ninche erishita meirridu.
 - o Eirorie Noa, neikok ninye.
 - o Neisho Noa empiris, amu olaing'okoni sii ninye!
 - o Neitodol Noa enaiko teneshet esafina sidai.
 - o Neisho Noa pooki toki nayieuni te safina.
 - o Neisiligie Noa ajo meigil amut enkop te nkare.
 - o Neng'amu olasar le Noa.
 - o Neisho olmarei le Noa metoponari nemayian.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - o Eitajewuo Enkai Noa anaa enaisiligie.
 - o Neirriu Enkai enchan nemut enkop anaa enaisiligishore.
 - o Neishoru Enkai olmonekie lo lakirrai pee eitadamu iyiook osiligi lenye.

KAINYIOO KINTENG'ENA ENA ATINI NAIPIRTA OLTUNG'ANI?

Kainyoo eiteng'en iyiook ina atini tialo enaikununo oltung'ani? Kaji eikununo iltung'ana to nkolong'i e Noa?

- Ilaing'okok kulo tung'ana pi! Keara olikae olikae. Eitorrok indamunot enye inkatitin pooki. Nemedamu enkoitai Enkai. Nemeeta naboisho o Enkai.
- Etooro ing'ok enye o Nkai nepuo enkoitai e keeya.
- Keata apa erishata pee eirridu kake etanyaita ninche.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

Amaa, ina atini, keliki iyiook enaikununo pee elotu oltung'ani enetii Enkai? Ashu kaji eikununo pee eitajeuoni oltung'ani?

- Eitishipa Noa Enkai amu etaa asipani, nemeata enkarrueisho tiatua kulikae tung'ana. Nelo tenebo Enkai. Neeta enkirukoto.
- Neining' Noa oltoilo le Nkai pee eyiolou enaas. Ore ena naa keitodolu enkirukoto enye neitiship Enkai.
- **Amaa, kainyoo pee eyieu Noah enkirukoto sapuk pee etum ayanyita Enkai?**
 - o Ebaiki neitu aikata edol enchan aashu esafina. Neboita o laruok te rishata naado neitu eshalu too inkiasin enyena. Tenishet esafina naa esiai nagol, naa kegol bei, naa ebaiki eimakita kulikae tung'anak enyok ajo kintashal ninye.
- Eenyita Noa Enkai amu eisilig ninye Enkai, nenyor sii.
- Lasima pee kinyikaki Enkai te nkoitai enye. Esafina nabo. Emilanko nabo. Enkoitai nabo. Keng'amu Enkai iloopuonu te nkoitai enye ake.
 - o Ore enkoitai Enkai, naa pee inyoraa ajo ira olaing'okoni nimiata osiligi lintajeunye kewan naa pee ipik enkirukoto to Laitajeunoni oishoo Enkai iyiook.
- **Kainyoo pee eata osarge tipat tiatua olning'o le Nkai o Noa?**
 - o Meidim ainosa osarge amu ole Nkai naa ketii enkishui atua osarge naa Enkai ake openy oishooyo enkishui.
 - o Tadamu ajo ore apa pee eisho Enkai Adam o Hawa indapan meishopo naa keyieng' Enkai ing'uesi pee eibukori osarge. Neaku eewuo empiris Enkai tiatua osarge. Neaku sii te Noa, Amu ore pee epuku te safina, neitayu olasar lo sarge pee eisho Enkai enashe tenkaraki empiris enye.

INKIKILIKUANAT NIKIASISHORE TE NKIBELEKENYATA E NKISHUI (Tegelu nabo):

- Amaa, teneidim Enkai aitoria inkariak o enkop, Ekiindim aing'ora iyie o olmarei lino? Amaa, ekiindim aitamio ARASHU atara iyie?
- Amaa, keton eyiolo Enkai pooki toki taata? Keyiolo ndamunot inono? Indim aisudorie ing'ok inono?
- Amaa, keton aa sinyati Enkai? Keton eiguenare inkiasin o indamunot ang'?Keton eitame ing'ok? Keata esipata pee eitame ing'ok inono?
- Keton aa ilaing'okok iltung'ana? Ketoiwuoki iltung'ana etoorore Enkai?
- Amaa, ketiu iltung'ana le taata anaa iltung'ana le rishata e Noa? Inchere earisho, aarruok, neloloito?
- Ore iltung'ana le rishata e Noa kegol iltauja too ng'ok. Amaa, kegol oltau lino too ng'ok kulie katitin?
- Amaa indim aitajeu kewan? Kenyok iltung'ana aitajeu ate too nkoitoi naapashipaasha? tiakua oitoi?
- Amaa, eton eata Enkai empiris? Itaa iyie oloterretene pee irridu ang'amaa oing'ur le Nkai nisuj enkoitoi enye?
- Amaa, igira aton te nkoitoi enkirukoto anaa Noa, airridu ng'ok, aisilig Kristo, nias enayieu Enkai tiatua enkirukoto?
- Amaa, eton errip Enkai enkisiligata enye? Keitabayie enkisiligata o lokirrai pee meigil amut enkop te nkare? Kerrip enkisiligata pee emut iltung'ana ooye eton eitu epik osiligi lenye atua Olaitajeunoni?
- Amaa, ketabolo Enkai emilanko enjeunoto te iyie?
- Inining' oshi iyie Enkai? Ining'ito enkipototo enye?

6. ENKIPOTOTO E ABRAM; ABRAM TE MISIRI Enkiterunoto 12:1-9; 15:1-21

Ore pee eidip Enkai aitarruoi inkutukie te Babeli, netii apa oltung'ani oji Abram. Naa keata ninye ilarin intomoni naapishana o imiet te morua enye naa etamorua sii enkitok enye naji Sarah. Nemeata inkera pokira. Ore te nkolong' nabo, neipang'aki Enkai Abram nejoki, "Abram, tupuku shomo tung'uai enkop ino o ltung'ana linono le sotua, o enkaji e papaai lino, shomo enkop naautaki. Naa kaaitainye iyie olosho sapuk, naitaa enkarna ino kitok metaa iyaku emayianata. Ekamayian lelo likimayian, naa kadek lelo likidek. Naa kemayiani iloshon pooki tenkaraki iyie."

Neaku neya Abram Sarah o olenkapu lenye oji Lot neaku keiteru o masaa enyenak aapuo abori e kopkop. Ore pee ebaiki enkop e Kanaan, nejoki Enkai, "Nena ina kop. Kaisho eishoi ino ena kop." Neaku etamanya ninche ine. Neshetaki Abram Enkai teine olperere lo lasar pee eisho Enkai enashe.

Netii apa ina kop olameyu sapuk oleng'. Nedou Abram alotu enkop e Misiri aparani. Ore pee ebaiki oluposie le Misiri, Nejoki Abram Sarah, "Ira enkitok sidai oleng'. Neaku ore olikidol iyie naa kaar nanu matua pee kitum aawa anaa enkitok enye. Neaku meata inchere pee mijoki ira enkanashe ai." Nenyoraa Sarah nepuo aajing'atau Misiri.

Ore te Misiri netii apa iltung'ana oogol, oonyikita olkinki le Misiri oleng. Nedol ninche Sarah neliki olkinki, neya olkinki Sarah metaa nabo o inkituaak enyenak. Neisho sii inkishorot kumok Abram, anaa inkishu, intare, inkineji, oo iropiyiani sii. Kake nedek Enkai olkinki tenkaraki ina. Ore pee eyiolou olkinki ajo eteleja Abram ninye, neirriu Sarah ashuku enetii Abram, nejoki Abram, "Amaa, kainyoo pee kiteleja? Kainyoo pee kitiaka eji ore Sarah naa enkanashe ino kake enkitok ino. Neaku enchom! Entung'uai ena kop!"

Neaku eshomo Abram o Imarei lenye aashuko aapuo shumata ina kop e Kanaan nemany ine. Neaku Abram olkarsis teine.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Tolimu erishata nikisiligie likae tung'ani entoki sapuk, ninyok aanyu terishata naado? Keitabayioki ina kisiligata? Kainyioo itoning'o iyie tialo ena?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT Naaret AYIOLOU ENKATINI:

- Indim atolimu aitusuju ena atini tialo nena pooki naatasate.
- Kaji eikuna Abram pee eyiolou nena naayieu Enkai neas ninye?
- Kainyioo etiaaka Enkai Abram pee eas?
- Kainyioo kisiligat eisiligie Enkai Abram?
- Kainyioo etiaka Abram naipirta enkop o lkanaani?
- Kaji eikuna Abram pee eserem Enkai?

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko tneitodol iyiook ena atini inchere keata Enkai ENGOLON POOKI (neata enkitoria pooki, netii shumata pooki, naa kitok te pooki)?**
 - Eitodua Abram enkitoria pee eutaki enelo. Neitaa Abram oleny neaku keata esipata pee eliki ninye eneas.
 - Etorripo Abram, hoo nelakuaniki apa olmarei lenye. Nerrip ninye tialo olameyu o tialo ile misiri.
 - Neitamuoi Farao tolmeita kumok.
 - Nerrip Sarai pee meinyiali ninye arashu eisarkionieki ninye.
 - Neiteru aitabaya nena kisiligat enyena. Nerikoo ninye atua ina kop. Neitaa ninye karsis.
 - Neidimie Olkinki le misiri metamayiana Abram.
 - Negelu Enkai Abram metaa ninye enkoitoi e mayian. Negelu amayian ninye hoo netaasa eng'oki te misiri.

- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Etayiolo apa enaasai te Abram.
 - Keata apa enkipankata tialo Abram.
 - Neisiligie aitaa ninye kitok, pee emayian ninye. Etamayiana ninye te misiri.
 - Neisho Abram inkisiligat naibala tialo nena naalo aitaas ninye too nkolong'i naapuonu. (Neisho enkop, eishoi sapuk, enkarna sidai, imayianat/ ildeketa, nemayian iloshon pooki te ninye.)

- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, neiba ing'ok, neipotu keeya metaa olekoisiayio loo ng'ok)**
 - Neisho Abram inkitanapat naasuj, neas. Nedamu ajo kesuj, neas ninche.
 - Neiteru aoru Abram tenebo olmarei lenye, aitaa ninche olmarei sinyati laa ninye elotu Enkai aitodolunye kewan tialo enkop pooki.
 - Neyau ilmeita tialo olkinki le misiri tenkaraki nawa Sarai aitaa enkiok enye, aikonyaa ninye, pee etumoki ainyiala ninye anaa enayieu. Ore tialo ena nerrip Enkai Sarai pee meisarkionieki ake.
 - Ore tialo Olasar le Abram, neitodolu ina sinyatisho e Nkai o inchere olaing'okoni oltung'ani. Eidim ake oltung'ani ayeu enetii Enkai eimu enkoitoi e Nkai ake.

- **Kaji eiko ena atini teneiteng'en iyiook inchere keata Enkai empiris?(kenyorriso, keata oling'urr tialo ilaing'okok, nenana oshoke, neton ake eirorie oltung'ani)**
 - Olaingokoni sii ninye apa Abram. Meata apa sii ninye enkirukoto anaake. Neteleja apa sii ninye ile misiri tialo enkitok enye tenkaraki etureishie apa, alang enaisilig ninye Enkai. Neng'amu sii nena apa kishorunot te nkoitoi e sunkureisho arashu e nkeleekisho.
 - Neitaa Enkai nena torrok sidan, amayian Abram too nkishoorot pee etum aitaa ninye karsis, neiteru sii aitaa ninye olosho kitok. "Amu keing'orr Enkai anaa mme toki sii duoo."
 - Negelu Enkai Abram, hoo naa olaingokoni pee enapaki ninye ilo ning'o.
 - Nerrip Abram hoo nelakuaniki ang enye.
 - Neisho ninye ang.
 - Neisho ninye inkisiligat kumok sidain.
 - Nemayian ninye te karsisisho.

- **Kaji eiko ena atini teneutaki iyiook inchere KEISILIGAYU Enkai? (meibelegenya, keibung inkisiligat enyena, keas sii inaajo)**
 - Eishoo Abram inkisiligat. Neiteru aitabaya ninche.
 - Neisiligishore peyie emayiani iloshon pooki.
 - Neiteru aitaa Abram olsho kitok pee eisho ninye karsisisho, anaa apake enaisiligie ninye.
 - Nemitu Abram (adek lelo oodek ninye-olkinki le misiri)
 - Nerikoo ninye te wang'an.

- o Neitu eisho ina nataa Abram olemeisiligayu naa olaingokoni meibeleyenya enkipankata naata Enkai pee emayian ninye tenebo iloshon pooki eimu ninye.
- o Neloito Enkai dukuya aibung' ina kisiligata natejo tiatua Embuku e Nkiterunoto3:15 peyie eyau olalakunoni pee elotu amirr shetani, olalakunoni oimu eishoi e nkitok. Neibung'a ina kisiligata hoo netara Kain Abel, hoo netoponari enkarrueisho o metaasayu oloirrag le nkare, hoo netoponari olwuasa le tung'ani neiteru aigarakino kewan te Babeli.

KAINYIOO KINTENG'ENA ENA ATINI NAIPIRTA OLTUNG'ANI?

- Keata tipat te Nkai. Egira Enkai adamu ninye anaake. Eata Enkai enkipankata pee emayian iloshon pooki le nkop pooki.
- Ore oltung'ani naa olaing'okoni. Eitodolua Abram ina aibalunye pee elejisho alang enaisilig Olaitorian pee errip ninye arashu emitu ninye. Indim sii atodua ing'ok tialo e Farao inchere keiba Enkai ing'ok.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Eshipakino Enkai enkirukoto, ata ninye te mpolos oo ntemat.
- Eitodoluni enkirukoto tenkoitoi e ning'oto o nkibung'ata e yieunoto e Nkai.
- Kainyioo pee etamayiana Enkai Abram?
 - o Peyie etum ninye ataa emayianata te kulikae. Eitajeu Enkai oltung'ani neasishore sii Enkai ninye pee eyau enjeunoto tialo iklulikae pooki.

INKIKILIKUANAT NIKIASISHORE TE NKIBELEKENYATA E NKISHUI (Tegelu nabo):

- Ninkilikuanu pooki kilikuanata naitirrish enkirukoto nalioo toltau oning'isho hoo naa kumok iloketa arashu irresheta.
 - o Aikimpoto aekata iyie Enkai pee iya eroruata enkirukoto aas embae nagol hoo nemelioo eneiting'ie ina bae? Aing'ae oata shakenisho naidim aishoru?
 - o Kaku intokitin naipot Enkai iltung'ana metaasa naa enkirukoto eyieu?
 - o Iata iyie enkirukoto te nkai, nikindim atorikoki ening'oto o easata, arashu ke yielounoto ake oolukuny ena?
 - o Kainyioo nena nikigira Enkai aipot iyie taasa naa enkirukoto eyieu?
- Intirrishan enkiimakinoto olning'o le Nkai tialo iltung'ana ilo laa ninye oyau Olaitajeunoni oina sii nara oloisiligayu o taata.
 - o Keton eisiligayu Enkai taata pee eisho iyiook Olaitajeunoni? Aikindim atareto tialo nena nigira aimaa naagoli?

7- EINOTO E ISAAK; OLASAR LE ISAAK Enkiterunoto 21, 22

Ore etulusoitie ilarin tikitam o imiet eidipa Enkai eisiligie Abraham eishoi sapuk, neisho Sarah enkayioni anaa anatiaka Olaitoriani. Neji Isaak, enkipirta enye “enkuenia” amu etakuenia Sarah apa pee ejo Enkai iisho. Ore Isaak nebulu neaku olayioni.

Ore enkolong’ nabo, netem Enkai Abraham nejoki, “Abraham.” Nejo ninye, “Nele nanu.” Nejoki, “Toriko olayioni lino Isaak ilo laa ninye ake iata, ilo linyor, nipuopuo enkop e Moria, nintayu ninye te ine metaa olasar o pejori te nchumata o ldoinyo obo laaliki.”

Metaa einyo Abraham tadekenya enasirie neirot osikiria lenye, nerik ilbarnot lenyena oare tenebo olayioni lenye Isaak. Nedung’u ilkeek ooinokie olasar opejori nedumunye alo ewueji netiaka ninye Enkai. Ore te nkolong’ e uni, neraposhu Abraham inkonyek nedol ewueji nelakua. Nejoki Abraham ilbarnot lenyena. “Entotoni tene tenebo ele sikiria pee alo nanu o layioni idie aaseremisho peyie kintoki aashukunye.” Neya Abraham ilkeek ooinokieki olasar opejori, neiteleiki oloililai le Isaak enkayioni enye. Nenap te nkaina enye enkima o enkalem. Nepuo pokira are aairiamari.

Nejoki Isaak papaai lenye Abraham, “Papaai!” Nejo Abraham, “Nele nanu enkayioni ai.” Nejo Isaak, “Ing’ura ajo kiata enkima o lkeek paa koree doi olkuo le kerr likintainye olasar opejori?” Nejo Abraham, “Ekeisho Enkai kewan olkuo le kerr lo lasar opejori enkayioni ai.”

Kaae, nepuo pokira are aairiamari. Ore peyie ebau ewueji natuutaka Enkai ninye, neshetu Abraham olperere lo lasar te ine neirragie ilkeek aitobiraki, neen Isaak olayioni lenye, neirragie ninye te wueji o lasar te nchumata oo lkeek. Neitorioo Abraham enkaina enye nedumu enkalem nayieng’ie enkayioni enye. Kake eipoto ninye olmalaika lo Laitoriani eng’uaa keper ejoki, “Abraham! Abraham!” Nejo ninye, “Nele nanu.” Nejo, olmalaika, “Minteleiki enkaina ino olayioni anaa intaas ninye ae, amu atayiolo taata ajo iure Enkai amu atoduaa ajo eitu kimitiki enkayioni ino naa ninye ake iata.”

Neraposhu Abraham inkonyek enyena aing’orisho nedol te siadi ninye olmeregesh otaasha entim imowuarak enyena, nelu Abraham aya ilo meregash, neitayu ninye aitaas olasar opejori te rishata e nkayioni enye. Neipot Abraham ine wueji ajo, “Eneishorunye Olaitoriani.” Naa ina arna eeta ine o taata, ore to ldoinyo lo Laitoriani keishoruni.

Neitoki olmalaika lo Laitorriani aipot Abraham enkata e are eng’uaa shumata. Nejo, “Ainosa nanu omumai te kewan ai, ejo Olaitoriani, ‘Ore amu itaasa ena neitu imit enkayioni ino aa ninye ake iata, ekaamayian iyie oleng’, naa kaponaa eishoi ino metotiwuo anaa ilakir le keper netiu sii anaa osinyai le nkiyopata enaiposha. Ore eishoi ino neaku e nenyekishomi oo ilmang’ati lenye (nemir ilmang’ati lenye). Naa tiatua eishoi ino emayian iloshon le nkop pooki ate, amu itoning’o oltoilo lai.”

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Idamu erishata nikitiaka oltung'ani taasa embae nemening'unoyu? Kaa itaasa tialo ina?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
 - o Eishoo Sara enkayioni ata etamorua
 - o Eata engolon naitanapie Abraham
 - o Eishorua olasar te rishata Isaak
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Keishiakino neatae olasar lo sarge. Keibalunye olasar ing'ok oo ltung'ana o esinyatisho e Nkai. Meata ai oitoi nalotunye oltung'ani enetii Enkai.
 - o Eibung'a olmerregesh ilkiku imowarak pee medung' entim ninye. Amu meishiakino neata enkerr o lasar entioto.
 - o Ore olasar laa ninye otinjing'a erishata o ilaing'okok naa ilo oishorua Enkai.
 - o Eishoo Enkai Abraham enkitanapata. Nemeata nchere pee mening'.
- **Kaji eiko ena atini teneiteng'en iyiook inchere keata Enkai empiris?** (kenyorrisho, keata olng'urr tialo ilaing'okok, nenana oshoke, neton ake eirorie oltung'ani)
 - o Keishorua olmerregesh metaa olasar. Meata ai oitoi napuonunye ilaing'okok aaserem Enkai. Neisho Abraham enkoitoi manyita enkitanapata anaa enkoitoi najeunye Isak.
 - o Enkisiligata o mayianat too iishoritin kumok, o emirishoi too lmang'ati, namayiani ilosho pooki eimu eishoi enye.
 - o Neipot ine ajo – Jehova Jire – Eneishorunye Enkai.
- **Kaji eiko ena atini teneutaki iyiook inchere KEISILIGAYU Enkai? (meiblekenya, keibung inkisiligat enyena, keas sii inaja)**
 - o Neisho Enkai Abraham enkayioni anaa enaisiligie.
 - o Neishoru enkoitoi pee eishiu Isak neitabari sii enkisiligata eimu Isak anaa enetejo ninye.

KAINYIOO KINTENG'ENA ENA ATINI NAIPIRTA OLTUNG'ANI?

- Meata apa Isak enkidimata pee eitajuo kewan.
- Keidim ake Abraham aitishipa Enkai te enkoitoi e nkirukoto.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Ore eimu enkirukoto eanyita Abraham enkitanapata ata hoo teneitu apa eiyiolou ninye. Ekintodolu enkirukoto nasipa te nkoitoi enkanyit.
- Olasar sinyati ake lemeata entioto oidim aidipa te erishata oo ng'ok ang'. Ashu oidim atalaa esile nikiata tenkaraki ing'ok ang'.

INKIKILIKUANAT NIKIASISHORE TE NKIBELEKENYATA E NKISHUI (Tegelu nabo):

- Eitu emit Abraham enkerai enye nabo eitu eishoo Enkai. Amaa kakua tokitin oshi eibung' iltung'ana aamitiki Enkai? Kainyioo iyie imbung'ita? Ketia oitoi indim iyie aisiliga Enkai oleng'?
- Ketii erishata nidamu natomonuo Enkai entoki nemening'unoyu? Kaji kinko pee kintagol ena atini pee intashe te nkirukoto?

8. ISAKA, YAKOBO, O ESAU Enkiterunoto 24-33

Enkitok e Isaka

Ore peyie eaku Abraham oloo larin 137, etamorua neye Sarah te Hebron, nenukaa Abraham ninye teine. Ore tena rishata Isaka naa oloo larin artam neton eitu eyamisho. Neiimwaa Abraham olaisiayiani lenye obo meshomo eneti ilentalipa enye te Syria aing'uraki ninye enkitok, amu meyieu apa neyam ninye e ntito Olkaanaani. Ore pee ebaya Syria, neomoa osinka Enkai meitoduaa ninye entito sidai, neutaki ninye Enkai Rebeka. Naa ore ninye naa enkakuyia olalasho Abraham atobiko apa ninye te Syria. Nenyorra Rebeka o Papai lenye ena kiyama. Neshuko alo Kanani tenebo ilo sinka. Neaku ninye enkitok e Isaka. Ore pee elusoo, neye Abraham, nenukaa Isaka ninye aitatashai Sarah.

Einotoe Isaka o layiok le Rebeka

Ore terishata naado, neitu enutayu Rebeka. Neaku neomon Isaka Enkai tialo ninye, neaku ore etulusoyie ilarin tikitam nelotu aisho, netu ilmao-layiok. Ore eton enuta, nening Rebeka inkayiok ebolbola maate. Nejoki Enkai ninye "Etii iloshon oare auta enkoshooke lino ... Ore liake osho negol alang olikae. Ore olbotorr naa keisiai olikae." Neipot enkayioni edukuya Esau. Neini olikae eibung'ita olikae entutunyio. Neipoti ninye enkarna aajo Yakobo, aa inchere olalejani..

Amenu einoto e kikausho ino

Ore tenkaraki naa ninye olbotorr, neishiakino nengamaa Esau esipata anaa ninye olkikau. Amu ketum enjung'ore katitin are, naa keishiaakino sii apa netom enkisiligata pee eaku emayianaa te ishoi e Abraham. Ore egira inkayiok abulu, naa olang'oroni apa Esau, nenyorr apa ashomo eng'orore. Nenyorr apa Isaka emeloni o ng'uesi naarr a ninye o nena napir nayau Isau. Kake kegira apa ninye Yakobo, nebik apa ninye too lng'oborri naa ninye enyorr ng'otonye enye, Rebeka.

Ore nab oolong egara Yakobo ayierr motori, nelotu Esau ashukunye eing'uaa engorore netoriro esumash oleng'. Nejo, "Yakobo inchooki enkiti toki nanya."

"Maisho nanu iyie kake kamiraki nanu iyie ainosie esipata e kikausho ino teinoto."

"Ng'ura, Yakobo etaa kaye te sumash. Kainyioo tipat naata esipata e kikausho toltung'ani oyie? Nanya olmumai te Yakobo pee emiraki ninye esipata e kikausho enye te mbakuli o motori. Nemenu esau kikaushu arashu esipata e kikausho enye.

Empurrorroto o Emayianata

Ore pee elusoo erishata, neipotu Isaka, Esau, "Atamorua, nemayiolo erishata neton abik aishu. Shomo eng'orore, nikiyaraki anaa oshi ake. Amu kayieu namayian eton eitu aye."

Kake egira apa ainining Rebeka, neaku ore apa eshomo Esau enalakua eng'orore neretu ninye Yakobo meteleja papai lenye, amo modooni ninye pee ejo ninye Esau ogira alotu enetii enapita ngiri namelok. Neaku etamayiana Isaka, Yakobo too mayianat apa naa ino lkikau lenye, Esau. Ore pee eyiolou Esau ajo etelejeki ninye te sipata e kikausho o mayianat e papai lenye, negoro oleng, nanya

olmumai ajo kaarr ake Yakobo. Nejoki Rebeka Yakobo “Toning’oki nanu, enaikash isik alo aboitare olalashe lai te Syria meikasha Esau. Kaliki erishata nilotu.”

Kake ore Isaka nejoki, “Atanaure te kuna kituak oo nkuapi e Esau. Ore ake pee eyam Yakobo nabo e kuna enaikash aye nanu!”

Nejo Isaka, “Meyam hoo Yakobo entito olkanaani shomo Syria, shomo eyau entito nabo olenkapu lino, ina naikash.” Nelo Yakobo Syria.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata det nitonyorayie embae, kake eitu igelie Enkai arashu idamu Enkai tialo ina nayieu ninye? Kaa nataase teina bae?

ENKATINI: Toliki enkatini ningiligili tenebo anaa olturrur pee eyiolo pooki ng’ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG’ENA ENA ATINI NAIPIRTA ENKAI?

- **Kaji eiko ena atini teneutaki iyiook inchere keata Enkai engolon pooki?** (keata enkitoria pooki, netii shumata pooki, neata enkitoo pooki.)
 - Eishoo Isaka enkitok. Etorikoyie olaisiyiani enetii enkitok e Isaka eidipa atoomon Enkai eutaroto.
 - Eishoo Yakobo, oldung’oret, metangamai nena sipat pooki eilo kikau.
 - Nerrip Yakobo tialo olalashe lenye.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Neyiolou inchere keyieu Isaka enkitok naing’uaa olorere lenye pee meisho ninche metaa ilaseremak loo nkitanyaanyukot.
 - Neyiolou, neliki Rebeka ajo kainyioo naloito dukuya te nkoshoke enye.
 - Neyiolou Esau, olkikau inchere kelotu aaku olemeisiligayu.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing’ok, neipotu keeya metaa olekoisiayio loo ng’ok)**
 - Meidim ninye aimunye enkisiligata enye o laitajeunoni oltung’ani lemeisiligayu oyama inkituak eiking’a oloreren.
 - Eitu eisho Yakobo meyama inkituak o ilkanaani amu anaata etorikokito ninye metaa oloserem inkitanyaanyukotok. Keyieu apa Enkai negelaki kewan olorere Sinyati.
- **Kaji eiko ena atini teneiteng’en iyiook inchere keata Enkai empiris?**(kenyorriso, keata oln’urr tialo ilaing’okok, nenana oshoke, neton ake eirorie oltung’ani)
 - Neisho Rebeka inkera etulusoitie ilarin tikitam ootobiko meata inkera.
 - Nerrip Yakobo tialo eng’oro o lalashe lenye.
 - Nelo dukuya aibung enkisiligata enye nayaunye olaitajeunoni elimu eishoi e nkitok o ene Abraham.
 - Negelu amayian, neasishore Yakobo, hoo netaa Yakobo olemeisiligayu.
- **Kaji eiko ena atini teneutaki iyiook inchere KEISILIGAYU Enkai? (meiblekenya, keibung inkisiligat enyena, keas sii inaajo)**
 - Nemusu inchere kelotu olbotorr aisai oloti, neiterua tiatua ena atini.
 - Nelo dukuya aibung’ enkisiligata enye amayian enkop eimu Abraham arashu olnganayio le Abraham, eimu Esau olajung’oni otaa oloisiligayu. Nerrip Enkai Yakobo.
 - Nerrip ina kisiligata o laitajeunoni pee emayian nkuapi pooki.

KAINYIOO KINTENG'ENA ENA ATINI NAIPARTA OLTUNG'ANI?

- **Tia oitoi eitodolu ena atini inchere keata oltung'ani tipat te Nkai?**
 - Eing'ura neramat Yakobo nelu dukuya te nkisiligata enye.
 - Neitame Esau tenkaraki nemeata enkirukoto, emitiki ninye esipata e kikausho enye o mayianata e papai lenye.
- **Tia oitoi eitodolu ena atini inchere, ore oltung'ani naa olaing'okoni nenare enkitamioto nasipa e Nkai tialo ing'ok enyena?**

Ore Esau, nedamu ninye enkoshoke enye ake, neitu edamu mbaa e nkiyang'et arashu inkisiligat e Nkai.

 - Ore sii ninye Yakobo, hoo Netanya apa inkisiligat e Nkai o mayianat enyena, olaing'okoni ninye anaa enalioo te lejare enye pee epurroo imayianat e Esau. Ekidol sii enkoitoi e ng'oki te lejare e Rebeka.
 - Ore sii ninye Isaka, neitodolua endung'ota e nkig'uana torron o tialo iltaujaloo layiok lenyena, aikirotet Esau hoo naa olaingokoni.
 - Ore sii ninye Rebeka naa enkaing'okoni sii ninye. Keyiolo apa enkisiligata e Nkai, kake etonyorrayie pee eas entoki torrono pee easa ena bae.
- **Tia oitoi eitodol iyiook ena atini inchere keyieu oltung'ani Enkai, nemeidim oitajeu kewan?**
 - Enkai ake naidima atorripo Yakobo tialo intemat pooki, nemayian ninye elimaa nena pooki.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- **Kaji eiko ena atini teneitodol iyiook inchere pee eata oltung'ani enkirukoto, neirridu pee etumoki aitishipa Enkai, neitajeuni taa?**
 - Enkerai ake naata enkirukoto tiatua Enkai o nkisiligat enyena otum emayianata, hoo duo ninye netaasa ing'ok etem aing'oru ina mayianata.
 - Neng'amaa Enkai te mpiris enye ina kirukoto enye kiti, nashal.
 - Eitu eng'amu arashu emayian oltung'ani layo ilo lemeata enkirukoto Esau.

INKIKILIKUANAT NIKIASISHORE TE NKIBELEKENYATA E NKISHUI (Tegelu nabo):

- Kainyioo pee elelek nituu oltung'ani anaa Esau, agolie enkoshoke ake, arashu imbaa eina olong ake, alang tenigolie aing'oru nena e Nkai? Tiakua oitoi ituu iyie anaa Esau kulie rishat? Inchere, tiakua oitoi kintore iyie esumash arashu mbaa inono makewan?
- Tiakua oitoi kulie rishat anaa Yakobo item ayese Enkai? Tia oitoi indim aisilig Enkai tialo ing'olikinot niimarita?

9. ENKIDETIDET E YAKOBO

Enkiterunoto 28:10-22

Ore pee elo Yakobo Syria, neirrag enkewarie nabo Betel. Ore teine netum enkidetid. Nedol olkedet obaiki shumata o enkop. Nepuo ilmalaika te shumata o ti abori. Ore te shumata olkedet, neitashe

Olaitoriani, nejoki, "Ara nanu Olaitoriani, Enkai e Abraham papaai lino, nara sii Enkai e Isaak, naa ore ena kop naa ninye irragie, ekaaisho nanu iyie tenebo o eishoi ino. Naa kebyu eishoi ino anaa enterit enkop naa aiponari aibulaa aidapashakino enkop te nkalo o loontolu, o tenkalo o loosaen, o te nkalo e moikuape o te nkalo e kopikop; naa te iyie tenebo eishoi ino emayian iloshon le nkop pooki ate. Ing'ura atii nanu tenebo iyie naa kaarrip iyie te pooki wueji naba anaa enilo, naaitoki arrinyu ena kop."

Neaku eshomo Yakobo mpaka Syria.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Imaki tenebo ilo liboitare erishata tiatua enkishui ino nikinchoo Enkai enkitagoloto erishata nitii empolos e eng'oloto/enyamali, erishata nitureishe ajo kainyioo sa naasa?

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI?

- **Kaji eiko teneitodolu ena atini nchere keata Enkai ENKIDIMATA sapuk? (neata enkitoria pooki, netii shumata pooki, naa kitok te pooki)**
 - o Etorripo Yakobo. Neutaa ninye.
 - o Neipang'aki Yakobo te nkidetidet.
 - o Negelu Yakobo metang'amu isipat pooki e kikausho etii imayianat pooki e Abraham.
 - o Neibalunyie kewan ajo " Kara Olaitoriani, Enkai e Abraham o Isaak".
 - o Neisho Yakobo enkop, Neitaa ninye olosho kitok hoo nemeata apa toki, Nemayian iloshon pooki eimu ninye.
 - o Neata engolon pee errip ninye Yakobo pee eshuku ninye ina kop naisiligie ninye.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - o Etolikio Yakobo nena mayianat pooki naatum ninye anaa, enkop, inkera, naa keitaa ninye olsho kitok.
 - o Neyiolo inchere ore iloshon pooki eimu ninye Yakobo.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Neitodolu sinyatisho enye tialo inkisiligat enyena nemeat intiot.
- **Kaji eiko ena atini teneitodol iyiook inchere keata Enkai EMPIRIS? (Kenyorrisho, neata oling'urr tialo ilaing'okok, nenana oshoke, neirorie ilaing'okok)**
 - o Eshomo dukuya aibung enkisiligata ayau Olaitajeunoni eimu eishoi e nkitok o ne Araham.
 - o Neirorie Yakobo te nkidetidet.
 - o Negelu amayian neasisho sii tenebo Yakobo hoo naa olaing'okoni sii ninye.

- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Eigiligila Enkai nena kisiligat apa naishoo nkakui lenye Abraham, o menye lenye tialo Yakobo.
 - Neshumaki ina kisiligata Olaitajeunoni olotu pee emayian iloshon pooki.
 - Neisiligie ninye erripoto, o enchukunoto eina kop, eishoi sapuk, o emayianata namayian enkop pooki eimu eishoi enye. Eibung'a Enkai inkisiligat pooki.

KAINYIOO KINTENG'ENA ENA ATINI NAIPARTA OLTUNG'ANI?

- Kesipa, etaramata Enkai tolng'urr lenye Yakobo o tialo inkisiligat enyena
- Keitodolu inchere keshal oltung'ani nemeidim toki teneyieu neramat arshu eing'orr kewan, neitodolu ina inchere pee eirishakino ake empiris o mayianat e Nkai.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO) (kaji eiko oltung'ani tenelotu enetii Enkai arashu eitiship Enkai?)

- Olaitoriani ake etumieki enjeunoto. Ninye ake osiligi lang. Maisiliga ninye ake o nena kisiligat enyena, tiatua ilo Aitoriani oirriwua ninye.
- Lasima pee kinining Enkai.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- **Kaji kinko tenikiret iyie tenisilig nena kisiligat e Nkai te kuna olong'i?** Kaji inko teniyiolou kulie kisligat enyena kumok? Kainyioo indim ashomo aitayu kewan pee ilo aas tena wiki nalotu pee itum atayiolo, niruk sii tialo nena kisiligat enyena?
- **Kaji eiko ena atini tenikiret iyie iruko inchere keidim Enkai aibelekenya ina bae nigira aimaa aita sidai? Kaku baa igira aimaa naayieu nisilig ninye oleng?**
- Itipika iyie osiligi lino atua ilo Aitajeunoni oirriwua Enkai, o eishoi e Abraham naiteng'ela Enkai tialo ishoritin pee etumoki atamayiana iloshon pooki? Ore pee mme nejia, ainyioo nikimbokito iyie pee miasita ina? Kaku kisligat e Nkai iyieu oleng ning'amaa te nkirukoto pee itumoki atobiko tiatua ina shoruetisho ino o Nkai? Enkisiligata peyie eaku ninye menye lino? Olchekut lino? Olaitoriani lino?

10. YAKOBO, LABAN, RAHELI, O LEA Enkiterunoto 29:15-35

Ore pee elusoo enkidedidet e Yakobo olkedet. Nelo Yakobo enkop namanya ole nkapu lenye Laban. Ore eidupa Yakobo atotona olapa olulung'a, nejoki Laban ninye, "Amaa amu ira ole sotua, aimikisiai pesho? Kainyioo aalaaki te siai?"

Ore tene neata Laban intoyie are, ore embotorr naa keji Lea, ore enkiti naa keji Raheli. Aitorrok inkonyek e Lea, kake ore Raheli naa aisidai ninye. Nenyorr apa Yakobo Raheli, nejo "Kasiai iyie ilarin, oopishana pee kincho entito ino kiti Raheli."

Nejo Laban, "Enaikash tenaisho nanu ninye alang tenaisho nanu likae lee. Totona tenebo nanu." Neisiai Yakobo ilarin oopishana pee etum Raheli, kake nelioyu ninche anaa inkuti olong'I nena tenkaraki enyorrata nanyorr ninye Raheli.

Neigil Yakobo ajoki Laban, "Inchooki nanu enkitok ai amu eishunye erisha, nayieue nairagie nanu ninye."

Neipotu taa Laban iltung'ana pooki leina manyisho, neitayu osirua. Kake ore pee elotu enteipa neyau entito enye Lea, neisho ninye Yakobo, neirragie Yakobo ninye ... ore pee elotu enkakenya, nedol ajo Lea ina! Nejoki Yakobo Laban, "Kainyioo ena kintaasa? Aisiayia te nkaraki Rahelo, mme nejia? Kainyioo pee kiteleja?"

Newal Laban, "Meishiaa tolkuak lang pee eishori entito kiti meyami eton etii embotorr. Tonyuua iishu e wiki, pee kincho iyi eina kiti aigil, tenikisiai kulikae arin oopishana."

Neas Yakobo ina. Neishu ewiki pooki tenebo o Lea. Neigil taa Laban aisho ninye entito enye kiti meitaa enkitok enye. Neirragie Yakobo Raheli, nenyorru Raheli alang Lea. Neisiai Laban kulikae arin oopishana.

Ketii apa olom sapuk tialo Lea o Raheli. Keata apa Lea olom tenkaraki naa kioretet Raheli. Neata ninye Raheli olom tenkaraki naata Lea ilayiok kumok eton ninye meata ninye obo. Kake ore te siadi neewuo atum Yosefu o Benjamin. Ore Lea neata ilayiok kumok, kulo Yuda, oewuo aaku emudong o Lyahudi kumok arikok anaa olkinki Daudi, neaku emudong e Yesu Kristo. Nemayian Enkai Yakobo, neisho ilayiok tomon oare. Ore hoo netetema Laban alej Yakobo kake etamayiana Enkai ninye te karsisisho

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kaku tokitin eas iltung'ana teneyieue intokitin oleng' oleng'?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneutaki iyiook inchere keata Enkai engolon pooki?** (keata enkitoria pooki, netii shumata pooki, neata enkitoo pooki.)
 - o Eing'ura Yakobo nerikoo ninye o meshomo enkan' olenkapu lenye Laban.
 - o Eishoo ninye inkituak o nkera.

- o Neitaa Yakobo karsis hoo netonyuaa Laban alej ninye.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Ore ilo alejani neleji ninye. Ore eng'oki nemelo ake meata enasujita.
- **Kaji eiko ena atini teneiteng'en iyiook inchere keata Enkai empiris?(kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - o Etamayiana Yakobo hoo neyiolo ninye ajo etelejishe sii ninye.
 - o Nemitu neing'or ninye lelo osekin lo lenkapu lenye. Neitaa ninye karsis. Neisho ninye ilayiook kumok.
 - o Neitadou Yakobo, ilo alejani, pee eisho sii ninye meteleji.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - o Eshomo dukuya amayian Yakobo, aitaa ninye kitok, neponaa olmarei lenye, tialo inkisiligat apa naishoo Abraham, Isaka o Yakobo.
 - o Nelo dukuya arrip olmarei le Yakobo, laa ilo marei otorripo ina kisiligata o laitajeunoni oyooki alotu te ishoi enkitok.
 - o Eishoo Lea, ina nemekirotet te Yakobo ilayiok kumok, etii Yuda, laa emudona e Yesu..

KAINYIOO KINTENG'ENA ENA ATINI NAIPIRTA OLTUNG'ANI?

- o Ore Laban naa oltung'ani le makewan olaingokoni, owa pooki toki tialo Yakobo.
- o Ore ilo alejani, Yakobo, nenoto sii ninye adol ilnganayio le lejare. Ore oshi ake naa keata eng'oki inaasuju tialo tung'ani.
- o Meidim apa Yakobo aitaa kewan karsis arashu olosho kitok.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Iata iyie olmang'atinta te nkishui ino? Oltung'ani oje oata enkitoria negira aasishore ina kitoria pee kintorogony iyie? Tia oitoi kintagol iyie ena atini tiatua empolos e nena temat.
 - **Olalejani apa Yakobo, netelejaki sii ninye! Tia oitoi aekata itaasa eng'oki nikimbelekenyakino iyi eina ng'oki ino?** Ore te kulikae rorei inoto aekata oltung'ani oasita eng'oki tialo iyie teina oitoi ake nitaasie iyie eng'oki te likae tung'ani? Eimu, olmarenke? Enkurrarre? Olom? Empurrorre? Monko? Kainyioo itoning'o? kainyioo kintengen iyie tialo eng'oki? Tia oitoi kintadol ena atini inchere iyieu taa ninye olaitajeunoni egira apa Enkai ayau eimu emudong e Yakobo?
-

11. ETUPUPUNGARE YAKOBO ENKAI Enkiterunoto 32,33

Ore eidipa Yakoboa tobiko ilarin kumok tenebo ole nkapu lenye Laban, nemayiani too luat sapuki o nchoo, o nkera kumok o olaisiayiak kumok. Negelu ajo etaa erishata sidai nashuko ninye alo Kanaan, hoo neton apake eure olalasho lenye Esau, apa oteleja tialo imayianat e papai lenye.

Ore etaa ebaiki Kanaan neirriwaa Yakobo inkishoorot kumok o nchoo airriwaki Esau etem aing'oru omom te ninye eton eitu ebau. Nepuonu ilaikitalak anang'are ninye, nejoki inchere egira Esau alotu anang'are ninye erikito enjore o lewa iip ong'uan. Neureshoyu Yakobo, neomon Enkai, "Nai e papa lai Abraham, nai e papa lai Isaka, Olaitoriani laa ninye laatiaka tushukoyu enkop inyi o enetii entalipa ino, pee amayian, manarikino nanu nena pooki nikintaasa eimu enyorrata ino nauno, nikintol ajo ira oloisiligayu atoomono tasaruaki te nkaina e Esau. Aisiligata atua enkisiligata ino pee intaa eishoi ai anaa osunyai le naiposha."

Ore ake peyie ebaiki olkeju le Yordan, neirriwaa, neisho Yakobo inkituak enyena metalanga olkeju, nebik ninye openy teilo kekun loo lkeju enkewarie pooki. Ore etii ninye ine, nepupung'are oltungani Yakobo enkewarie pooki. Ore pee ekenyu, ore pee elaikino oltung'ani atanangai ninye, neibung oloudo, nepuku ninye oloudo terubata, nejo, "Inchooki mashomo, amu ekenyua." Kake nejoki Yakobo, "Maisho shomo meteleku tenikimayian nanu."

Nejoki ilo tung'ani ninye, "meitoki aekata enkarna ino aaku ekiji Yakobo, kake Israeli, amu itapupungare iyie Enkai o iltung'ana, nindimua pooki. Nejoki Yakobo, "aitoduaa Enkai king'ura too nkomomi neitajewuoki enkishui ai arashu etasaruaki enkishui ai."

Ore ake aa enalusorie Olmalaika, nedol Yakobo Esau. Neirruugo, aitadou kewan tedukuya Esau, neng'amu Esau ninye tolng'ur o tempalikinoto sii, eigira aing'asiakino eneikuna Enkai pee emayiana Yakobo. Neibalunye Yakobo eneba empiris e Nkai naishoo ninye inkera. Neisho Yakobo Esau inkishorot oo nkishu, ejoito, "ore pee adol enkomom ino natiu anaa olotodua enkomom e Nkai, neisualaki kitang'amua te nkoitoi kirotet naijo ina." Ore pee elusoo ena neitoki Yakobo o Esau aabik to sotua ilarin kumok.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Irorie sii iyie oltung'ani liboitata imaakinyie embae nataase te iyie, nimiyiolo ajo kaa ias, ninteru aureshoyu neaku meata enindim ataasa? Kaa itaasa tialo ina bae?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBQ: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneutaki iyiook inchere keata Enkai engolon pooki?** (keata enkitoria pooki, netii shumata pooki, neata enkitoo pooki.)
 - Etamayiana Yakobo aisho inkera a luat oo nkishu.
 - Eibeleyenya oltau le Yakobo, neshetu enkirukoto enye.
 - Neipang'aki Yakobo te nkoitoo oltung'ani, neitaa ninye tarrush.
 - Neibeleyenya oltau le Esau aibeleyenya Yakobo, nemitu ninye.
 - Neigil aitubul Yakobo te Kanaan Enkop e Nkisiligata.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Etiaka apa Enkai Yakobo inchere keshuku ninye ayau ninye inakop enkisiligata.
 - Etayiolo apa Enkai enetii Yakobo nelotu atumore ninye te nkoitoo oltung'ani.
 - Etayiolo enaure e Yakobo.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Eing'asie Yakobo pee edol kewan eishu hoo netoduaa enkomom e Nkai neyiolou ajo meata entoki nanare ninye mme toki.
- **Kaji eiko ena atini teneiteng'en iyiook inchere keata Enkai empiris?**(kenyorrisho, keata olong'urr tialo ilaing'okok, nenana oshoke, neton ake eirorie oltung'ani)
 - Neomon Yakobo Enkai, neitadamu kewan inchere, ore inkiasin e Nkai neing'uaa enyorrata Enkai, neisiligayu Enkai oleng' te ninye.
 - Etomituo Enkai Yakobo, neshuko ninye hoo nemenarikino apa neitaasi ninye ina.
 - Neibeleyenya Enkai oltau le Yakobo, nedol eng'oki enye makewan, neitoborr ninye ina, neiteru airishakino Enkai.
 - Neitayu Enkai Yakobo oloudo pee eitadamu ninche too rishat pooki inchere pee meirishakino ake eng'olon enye makewan kake pee eirishakino engolon e Nkai.
 - Neisho Enkai Yakobo erishata metoduaa ninye, neisho ebik eishu hoo naa olaing'okoni.
 - Neibeleyenya Enkai oltau le Esau pee etumoki atapaliki olalashe lenye.
 - Ore pee edol Yakobo enkomom e Nkai, nejeu enkishui enye, nelotu aidim atoduaa arashu aing'ura enkomom e Esau nedol te ninye empalakinoto o enyorrata. Naa enkitodolunoto apa ena e Nkai tialo olosho lenye gelunoti eimu Kristo.
- **Kaji eiko ena atini teneutaki iyiook inchere KEISILIGAYU Enkai? (meibeleyenya, keibung inkisiligat enyena, keas sii inaja)**
 - Eitabayie Enkai enkidetid e Yakobo pee eyau ninye ashuku ina kop, nerrip ninye, nemayian ninye.
 - Neiteng'el ilo ajung'oni ogeluno tialo Abraham, ilo laa olmarei lenye epukunye Olaitajeunoni oisiligishoreki inchere ore nabo olong' naa kelotu.

KAINYIOO KINTENG'ENA ENA ATINI NAIPIRTA OLTUNG'ANI?

- Neyiolou Yakobo inchere kenarikino negorokino Esau ninye amu etaasa eng'oki tialo ninye ap ate dukuya.
- Nedol Yakobo kewan inchere meidim kewan makewan, keyieu Enkai ake.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Eng'amu Enkai ilooborr o lelo oirishakino ninye. Amu etoduaa apa Yakobo empiris e Nkai, neitadou kewan te dukuya ninye.
- Eisiliga Yakobo Enkai naa ina pee eewao enetii Esau te nkitadounoto e kewan.
- Ore Enkai neasishore oltung'ani aiteru pooki toki, nelotu atumore ninye, neasisho tiatua enkishui enye pee eibeleyenya oltau lenye anaa enaikuna pee eibung' oloudo le Yakobo neirorie ninye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- **Eitashalaki apa Yakobo Enkai anaa neibung'i ninye oloudo. Neitadamua ninye ena pee eisilig Enkai. Tiakua oitoi ining iyie anaa ishal?** Kaji oshi ias iyie tenining ajo ishal? Kainyioo easita Enkai tiatua enkishui ino pee eponaa enkusiligata nisilig iyie ninye.
- **Kakua tung'ana tiatua enkishui ino itaasa eng'oki tialo ninye/niche? Aing'ae ilo onare nilo aomon empalakinoto? Kaji pasa kindim iyie atareto olkilikuai le Nkai pee itumoki atoomonu empalikinoto te ninche o te Nkai sii.**

12. YOSEF Enkiterunoto 37, 39-50

Keata apa Yakobo ilayiok tomon oare. Ore Yosef naa enkirotet tiatua ninche. Nenyor Yakobo Yosef oleng'. Ore enkolong' nabo neisho Yosef ninye olkila sidai lo imuain naapasha. Ore pee edol kulikae ayiok ajo kenyor menye Yosef oleng' alang' ninche naa keibaa Yosef oleng'. Ore pee eliki Yosef ninche inkidetidet enye enaikununo enkitoria enye te ninche neponiki enkiba enye.

Ore enkolong' nabo nelo Yosef enetii ilalashera lenyena tenebo intare. Neiyieu ilalashera near Yosef kake ore te siadi etimirakaki Yosef ilamirak oopuoito Misiri. Ore pee eidip atimir nepik osarge le nkine olkila le Yosef pee elej menye enaikununo enkeeye e Yosef etiu anaa etaara eng'wuesi olayioni lenye.

Ore te Misiri eiyang'ua Potifa Yosef metaa osinka lenye. Neisiayia Yosef Potifa esidai neyau emayanata enkang' enye kake etanang'akaki korokoroni tenkaraki elejare e nkitok e Potifa. Ata tiatua korokoroni etamayiana Enkai ninye. Neidim aibelekenya inkidetidet oo ltung'ana oopasha. Ore enkolong' nabo netum olkingi Farao enkidetidet nainyala indamunot enyena oleng'. Neipot Yosef maeu aibelekeny enkidetidet enye. Neliki Yosef ajo nepuono ilarin oopishana oo intumot sidain pee etum indaiki kumok. Nesuj sii kulo arin kulikae arin oopishana lo lameyu torrono. Neshipayu Farao oleng' neishoo Yosef eaku olkitok le Misri pooki pee erik Misiri tiatua kulo arin.

Ore pee elotu olameyu ketii sii olameyu e nkop e Kanaan, ewueji enetii Yakobo o ilayiok lenyena. Kake etoning'o ninche ajo ketii endaa Misiri tenkaraki enkipang'ata sidai e Yosef. Neirriwaa Yakob ilayiok lenye Misiri aaingóru endaa. Ore pee ebaiki Misiri, neiyolou Yosef ninche kake meyiou ninche Yosef. Tenepuonu enetii Yosef negil kung' te dukuya ninye. Ore pee elusoo erishata nedol Yosef ajo keata ilalashera lenyena osina sapuk amu etimira Yosef apa te sinkaisho neiyieu neirridu. Neing'urie ninye ninche nejoki. "Kara nanu olalashé linyi Yosef, ilo apa litimirakita enkop e Misiri. Kake ore naa taata emiureishoyu anaa igororo maate, tenkaraki nikitimirakita apa ena kop; amu Enkai apa naaiturukunye nanu maeu aitopok enkishui amu etijing'a olameyu enkop too larin oopishana. Naairriu apa Enkai ene pee aituruku ten tae, pee alotu aitajeu ilekunot ten kop naitasheyie tenkaraki intae pee meye ilkumok. Metaa mme intae apa likirriutua ene kake Enkai; naaeuo aaitaa olkitok oitore enkop pooki e Msiri."

Ore te siadi, neipoto menye Yakobo meeu Misiri tenebo olmarei pooki. Ore pee elusoo ilarin tomon oopishana neye Yakobo. Nejo ilalashera le Yosef, "Ebaiki taa neibayu iyiook Yosef neitalak iyiook enapa lap nikintaasa iyiook ninye." Metaa eirriwaitie ninche olkilikuai aairriwaki Yosef ejoki, "Tapalaki iyiook te eng'oki ang', amu kitaasa entorroni te iyie."

Kake etiaka Yosef ninche, "Emiureshoyu, katii nanu ewueji e Nkai? Ore te intae, naa entorroni apa kiyiewuakiki; kake eitaa ninye Enkai esidai, pee etum aitopuaa iltung'ana kumok anaa enatiu ena olong'. Metaa emiureshoyu; kaisho intae eretoto tenebo o nkera inyi." Neijia eikuna aitisipaki ninche neitagol ninche.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kaa rishata idamu ninoto erishata nagol nipalikinyie olikae tung'ani arashu lelo likinyialo arashu kintaas intorrok? Kainyioo doi pee eishiaa nikipaliki ilkulie tung'ana?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Etorripo Yosef.
 - Keitore iltauja loo lalashera le Yosef. Ore eneipang'a oltung'ani te ntorroni, neipang'a Enkai te sidain neasisho te nkipangata enye.
 - Eitajeu Israel to lameyu.
 - Neisho Yosef engolon pee eibelekeny inkidetidet.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Neiyiolo enkipangata o ilalashera le Yosef.
 - Neiyiolo ajo netum Josef engolon te shumata papai o lalashera lenye.
 - Neiyiolo ajo kelotu olameyu. Lasima neisho olmarei le Yakobo enkoitoi enjeunoto.
 - Neiyiolo sii enkipirta o inkidetidet.
- **Kaji eiko ena atini teneiteng'en iyiook inchere keata Enkai empiris?** (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)
 - Etajeuo olmarei le Yakobo to lameyu.
 - Etareto Yosef metapaliki ilalashera.
 - Etorripo Yosef tiatua inyamalaritin.
 - Kegira endelea pee ebayie osiligi lo Laitajeunoni olotu eima eishoi e Abraham amu eitajeu llooisraeli.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Kegira adamu Enkai osiligi lo Laitajeunoni olotu aima olmarei le Abraham. Etorripo olmarei le Abraham, Isaac, o Yakobo pee metua pooki to lameyu.
 - Neitodol Yosef enasita tiatua inkidetidet neas pooki.

KAINYIOO KINTENG'ENA ENA ATINI NAIPARTA OLTUNG'ANI?

- **Neitodol iyiook ajo ore oltung'ani naa tipat te Nkai?**
 - Etaramata Yosef oleng'.
- **Neitodol iyiook ajo ilaing'okok iltung'ana? (Ashu keishiakino pee eitame Enkai ninche?)**
 - Keibala ing'ok oo lalashera lenyena. Ewuasa Yosef sii.
 - Nikidol sii ing'ok ee enkitok e Potifa.
- **Neitodol iyiook ajo meidim oltung'ani aitajeu kewan?**
 - Meata apa Yosef enkidimata pee eitajeu kewan te sinkaisho ashu to korokoroni kake etorripo Enkai ninye.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- Keisilig Yosef Enkai tiatua enkishui enye. Keitodol enkirukoto enye tiatua enetaasa. Nesuj Olaitoriani tiatua intemat kumok. Nesilig Enkai pee eiguena ilalashera lenye. Nemeata olum.

KULIE INKIKILIKUANAT ENAIKUNUNO EMPALAKINOTO:

- **Kaji eiterunore enyamali e Yosef o lalashera lenyena? Ainyo?**

- o Olom; enkirotetisho e menye; inkidetidet naitodolua olwuasa lenye; olkila lenye sidai; enyorrata sapuk e menye; enkerai e nkitok kirotet
- **Kaji eiko pee eitame ilalashera lenyena Yosefu?**
 - o Eipangakita entorrioni ninye
 - o Etimiraki metaa orrindik
 - o Eteleja menye enaikununo enkeeye enye.
 - o Netum inyamalaritin tiatua enkaji e Potifa o tiatua korokoroni too larin kumok.
- **Kuna ninche intokitin sidai e Yosef naisho ninye metamio o metaa mepaliki ilalashera lenyena. Meishiaakino ninche pee epaliki. Neaku kaji eiko Yosef pee eidim atapaliki ninche?**
 - o Keata ilalashera lenyena osina sapuk tenkaraki einosua ninche ajo etimira Yosef apa te sinkaisho. Ore tena kata nedol Yosef osina lenye. Nedol ajo keyieu ninche neirridu. Neing'urrie Yosef ninche.
 - o Etayiolo ajo Enkai ake naasita pooki toki te nkishui enye. Neyiolo sii ajo keata Enkai enkipangata pee eitajeu enkishui o ltung'ana anaa ninye. Neyiolo sii ajo netii ninye abori olng'ur le Nkai.
 - o Keidim ninye aisiliga Enkai ata tenetii emion o engoloto atua enkishui enye.
 - o Etaasishore Enkai intemat kumok tiatua enkishui enye pee eitubulu enkirukoto enye.
 - o Tenkaraki empiris e Nkai, eitu ewuasayu kake etadouo kewan te dukuya Enkai te nkishui enye. Nedamu eneikuna pee eitajeu Enkai ninye.
 - o Kedamu Yosef olng'ur pooki le Nkai te ninye. Ore ena naa keret pee enyorrilalashera lenye te sipata nepaliki sii.
- **Tadamu enkiting'oto e nkatinin. Etiaka Yosef ilalashera lenyena, "Emiureshoyu, katii nanu ewueji e Nkai? Ore te intae, naa entorrioni apa kiyiewuakiki; kake eita ninye Enkai esidai, pee etum aitopuaa iltung'ana kumok anaa enatiu ena olong'. Metaa emiureshoyu; kaisho intae eretoto tenebo o nkera inyi." Neijia eikuna aitisipaki ninche neitagol ninche.**
 - o **Amaa ainyoo nikiteng'ena te kuna kisirat enaikununo empalakinoto?**
 - Eitodol Yosef iyiook kaji eikununo enkirukoto te nkishui ino tenikinyal likae tung'ani.
 - Keany Yosef atijing'a ERISHATA E NKAI.
 - o Eitu eitame ilalashera lenyena. Etipika ena baa te nkaik e Nkai.
 - o Nedamu sii ajo olaing'okoni sii ninye naiyieu empalakinoto.
 - Neya ninye ENDUATA e NKAI.
 - o Etodua ajo ata teneiyieu likae tung'ani nikitame, keidim Enkai ataasishore ena baa pee eas intokitin neata tipat.
 - o Meidim likae tung'ani arruoo enkishui enye amu keramatita Enkai ninye.
 - Neitodol ENYORRATA e NKAI
 - o Etayiolo Yosef ajo kenyor Enkai ninye. Neaku aidim atonyorayie kulikae tung'ana ata ilalashera lenye.
 - o Ore amu etua Yesu tenkaraki iyiook, kindim atonyorraie kulikae tung'ana.
 - **Ainyoo garama naishoo Yosef metapaliki ilalashera?**
 - o Eitu eikenaki ninche ing'ok naitaasa ninye. Eitu eitame ninche te erisoroto enaitaasa ninche ninye.
 - **Kaji eikuna empalakinoto e Yosef pee eaku emayianata te ninye o too loшон pooki?**
 - o Ore eimu empalakinoto e Yosef neitajeu Enkai olmarei le Abraham pee eitabaya enapa kisiligata naisiligie Enkai Abraham ajo kemayiani iloshon pooki tiatua ninye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aiteng'enayu.)

- **Ketii apa inkatinin naagol tiatua enkishui ino nindim atodua taata ajo eitoria Enkai kuna apa baa pee easishore intemat inono pee kiret ashu aret kulikae tung'ana?**
 - o Amaa ainyoo enyamali niata te nkishui ino nindim aisiligie Enkai?

- Tenindim atodua imbaa anaa eing'oraa Enkai imbaa, kaji eiko pee kiret tiatua inyamaritin inono? Teniruk ajo kegira aitayu esupatisho tena nyamali ikiret alo dukuya?
- **Ore Yosef naa etaanya atipika kewan te rishata e Nkai, yaani teneitore imbaa. Amaa, ketii enkoitoi naje nindim atipika kewan te rishata Enkai? Kaji inko pee irridu?**
- **Kaa emion natii enkishui ino tenkaraki likae tung'ani kake eton eitu ipaliki?**
 - o Amaa kaji eiko pee eisho Enkai iyie oing'ur lenye? Keidimayu tenikiret ena mpalakinoto pee ipaliki likae tung'ani oata esile ino? Ti aa oitoi?
 - o Amaa, teneitore Enkai pooki toki te nkishui ino, keidimayu tenikiret aisho empalakinoto? Ti aa oitoi?

13. EINOTO E MUSA I ENKISIKATA ENYE Enaidurra 1 & 2

Neye Yosefu naa ore tiatua ilarin iip ong'uan nebul olmarei le Yakobo oleng' te lalai neipoti ninche ajo olosho loo Siraeli. Neipoti sii aajo Ilhebrania... Ore teine nepuku, nebulu olaiguanani ng'ujuk leitu aekata eyiolou Yosefu. Ore pee edol ajo kumok ele osho loo Siraeli oleng', neureshoyu. Nelotu aita ninche arashu neitaa ninche isinkan. Neureishoyu ajo ebaiki nedumakino ninche Ilmisiri, neidimu ninche o meitayu enkitanapata metaari pooki ayioni naini to Siraeli te ina olong' eini ninye. Kake ore inkatoyiok o Ilhebrania neany ening' enkitanapat e Farao. Nerrip Enkai ninche neponari Ilhebrania te siana sapuk.

Netii apa olmare loo Siraeli oing'uaa olgilata le Lawi oat apa enkiti ayioni sidai. Neisudoo ninye tiatua empeut kiti neitadoiki ina peut atua olkeju le Nail. Ore Miriam, ina anashe botorr eina ayioni, neisudori pee edol enaikuna olalasho lenye kiti.

Ore teina rishata, nelotu entito olkinki le Misiri adou olkeju le Nail tenebo olchoreta lenyena, nedol ina kerai, neya ninye aita enkerai enye nedung'oki ninye enkarna ajo Musa. Nelotu Miriam enetii entito o Lkinki, neikilikan ninye "Iyieu naing'uraki enkitok o Siraeli, pee kilotu aibung'aki ena kerai?" nejoki ninye ina tito o lkinki, "Ee ing'urakaki enkitok o Siraeli naa kalak ninye maing'uraki ena kerai." Neishoori Musa ng'otonye enye meibung'a ninye. Ore pee ebulu enkerai aaku botorr, neya ng'otonye ayaki entito e Farao, neaku enkerai enye, nebul Musa te nkaji olkinki le Misiri.

Ore pee eaku Musa olee, ore nabo olong' enetii iltung'ana lenye loo Siraeli. Ore teine nedol Olmisiri earita oltung'ani loo Siraeli. Neing'orisho nemeloo likae tung'ani too nchot pooki. Near Musa Olmisiri metua, neisudoo osesen lenye. Neyiolouni ina bae, neisik musa alo aisudori torpukel.

Nedol Enkai olosilisili loo iltung'ana lenyena Isiraeli, nedamu Enkai olmumai oinos tialo Abraham, Isaka o Yakobo.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nabo, nataase embae te iyie nilaikino enias pii, kake nikiret Enkai tialo ina bae?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- Kaji eiko ena atini teneutaki iyiook inchere keata Enkai engolon pooki? (keata enkitoria pooki, netii shumata pooki, neata enkitoo pooki.)

- o Nerrip Enkai ena kerai naji Musa tialo olkinki arani, nerrip pee meimis tiatua enkare nerrip te nkojong'ani, o kulie nguesi e ntim.
 - o Nedamu Enkai enaiko pee esaru iltung'ana lenyena tialo rindikisho. Neiterunye apa ena kipankata pee egeluni Musa tolgilata loo Lawi.
 - o Nerikoo entito e Farao meshomo aitukuo to lkeju le Nail ina kata etii Musa ine wueji pee etumoki aitajeu ninye.
 - o Ore hoo apa neyiolo ena tito e Farao ajo enoo Isiraeli ena kerai, nerikoo Enkai ninye metaramata ninye, kake pee mearr ninye.
 - o Nepik Musa atua manyisho e Farao pee etumoki ataretu Musa te siadi ayeu atigilunore Farao.
 - o Nerreten olkitamanyunoto le Farao peyie etum enkiteng'ena arashu enkisuma sidai, kake neisho ninye Musa meitubulu ng'otonye enye pee ebulu aa o loo Siraeli ake.
 - o Neirriwaa Musa meshomo olupurkel pee etumoki aterretena ninye pee elo arik iltung'ana le Nkai.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - o Etayiolo inchere Enkai, ore enkoitoti nasarunye iltung'ana lenyena te Musa, neyiolo sii apa enaiko, pee eitajeu ninye Musa.
 - o Neyiolou inkipankat e ntito e Farao elotu aitukuo te rishare naje.
 - o Neyiolo inchere keata apa ena kerai tipat, neyieu erripoto, neyieu sii enkisuma sidai.
 - o Neyiolo Enkai inchere keyieu apa Musa ina rishata torpurkel pee etumoki aterretena ninye pee elotu aitorik iltung'ana lenyena.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Etoorie Musa olosho loo ilmisi lemeata enkirukoto terishat sidai.
 - o Kegira apa Enkai aasisho pee eoru iltung'ana lenyena too le Misiri.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - o Neretu Enkai olmarei le Musa pee etumoki atorrip ina kerai enye tiatua ilapaitin okuni, eton eitu epiki atua ilo keju.
 - o Nerikoo ina tito e Farao hoo neyiolo ninye ajo enoo Isiraeli ina kerai, pee eramat ninye, kake pee mearr ninye.
 - o Neigil ake arrip Musa, eidipa Musa atesesekuana Olmisiri (oltung'ani loo Ilmisiri)
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - o Neitaa Isiraeli olosho kitok.
 - o Nelo Enkai dukuya aibung' enkisiligata enye pee eitajeu iltung'ana lenyena te Misiri. Eisiligie apa Abraham te dukuya, tenebo o Yakobo inchere kekordu kenya iltung'ana lenyena te sinkaisho tenelusoo ilarin iip ong'uan.
 - o Etaa Enkai oloisiligayu pee errip nemitu Isiraeli hoo neata apa Farao imbaa enkarueisho.
 - o Eisiligie apa Enkai Abraham inchere keitaa eishoi enye kumok, neibung' Enkai ina kisiligata hoo neatai rrindikisho sapuk.

KAINYIOO KINTENG'ENA ENA ATINI NAIPIRTA OLTUNG'ANI?

- **Tia oitoti eitodolu ena atini inchere keata oltung'ani tipat te Nkai?**
 - o Etorripo Enkai Musa tenebo o losho loo Siraeli hoo netii apa olosilisili.
- **Tia oitoti eitodolu ena atini inchere ore oltung'ani naa olaing'okoni nenarikino enkitamioto tialo ng'ok enyena?**
 - o Ore ile Misiri nedamu ine nkarrueisho too losho loo Siraeli, neisilisil ninche, enyok amut inkera enye.
 - o Ore Musa te ng'oro enye, nesesequan oltung'ani (neaku olarani) makewan nyenyok aisudoo.

- **Tia oitoi eitodol iyiook ena atini inchere keyieuo oltung'ani Enkai, nemeidim aitajeu kewan.**
 - o Etonyuaa olmarei le Musa aitajeu ninye, kake eetuo alaikino te siadi. Neishoru Enkai enkoitoi.
 - o Ore Musa nenyok ajo aretu olosho lenye pee esesekuan olkitok le rrindikisho kake nebatata sii ninye. Ore enyuata enye neaku pesho.
 - o Ore iltung'ana apa pooki otii atua eararoto, nelaikino sii ninche ataas toki.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- o Atua inkaik e Nkai ake, amu meidim oltung'ani aitajeu kewan. Lasima pee esuj oltung'ani enkipankata e Enkai ake.
- o Eisiliga ninye ng'otonye Musa Enkai metaasa Enkai eyieunoto enye te nkerai enye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- o Amaa anaa nayiolou inchere ira olaing'okoni nimiindim sii aitajeu kewan, tia oitoi ing'orua eretoto e Nkai? Amaa teneton eitu ishukokino ninye, kakua roruat tiatua enkishui ino iindim aawa tenakata?

14. ENKIPOTOTO E MUSA TO SANAG OLYUPUYUP

Enaidurra 3-4

Ore pee eeye Yosef, netumi likae kinki te Misiri lemeyiolo Yosef. Naa keure Israeli neitaa ninche irrindiki. Neitayu enkitanapata nchere ore pooki ayioni naaini tiatua Israeli neari metua. Neisudoo olmarei obo loo Lawi enkerai enye ayioni tiatua enkipapu nepik ninye atua olkeju le Nail. Netum enkyioni entito olkinki neitubulu ninye anaa enkerai enye. Nebulu Musa tiatua enkaji o lkinki. Kake ore enkolong' nabo near metua oltung'ani loo Lmisiri oorit apa oltung'ani loo Sraeli. Neisik Musa alo olupurkel.

Ore apa Musa naa o loo larin artam pee eisik te Misiri. Nebik to lpurkel kulikae arin artam neyam Zippora, entito o lapolosani Yethro le Midian.

Ore enkolong' nabo, egira Musa airrita intare o laputani lenye te mbata Oldoinyo le Sinai. Neipang'aki ninye olmalaika lo Laitoriani te nkima esanag naiyupuyup. Kake nedol Musa enkima te sanag kake menya ninye. Neing'asia ninye Musa nenyikaki alo aing'or. Neipot Olaitoriani ninye tiatua ina sanag nejo, "Musa, Musa!"

Newaliki Musa ajo, "Nele nanu."

Nejoki Enkai, "Milotu anyiku. Intayu namuka amu aisinyati ene nintasheyie." Nejoki, "Ara nanu Enkai e papai lino Abraham o Enkai e Isak o Enkai e Yakobo." Ore pee ening' ina, neisudoo Musa enkomom enye amu meitiu aing'ura Enkai.

Nejoki Olaitoriani Musa, "Atodua osina loo ltung'ana laainei o sinkaisho tiatua enkop e Misiri. Kayieu naitajeu ninche nayau ninche enkop enkisiligata. Kaairriwa iyie. Shomo enetii Farao, olkinki le Misiri, pee intayu iltungana lainei le Israel aitung'uaa Misiri."

Kake nejoki Musa Olaitoriani, "Amaa kara nanu ng'ae olo enetii Farao aitayu iltung'ana lo Israeli aitung'uaa Misiri?"

Nejoki Enkai Musa, "Atii nanu tenebo iyie. Naa keaku ena olmonekie te iyie pee aaitodol ajo nanu laairriwaa: ore pee intayu iltung'ana aitung'uaa enkop e Misiri nikiserememe nanu tele doinyo."

Nejoki Musa Olaitoriani, "Amaa tenalo enetii iltung'ana loo Siraeli naajoki ninche, 'Enkai e papai linyi naairriwua nanu' naaikilikuan ninche aajoki, 'Keijiaa enkarna enye?' Kaa ajoki ninche?"

Nejoki Enkai Musa, "ARA NANU ILO ORA." Naa ena tiaki ninche. "KARA NANU laairriwua nanu enitii."

Kake nejo Musa, "Kake o tenemaairuk nanu?"

Neibung'ita Musa eng'udi te nkaina enye. Nejoki Enkai ninye, "Irragie ina ng'udi ten kop." Neiko Musa neijia neaku eng'udi olasurai! Nejoki Enkai ninye, "Tudumu imbung'a olkidong'oi." Neibung' Musa neitoki aaku eng'udi. Nejoki Enkai ninye, "Tipika enkaina ino atua olkila. Ore pee eitayu neibung'a enkeeya oo lbolot. Kake ore pee eitoki ashukoki atua olkila neishiuu. Nejoki Enkai ninye, "Pee intodol ninche kuna kitoduat pee eiruk nchere Olaitoriani, Enkai oo loo papai lenye linkimpang'aka iyie."

Nenyorra Musa neshuko alo enkop e Misiri.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nitoning' o tiatua oltau lino enkitoo e Nkai arashu esinyatisho enye? Kainyioo itoning' o tiatua kewan?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI?

- **Kaji eiko ena atini teneitodolua ajo keeta Enkai engolon sapuk? (keata enkitoria, enkidimata)**
 - Eipangua anaa ilng'ejepa le nkima kake eitu emut ina sanag.
 - Ilmonek le nking'asia. Neaku eng'udi olasurai. Neibung' enkeeya oolbolot enkaina.
 - Engolon meitanap Musa o Isiraeli. Lasima Musa neas enetejo.
 - Ore enkarna enye, "Ara Nanu Ilo Ora," neliki iyiook ina nchere meyieu Enkai likae tung'ani. Ketii te mpukunoto enye makewan netii apa ake, netii teshumata pooki toki.
- **Kaji eiko teneitodolu ena atini nchere keyiolo Enkai pooki toki?**
 - Keyiolo enpukunoto oo ltung'ana lenyena ten kop e Misiri.
 - Etayiolo Musa ajo keaku olarikoni le tipat ata apa eton aa enkerai. Nerreten ninye tiatua enkaji olkingi o tolpurkel.
 - Keyiolo enaiko pee erreten pee ekordu Isiraeli.
 - Keyiolo aajo keitoki Isiraeli aashuko aaserem ninye to ldoinyo le Sinai.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Eipang'aka Enkai Musa anaa enkima.
 - Nejo Enkai, "Minyiku. Ntayu inamuka. Aisinyati ine nintasheyie."
 - Ore enkarna enye, "Ara nanu ilo ora," keliki iyiook nchere ketii shumata aisul nmeibung'are lelo oas ing'ok.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - Nedol osina loo ltung'ana. Nerreten pee eitajeu, nerik enkop e nkisiligata.
 - Neirorie Musa.
 - Neipangaki Musa, neitu epej ninye ata enkaraki entorrone enye.
 - Neasishore oltung'ani torrone anaa Musa pee eas eyieunoto enye.
 - Nerreten pee eitajeu Isiraeli pee eibung enkisiligata pee emayian iloshon pooki eimu ninche. Nerrip Musa nemeye tenkop e Misiri.
 - Negolie Musa tenkaraki olasurai nedumu.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Nerreten pee eitajeu Isiraeli neibuus enkisiligata pee emayian iloshon pooki eimu ninche, neitu eisho meidaate misiri.
 - Nejo keshukunye pee apuonu aaserem to ldoinyo le Sinai.
 - Enkisiligata nchere keaku tenebo Musa.
 - Neng'iri tenkaraki orng'ash le Musa. Kake eitu eidaikie tenkaraki ina neimeiruk.

KAINYIOO KINTENG'ENA ENA ATINI NAIPARTA OLTUNG'ANI?

- Kegolie lelo gelunot lenyenak. Nerreten pee ekordu ninche.
- Nerreten pee eitajeu nemayian.

- o Keishiakino neitayu Musa inamuka enyenak neitashe tenelakua tenkaraki me sinyati iltung'ani.
- o Eitu eidim aitajeu ate iltung'anak loo Siraeli tiatua sinkaisho.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- o Aitajeu teyienoto Enkai ake o enkipang'ata enye.
- o Nelo Musa enetii Enkai terisoroto enkitanapata naitanapaki.
- o Etayiolo apa Musa nchere olaing'okoni ninye oitashe tiatua entii e Nkai ina ai sinyati. Neisudoo enkomom enye. Neiruk. Neirridu.
- o Neipotu Enkai enkirukoto eing'uaa Musa pee eidim ayanyita ina kipototo Enkai natii engoloto tiatua enkishui enye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- o Tenidamu inkitanapat Enkai, amaa kebaa enkanyit ino? Keidimayu tenimbung' inkitanapat aitobiraki? Kaji eiko nena kitanapat tenikiret pee idol esinyatisho Enkai? Kaji eiko tenikiret pee idol ing'ok inono makewan?
- o Kainyoo engoloto ashu inkisilililot nigira aimaa oshi taata? Naa keidimanyu neata entoki nagira Enkai aitobir te iyie? Naa kaji eikununo tenisilig Enkai tiatua enkishui ino tena bae?
- o Kainyoo indim airuko nchere ekigira Enkai aipot pee ias aashu pee iruk? Ainyo pee kegol teniruk tena bae? Naa kaji eikunono pee indim aisiliga tena bae tiatua enkishui ino?

15. ILMEITA LE DUKUYA OUDO TENKOP E MISIRI Enaidurra 7-11

Ore ake peyie epuonu Musa o lalashe lenye Aaron atumuro ilpayiani kituak loo Siraeli nepuo enetii Farao, nejoki “Etejo Enkai O Siraeli inji, ‘Inchoo iltung’ana lainei epuo pee aitobiraki osirua.”

Nejoki Farao ninche “kaing’ae Olaitoriani? Mayiolo nanu ninye, nemaisho sii ninche meshomo. Kainyioo pee iyaya iltung’ana aitung’uaa esiai enye? Enchom!” negoro Farao neitoki aitagol esiai enye. Neishiraki ninche Musa.

Neomon Musa Enkai, nejoki Enkai ninye “Shomo tiaki Isiraeli, ‘Atoning’o olkiyioi linyi naa kaitajeu intae te kulo Misiri. Kaitaa intae iltung’ana lainei naa kayau intae ina kop apa naisiligie Abraham, O Isaka tenebo Yakobo.” Neigil Musa o Aaron ashukokino Farao, neiteru taa imbaa aasa tialo olaiguanani le Misiri o Enkai O Siraeli. Ore enedukuya neng’as ninye Aaron aitodolu olmonokie aibelekeny eng’udi metan olasurai kake eitu eiruk Farao, neany eisho nena kera o Siraeli epuo. Neiterunye taa ilmeita. Neitorioo Musa enkaina enye te shumata nkariak e Misiri newal inkariak natii ilkejek, ilturot, inong’ot, mugarri, olchorroi neaku pooki osarge. Ore inkariak natii atua ioketa oo nkeek o ioketa o soito neaku osarge. Ore isinkirr pooki otii olkeju neye nenguoyi olkejuk – neitagol Enkai ottau le Farao.

Neitoki Enkai airriu olmeitai loo nduani e nkare enkop pooki neigil Farao aipotu Musa. “Toomono Enkai meiwuangi kuna tuain, naa kaisho intae ipuopuo.” Neas Musa ina. Kake neibekanya Farao.

Neigil Aaron ailepie eng’udi enye, ore enterit pooki e Misiri neala aaku enkojong’ani. Ore looti ang’eni otaasa kulikae bulabul, kake nelaikino ataas nena, Nejo “ilang’eni Olkimojino le Nkai ele!” kake eitu ake ening Farao.

Neirriu Enkai kulikae meita tialo ile Misiri kake eitu eshoroo inkera oo Siraeli pooki (ore ilojong’a, enkeeya o nkishu, ildututa, enchan o soito, olmaati enaimin) ore te pooki rishata nejo ake Farao “Ayia” ore pee elotu olmeitai, kake nemetiki eisho Isiraeli epuo tenelusoo olmetai.

Nejoki taa Enkai Musa “Aitagolo oltau le Farao pee atumoki aitamio ninche tenkaraki inkaitin enye. Agira aas kulo moniek pee iliki inkera inono o noo nkakuyia inono, niyiolou sii ajo ara Olaitoriani. Kayieu nayau likae meitai obo, naa kelo Farao araa intae pii.”

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kainyioo oshi naitagol iltauja lang’ tialo Enkai? Kaji inkutiti ng’ok pee erikoki iyiook mataas isapuki?

ENKATINI: Toliki enkatini ningiligili tenebo anaa olturrur pee eviolo pooki ng’ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneitodolua ajo keata Enkai engolon sapuk? (keata enkitoria, enkidimata)**
 - Eing'oru enkipirta pee eitodol enkitoo enye Ilmisiri, o losho sii loo Siraeli.
 - Keata eng'olon te shumata pooki naitobira. Eyau ilmeita pooki. (impoto moo obo. Moo obo ore kulo meita neitodolu inkaitin Olmisiri, neitodolu inchere Enkai nabo ake eatae nasipa, kake mesipa inkulie pooki.
 - Neitare oltau le Farao neitagol ninye anaa enayieu.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Neyiolou oltau le Farao, neyiolou eneitaas, neyiolou enaiko ilo tau pee elotu aisho Enkai enkitoo te pooki.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Keibaa apa inkaitin Olmisiri. Neitame sii Farao o Lmisiri.
 - Keiyau ing'ok enkeeya Misiri tenebo kulie meita.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata oling'urr tialo ilaing'okok, nenana oshoke, neton ake eirorie oltung'ani)**
 - Neitajeu Isiraeli, hoo naa ilaing'ok sii ninche.
 - Neirorie olosho loo Siraeli eimu Musa.
 - Neisho ile Misiri irishat kumok meirridu arashu nairridunye.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Nelo Enkai dukuya aibung enkisiligata enye nayaunye Olaitajeunoni enkop eimunye olosho loo Siraeli.
 - Neibung'ita sii enkisiligata enye pee eyau eishoi e Abrahamu aitung'uaa sinkaisho etulusoitie ilarin iip ong'uan, neitupuko ninche te sinkaisho neisho karsisisho.
 - Neibung'ita sii enkisiligata enye te Musa pee easishore ninye aitajeu iltung'ana lenyena.

KAINYIOO KINTENG'ENA ENA ATINI NAIPIRTA OLTUNG'ANI?

- Olaing'okoni oltung'ani negol lukunya. Kegol apa elukunya e Farao. Naserem ile Misiri inkaitin.
- **Amaa, kakua kitanyaanyukot eserem iltung'ana taata?**
 - Ore nena kitanyaanyukot taata, naa keidimayu naa mme nena tokitin nalioo naitobiruni. Kake ore enkitanyaanyukoto naa inatoki nipik osiligi lino alang' enisilig Kristo. Anaa enkisuma, iropiyiani, enkarna sidai, erikore nitii, enchipai, emboita te rruat! Ore ilairukok neata sii ninche inkitanyaanyukot tiatua enkishui enye, naa keiwuangle sii ninche aitalam Enkai nasipa.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aitung'enayu.)

- **Kainyioo taata enkitanyaanyukoto natii atua enkishui ino?** Kaji eiko ena kitanyaanyukoto tenikimbooyo pee misilig Enkai?
- Etorripo Enkai olosho loo Siraeli tialo lelo meita otumuta Ilmisiri. Kaji eiko tening'iri aisilig enkipankata e Nkai o erripoto enye tiatua enkishui ino pee kincho tobiko tenkishui naata enkipirta, neata tipat? Tia oitoi nabo kigira iyie Enkai ajoki pee isilig tengiriata ninye tenyikakinoto?

16. ENGIROROTO Enaidurra 7-12

Ore pee eidip Enkai arriu imleita naudo, nejoki Enkai Musa, "Aitagolo oltau le Farao pee aitame Ilmisiri too nkaitin enye. Aasita kuna kitoduat pee ilikiki inkera oo inkera oo loo kakuyia linyi pee iyiolou nchere ara nanu Olaitoriani.

Naa kairriu likae meitai obo neisho intae Farao impang'ipang'a tena kop. Entoning'u entobiraki. Ore pooki marei neitayu olkuo obo le kerr aashu ole kine lemeata entibili lo lari obo neiyieng' eton eitu emisimisu. Neitadoiki hysopo atua osarge neisuaki intaloishin e kutuk aji. Ninyianya inkiri naatapejoki te nebo imukateni neitu eisuijieki ninyiaya sii mbenek naadua. Nitonini tiatua inkajijik too lmonokie loo sarge o mekenyu. Enosa entasioki inchoipitoto inkilani inyi.

Amu kaim atua enkop e Misiri naar metuata ilkikaunot pookin pee aitame Ilmisiri tenkaraki inkaitin enye. Kake ore pee adol osarge too intaloishin e kutuk aji naa kalo agiroo intae. Nimbang'ubung'u aita osirua lo Laitoriani tiatua eishoritin inyi pooki te pooki ari. Ore eikilikuan intae inkera inyi nchere 'Kainyoo tipat e ina?' entoliki ninche nchere, "Tena olong' apa, eitayu iyiook Olaitoriani aitung'uaa sinkaisho ten kop e Misiri."

Neas Isiraeli anaa enaitanapa Olaitoriani ninche. Ore te mpolos enkewarie nelo Olaitoriani aim atua Misiri near pooki kikaunot te pooki aji o metabaiki olkikau le Farao. Kake ore pee edol Enkai osarge lo lkuo le kerr too nkutukie oo nkajijik oo inkera oo Isiraeli, negiroo ninche. Neton apa kewarie pee eipot Farao Musa tenebo o Haron. Nejoki, "Ewaita pooki toki inyi. Enchom!" Ore iltung'ana le latia loo Lmisiri nejo, "Ee, enchom pee mikiiye." Neisho sii ninche inkarsisisho anaa sahabu o enkosholai o masaa anaa enatiaka Olaitoriani Musa o Abraham apa. Ore ina olong', nekordu Enkai iltung'ana lenyenak tenkop e Misiri.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kainyoo eton idamu apa ninteng'ene naipirta enkitisipata tenkatini e Abrahamu.

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI?

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
 - Enkidimata te shumata pooki toki eyau ilmeita. Ore pooki meitai neata engolon alang' inkaitin pooki neimeishu. Nerrip Enkai Isiraeli.
 - Eirriua olmalaika le keeya. Keata engolon nearie metuata lelo ooyieu. Neata engolon nagirorie lelo pooki ooyieu negiroo.
- **Kaji eiko teneitodolu ena atini nchere keyiolo Enkai pooki toki?**
 - Etayiolo oltau le Farao. Neyiolo sii ajo kaa eyieu neas. Neyiolo ajo kaji eiko pee eishori enkisisa te pooki bae.

- **Kaji eiko teneitodolu ena atini nchere eisinyati Enkai?**
 - Keiba eloloito o Lmisiri, neitame Farao. Neyau ing'ok keeya.
 - Ore olkuo le ker naa olemeeta entioto. Nemeeta oltibili anaa enetejo Enkai. Naa ina enkoitoi enjeunoto – Enkai ake.
 - Keibukori osarge. Neishoruni toki te rishata ilaing'okok loo Siraeli.

- **Kaji eiko ena atini teneiteng'en iyiook inchere keata Enkai empiris?** (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)
 - Eitajeuo Isiraeli hoo naa ilaing'okok. Neisudori tioriong' osarge lo lkuo le kerr.
 - Neirorie Isiraeli eimu Musa, neisho Ilmisiri irishat kumok pee eirridu kake eitu eas.

- **Kaji eiko ena atini teneutaki iyiook inchere KEISILIGAYU Enkai? (meibelegenya, keibung inkisiligat enyena, keas sii inaajo)**
 - Eibung'a inkisiligat enyenak eimu Abraham o Musa neitayu eishoi enye aitung'uaa sinkaisho tiatua ilarin iip oong'uan.
 - Neibung' inkisiligat enyenak pee eitajeu lelo oti tioriong' ilo sarge. Neyau Oalitajeunoni lo lkuo leker eimu Isiraeli.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- Ore oltung'ani naa olaing'okoni. Negol elukunya Farao. Naserem Ilmisiri kulie aitin.
- Meidim oltung'ani aitajeu kewan. Meidim olosho loo Siraeli aaitajeu ilkikaunot lenye terishata olmalaika le keeya.
- Keidim ake oltung'ani aeu enetii Enkai tenelotu tiatua enkoitoi enye. Keeta apa enkirukoto netoni tiatua inkajjik.
- Ore anaa enoipo osarge lo lkuo le kerr Isiraeli, eitoipo sii ninye iyiook osarge le Yesu.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aitung'enayu.)

- Kaji oshi inko tenijo aitobiraki kewan enkoitoi esupatisho? Tiatua inkiasin sidain? Aapaashare ing'ok? Itemita aitobiraki kewan esupatisho ae oitoi alang' tenisilig osarge le Yesu?
- Kaji inko tenisuj inkitanyaanyukot tiatua enkishui ino anaa apa enaasita Ilmisiri? Kainyoo nikipigira amitiki isuj Enkai? Naa kainyoo igira apik osiligi lino aitalang' Yesu?

17. ELANG'ATA ENAIPOSHA NANYOKIE

Enaidurra 14

Ore pee eidip Enkai atokordu Isiraeli tenkop e Misiri, nerikoo ninche te nkatampoi eng'ape te dama, nerikoo te nkatapampoi enkima te nkewarie. Eitu erikoo ninche aitorioki enkop e Kanaan, kake nerikoo ninche to lpurkel tembata enaiposha nanyokie. Nejo Enkai, "Kedamu Farao ajo kelaikino Isiraeli aashom. Nesujaa Farao ninche, kake katum enkitoo makewan eimu Farao o enjore enye. Neiyiolou Ilmisiri nchere ara nanu Olaitoriani."

Ore pee eyiolou Farao ajo eshomoita ninche, nejo, "Kainyoo kitaasa? Kinchoo irrindiki lang' epuo pesho!" Neya ingarin oo mbartan o njore enye nesujaa ninche iltung'ana loo Siraeli, neinepu ninche tembata enaiposha nanyokie. Nelaikino Isiraeli aaisika.

Ore pee edol iltung'ana loo Siraeli Ilmisiri etinyikutua neureishoyu oleng'. Nejoki Musa, "Musa, ainyoo pee iyaua iyiook olpurkel mayetu aidaaya. Amu enaikash apa te iyiook tenikisiai Emisiri alang' tenkieve to lpurkel!" Nejoki Musa iltung'ana, "Emiureishoyu. Entashoito katukul metii orng'ash pee idolidolo enjeunoto Olaitoriani. Amu ore kulo Misiri lidolitata taata mintokiki aikata aadol. Amu kejing' Olaitoriani olarrabal tenkaraki intae metaa entirring'ata."

Nejoki Olaitoriani Musa, "Tudumu ilepie eng'udi ino nintorioo enkaina ino te shumata enaiposha toosho, pee etum iltung'ana loo Siraeli aashom tenkop natoyio te mpolos e naiposha. Neitashe enkatampoi eng'ape te rishata enye o Lmisiri. Neitorio Musa enkaina enye te shumata enaiposha neor Olaitoriani Enaiposha Nanyokie nepuku enkop natoyio. Nepuo iltung'ana loo Siraeli aaim enkop natoyio etii esunta e nkare te tatene o te kedienye.

Nesujaa ninche Ilmisiri tiatua enkotoi natoyio. Ore tadekenya enasirie neisirng'ang'ie Olaitoriani enjore oo Lmisiri, aun nkejek oo ngarrin enye metupurpurro te lototo; nejo Ilmisiri, "Emaisika te dukuya Iloosiraeli; amu kemitu ninche Olaitoriani aing'arraki Ilmisiri."

Neitoki Olaitoriani ajoki Musa, "Ntorioi enkaina ino te shumata enaiposha, pee eshukunye enkare shumata Ilmisiri, o shumata ingarrin enye oo mbartan. Neas neijia. Neshukunye inkariak neimisie ingarrin oo mbartan o ina jore pooki e Farao; eitu ninye eleku obo lenye.

Neiko neijia Olaitoriani aitajeu Isiraeli ina olong' too nkaik oo Lmisiri; nedol Isiraeli Ilmisiri etuata te mbata e naiposha. Nedol Isiraeli esiaai sapuk naitaasa Olaitoriani Ilmisiri, neureyu iltung'ana Olaitoriani; neiruk ninche Olaitoriani olaisiaayiani lenye Musa.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Inoto aekuta erishata nikitarrishoki igira ajo aisik? Kaji inkuna pee isika?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
 - Eitobira Enkai neyau eng'ape enkatampoi tenkoitai enkima. Keitore Enkai osiwuo olkutati neor enaiposha nanyokie.
 - Neisho Ilmisiri metusuja Isiraeli. Neisho ninche meisirng'angeta neirosu inkejek oo ngarin enye.
- **Kaji eiko teneitodolu ena atini nchere keyiolo Enkai pooki toki?**
 - Keyiolo Enkai ajo kainyoo naasa tiatua Ilmisiri amu kesujaa ninche Isiraeli kake kemuti ninche pooki.
- **Kaji eiko ena atini teneiteng'en iyiook inchere keata Enkai empiris?** (kenyorrisho, keata olng'urr tialo ilaing'okok, nenana oshoke, neton ake eirorie oltung'ani)
 - Ore apa Isiraeli naa ilaing'okok neata ilng'ashi tedukuya Enaki. Kake eitajeuo Enkai ninche hata hoo tenemeidim aataret ate.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Kenkisiligata apa naishoo Olaitoriani Abraham pee etaa ninye olosho kitok naisho metijing'a enkop e Kanaan?
 - Keina nayaua Enkai Olaitajeunoni eimu enkisiligata naaishoo iloshon pooki metamayiani.
 - Nejo Enkai ekejing'oloshoo Loo Siraeli tiatua sinkaisho tiatua ilarin iip ong'uan kake ekaitoki arrinyu ninche.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Ore enjueunoto naa Enkai ake naishooyo nchere "Entasheito ake intae naa aitolidolo enkordunoto o Laitoriani."
- Keishiakino ake nikintirring'a. Nikimbung' enkirukoto. Nikipal olong'unyung'unyi. Nikintagol iseseni o ltauja lang'.
- Keishiakino nikiureu Olaitoriani nchere pee kiata enkanyit. Nikimbung' esinyatisho nikiserem.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kakua rishat ing'unyung'unyaki Enkai neaku imiruk ajo eikinyor ninye? Kakua rishat oshi idol imayianat Enkai kake nikirikino tenkiti rishata? Kakua rishat oshi ing'unyung'unyaki Enkai tenitum ingolikinot tiatua enkishui ino?
- Ebaiki ore ina bae naa erishata naaishiakino tenisilig Enkai. Kaji inko pee intirring'a nianyu Olaitoriani metijing' olarrabal lino?

18. OLDOINYO le SINAI o INKITANAPAT TOMON Enaidurra 19, 20, 24, 33, 34

Ore pee elusoo ilapaitin aare pee epuku iltung'ana loo Siraeli te Misiri neun ilng'oborri te dukuya o Ldoinyo le Sinai. Neilep Musa alo oldoinyo, nejoki Enkai ninye, "Tiaki inkera oo Siraeli, 'Itoduaa intae maate enaikuna pee aitajeuo intae aitung'uaa enkop e Misiri. Tenikianyititi intae katukul nimbung'ubung'u olning'o lai lo sotua, ore tiatua iloshon pooki niakuku intae iltung'ana laainei le tipat, enkitoria oo lapolosak o losho sinyati." Ore pee ejoki Musa ninche nejija, nejo ninche, "Aikias pooki tooki natiaka iyiook Olaitoriani."

Nejoki Olaitoriani Musa, "Tiaki iltung'ana meitisinya ate tiatua inkolong'i are amu kalotu te nkolong' euni. Mincho oltung'ani hoo obo meibung'a oldoinyo ashu eye amu eisinyati ine." Ore te nkolong' euni, nedou enkatampoi nairrusha shumata oldoinyo tenebo o nkiwuang'at o ndarat, nepuku oltoilo laiyo ole intarumpeta. Neikirikira oldoinyo. Neikirikira sii iltung'ana te nkuretisho. Neilep Musa alo oldoinyo neisho Enkai ninye inkitanapat tomon. Nejo:

Kara nanu Olaitoriani Enkai ino laaitayio aitung'uaa sinkaisho. 1. Miata kulie aitin te dukuya nanu. 2. Mintobiraki kewan ae kitanyaanyukoto nimiserem ninye amu kara nanu Enkai olom. 3. Mimpot enkarna Olaitoriani Enkai ino pesho. 4. Tadamu enkolong' e Sabato intisinya. 5. Iyanyita minyi o ng'utunyi. 6. Miar metua. 7. Miloloito. 8. Mipurisho. 9. Minteeniki ole latia ino elejare. 10. Mingu'arr entoki ole latia ino.

Neikirikira iltung'ana pooki. Nejoki Musa, "Musa, irorie iyie iyiook amu aikining'. Kake inchoo metaa me Enkai nairorie iyiook mikiye." Nejoki Musa, "Miureishoyuyu. Keyieu Enkai niureyuyu ninye pee miasiasa ing'ok." Neishoru Olaitoriani kulie kitanapat pee erikoo ninche anaa olosho loo Siraeli.

Ore te nkolong' nasujita ina, neshet Musa olperere neitayu olasar lo sarge nejo, "Osarge ele lo lning'o oitobira Olaitoriani tenkaraki intae." Nejo ninche, "Ekias pooki toki anaa enetejo Olaitoriani." Neitoki ailep Musa tenebo o Yoshua enchumata oldoinyo, neisho Enkai Musa isoito aare dapashi tenebo inkitanapat naaigero Enkai to lkimojino lenye.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kainyioo enkipirta oo nkitanapat telulung'ata?
- Kainyioo enkipirta oo nkitanapat e Nkai?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
 - o Eikirikire oldoinyo nelotu empuruo, oldarat, o nkiwuang'at. Nepuku oltoilo. Keata Enkai engolon alang' pooki toki naitobira.

- o Eishorua Enkai inkitanapat amu Olitobirani neitore ninche. Neata neanyit Enkai tenkaraki engolon enye.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Lasima iltung'ana eitisiny ate pee eidim aitasho tedukuya Enkai. Naa teneibung'oldoinyo neye. Neitoip enkatampoi e nchumata oldoinyo.
 - o Ore to Lning'o Musana neitodolu ilasarri nchere 1) eisinyati Enkai, 2) ekira ilasak loo ng'ok, 3) imikiindim aitajeuo ate, 4) ekiiyieu toki terishata osarge.
 - o Entii e Nkai - Nedou enkatampoi nairrusha shumata oldoinyo tenebo o nkiwuang'at o ndarat, nepuku oltoilo laijo ole intarumpeta. Neikirikira oldoinyo. Neikirikira sii iltung'ana te nkuretisho.
 - o Ore pee eishoo Olaitoriani iltung'ana lenye inkitanapat naa keitodol nchere ketii intokitin sidai netii sii intokitin torrok. Enkai ake nayiolo empaashata.
 - o Neisho inkitanapat metareto iltung'ana pee meas ing'ok. Keiba Enkai ing'ok.
 - o Neyieu Isiraeli aing'uaa kulikae loшон pee mejing' ing'ok enyena nemeserem inkaitin enyenak.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - o Eikoo Enkai ninche pee meibung' oldoinyo aashu eye.
 - o Nelotu ninye airorie iyiook.
 - o Neliki ninche enaiko pee ebik tiatua imayianat.
 - o Amu kegol enkimbung'ata oo nkitanapat, keitodolu nchere ekiiyieu Olaitajeunoni oitajeu iyiook tiatua ing'ok ang'.
 - o Eisiligie Enkai ninche nchere keitaa ninche imasaa o ltung'ana lenyena.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - o Neitoki ashuku Musa Oldoinyo le Sinai. Neitabaya enkisiligata esanag nayupuyup nekordu ninche tiatua Misiri neshuku sii.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Meiwuang'ie inkitanapat ing'ok tiatua iltauja lang'. Enkanyit oo nkitanapat naa enkoitoo naitodol iyiook enkirukoto ang'.
- Ore nkuretisho oo ltung'ana neitodolu enchalan ang' eneba terishata ang' o Enkai. Neitodolu ina nchere meidim aibung'a inkitanapat aitobiraki neishiakino ninche ekitamioto tenkaraki ing'ok enye. Meidim oltung'ani aitajeu kewan. Nemeidim aibung'a inkitanapat pooki. Kake ekiiyieu ninche pee erikoo iyiook.
- Keiyieu oltung'ani esinyatisho pee eidim aitasho te dukuya Enkai. Keloto ake oltung'ani enetii Enkai te nkoitoo o lasar. Meidim apa iltung'ana aaitajeu ate tenkaraki enkibung'ata oo nkitanapat. Eton ake eyieu osarge tenkaraki erishata enye'.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kegil iltung'ana pooki inkitanapat e Nkai. (Isuma Matayo 5:21-28) Kaji inko pee itigila nkitanapat tomon? Kainyoo kintodol ena to ltau lino tempukunoto ino te dukuya ina Ai sinyati?
- Ore iyiook pooki kigil inkitanapat oo Nkai. Amaa, kaji inko tenkincho ina chalan ino nikireu enetii Yesu anaa Olaitajeunoni lin pee isiliga ninye anaa osiligi lino ake?

Mikindim aasuj inkitanapat pooiki tenkaraki enchalan or ing'ok ang'. Neaku ainyoo enkipirta enye? Ore enkipirta e dukuya naa pee eitodol iyiook ajo kiyieiu Olaitajeunoni! Keret iyiook pee kikueta enetii Yesu pee kitum enjeunoto!

19. OLASHE lo SUYAI Enaidurra 32

Ore pee eidip atoliki Isiraeli inkitanapat tomon, neilep Musa alo oldoinyo airorie Olaitoriani too nkolong'i artam. Ore pee edol iltung'ana ajo eimutie Musa to ldoinyo, nepuonu enetii Haron nejoki ninye, "Intobiraki iyiook inkaitin naapuo te dukuya iyiook. Amu mikiyiolo enataase te Musa." Neitayu iltung'ana pooki ilgiso loo nkiyaa enye neyaki pooki Haron. Neyya Haron lelo giso neitobirunye olashe lo suyai. Nejoki ninche, "Kuna taa inkaitin inyi naaitaituo intae te nkop e Misiri." Ore te shumata oldoinyo neitobiru Enkai kulie soito are dapashi o inkitanapat. Ore pee eidip aitobiru ninche nejoki Musa, "Eidipa iltung'ana laainei aaibelekenyata naaing'uaa nanu. Shomo tung'uaiyoki pee amut ninche!" Kake etasayia Musa Olaitoriani aitadamu oling'o lenye te rishata e Abraham, Isaak, o Yakobo pee memut iltung'ana lenyena.

Ore pee edoyio Musa to ldoinyo nedol iltung'ana eseremita olashe lo suyai negoro oleng'. Nenang'aa lelo soito aare dapashi nebelibel ninche. Nebuak to ltoilo sapuk ajo, "Ore pooki ng'ai oserem Enkai nasipa inchoo elotu enatii!" Ore tiatua iloshon pokira tomon oare loo Siraeli, nepuku olosho obo lo Lawi. Nejoki Musa ninche, "Entudumu pooki ilalema entumut lelo pooki ooserem olashe lo suyai!" Neye iltung'ana kumok teina olong'. Neirridu kulikae tung'ana ing'ok enye. Neitoki Musa ashuko alo oldoinyo aishiraki Enkai metapaliki ninche too ng'ok enye. Neitoki Enkai aisho Musa kulie soito aare dapashi o inkitanapat tomon. Naa nena kitanapat apa etipika Musa atua Osanduku lo Sotua. Ore te rishata naado to Ldoinyo le Sinai, neitoki Olaitoriani ariko ninche Isiraeli aitorioki Enkop e Nkisiligata.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Ketii erishata nidamu tiatua enkishui ino nigira arreshu entoki sidai, o mpaka ninturraa eng'iriata, nigelu aas entoki torrono?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko teneitodolu ena atini nchere keyiolo Enkai pooki toki?**
 - Etii tenebo Musa o tenebo iltung'ana nabo kata. Neyiolou inkiasin enye.
 - Neyiolou nchere keyieu ninche inkitanapat pee erikoo ninche neitodol ing'ok enyena.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Etagore tenkaraki ing'ok oo ltung'ana. Keata Enkai iloisiigayuu pee ear lelo aseremak loo inkitanyaanyukot. Ore enkeeye na enkitamioto oo ng'ok.
 - Neisho ninche inkitanapat. Etii inkotikin naasipa o nemesipa. Naa Enkai nagelu.
- **Kaji eiko ena atini teneiteng'en iyiook inchere keata Enkai empiris?** (kenyorrisho, keata oling'urr tialo ilaing'okok, nenana oshoke, neton ake eirorie oltung'ani)

- o Eing'urrie Ilawi o Haron o Musa hoo naa laasak loo ng'ok sii ninche. Neata olng'urr sii te lelo ooirridu ing'ok enye.
 - o Nedamu olning'o lenye tenebo Abraham, o Isak, o Yakobo. Neitu emut Isiraeli aidaikie ninche.
 - o Neitobiru kulie soitok oo nkitanapat neisho.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - o Nedamu olning'o lenye tenebo Abraham, o Isak, o Yakobo. Neitu emut Isiraeli aidaikie ninche.
 - o Negolie enkisiligata pee eyau Olaitajeunoni eimu eishoi enkitok o eisho e Abraham.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- Nesioki aarikino ninche nena pooki naaitasa Olaitoriani ninche nerikino sii inkitanapat naaishoo Enkai ninche.
- Neiyieu iltung'ana neitore ate pee egilaki aate pooki naishiaakino te dukuya inkonyek enye.
- Negil inkitanapat e dukuya, o niare, o neuni.
- Neiyieuu nepuonu enetii Enkai eimu inkitanyaanyukot neitu eanyu enkipang'ata e Nkai. Meidim oltung'ani aitajeu kewan.
- Neas Ilawi te nkirukoto neanyit Enkai ninche. Nerriku ilkulikae tung'ana too ng'ok enye nepaliki Enkai.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kakua rishat tiatua enkishui ino itetema eng'iriata ino te dukuya Enkai? Kakua rishat kitetemaki isiliga entoki alang' enisilig Enkai?
- Ore inkaitin naa entoki nikipik osiligi lang' alang' enikisilig Enkai. Kakua tokitin nena naata inkaitin tiatua enkishui ang'? O metabaiki intokitin sidain keidim aata inkaitin tiatua enkishui ang' kulie katitin. Kaji inko pee iyiolou ajo etaa entoki enkiti ai tiatua enkishui ino?

20. OLONG'OBOR LO LAITORIANI o ENKOLONG' ENKITUTUMOTO

Enaidurra 25-29, 34-40; Ilawi 1-10, 16, 17

Ore pee eidip Isiraeli airridutu te seremata o lashe lo suyai, neaku erishata naitobiri ewueji netumore Enkai o ltung'ana lenyenak. Keji olng'obor. Ore pee enyorraa iltung'ana pooki too ltauja lenye neyau pooki enkishorot sidain pee easishore ilaisiyiaak. Neyau inkishorot kumok oleng' o metaa nejoki Musa ninche entapal amu iyautua enaaidip esiai pooki. Ore pee eidipayu enchatata olng'obor, neitoip enkatampoi shumata olng'obor neiput enkitoo e Nkai atua ilo ng'obor. Nebik enkatamboi te shumata olng'obor te rishata naado. Naa ina kata ake epuo iltung'ana loo Siraeli tenelo enkatampoi.

Ore olng'obor naa aisapuk oleng' neata ilgilat oare. Ore olgilata le dukuya naa Ewueji Sinyati. Ore tiatua ilo gilata netii olperere lo lasar le nkorropil, netii emisa natii imukatini tomon aare te risioroto o loshon loo Isiraeli, netii sii inkitashet o ltaa e sahabu nasila. Ore tedialo olkarasha netii likae gilata oji Ewueji Sinyati oo Sinyat. Ore tiatua ilo gilata netii Osanduku lo Sotua. Ore tiatua ilo sanduku netii nena soitok aare naaigerore inkitanapat tomon.

Nejo Olaitoriani meetae likae tung'ani oibung' intokitin sinyat meteleku ilapolosak ake naa teneibung' naa keye. Neput Musa Haron, olalashenye metaa Olapolosani Kitok tenebo o eishoi oo Lawi pee eretisho te nkisiyaiare o lng'obor nenap intokitin oo lng'obor te rishata enaidurra.

Ore anaake teipa o tedekenya neiyeng' ilapolosak olkuo lemeata entioto nepej te shumata olperere lo lasar. Naa tenegil oltung'ani nabo oo inkitanapat neyau olkuo le kerr aashu ole kine anaa olasar loo ng'ok. Ore te rishata nabo to lari, te Enkolong' e Nkitutumoto, neyauni inkineji aare o loing'oni. Neiyeng'i oloing'oni o nkine nabo, nesuakini osarge shumata o Sanduku lo Sotua pee elak ing'ok olapolosani tenebo inoo ltung'ana loo Siraeli. Neibalunye Olapolosani ing'ok oo ltung'ana eibung'ita elukunya enkae kine neyai enkop nalakua olupurkel metaa meitoki ashukunye neya ing'ok pooki oo ltung'ana teilo ari. Meetae ae oitoo naitayunye iltung'ana ing'ok enye meteleku enkoitoo naishoo Enkai ninche.

Ore etii nena pooki, neton ake egolong'aki iltung'ana Olaitoriani. O metabaiki ninye ilayiok le Haron amu eitu eanyit neitu easisho aaitobiraki aapej enkorropil tiatua Ewueji Sinyati. Neirriu Enkai enkima naing'uaa shumata nepej ninche tiatua ilo ng'obor. Nejoki Musa Haron, "Eidipa oshiake Enkai aikoo iyiook pee ejo, "Ore pooki laaisiai nanu neishiakino neanyit esinyatisho ai."

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kaji inko pee itum eyiolounoto e Nkai etii ninye tenebo o yie?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko teneitodolu ena atini nchere eisinyati Enkai? (keitotori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Keitodolu ilasari nchere ore oltung'ani naa olaing'okoni nemeidim aitasho te dukuya Enkai sinyati meata olasar oshiaakino.
 - Olasar ake osinya lemeata entioto ashu ai moyian oidim aidipa. Keishiakino neasi pooki toki tenkitoriokinoto anaa enatejo Olaitoriani.
 - Kindim atodua esinyatisho e Nkai te pooki toki naor intokitin sinyat o nena nemesinyat. Meidim iltung'ana aashom oopeny enetii Enkai meteleku tenepuo eimu olapolosani ashu olaitutumoni te nkoitoi o lasar lo sarge.
 - Keng'as olapolosani ayau olasar tenkaraki ing'ok enyena neyau olikae tenkaraki ing'ok oo ltung'ana.
 - Lasima apa neibukore osarge amu ketii enkishui atua osarge. Ore entoki naishu naa keye pee etum oltung'ani atajeunyie.
 - Neidaikie Enkai ilayiok le Haron amu eitu easisho tenkanyit aitobiraki te sinyatisho.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olng'urr tialo ilaing'okok, nenana oshoke, neton ake eirorie oltung'ani)**
 - Neitodolu Enkai empiris eimu entii enye tenebo iltung'ana lenyena.
 - Neitobiru Enkai ewueji netumore ilaing'okok te nkoitoi enye makewan hoo duo naa eisinyati ninye oleng'. Naa ina Ai ina nemabaikinoyu to Ldoinyo le Sinai netaa taata ketumoyu eimu iltung'ana lenyenak tenkaraki ilasari.
 - Ore tiatua olng'obor le Nkai nikidol engoro o esinyatinsho enye etumore enyorrata o empiris e Nkai.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Eton ake kegira Enkai aitobiraki kewan olosho eimu enkisiligata Olaitajeunoni.
 - Keutu olng'obor te dukuya Yesu Kristo laa ninye obik tenebo iltung'ana hoo nemeas ninye ing'oki neye te rishata ang'. Keutu sii Yerusalem Ng'ejuk to lelo ooisiligayu pee ebik tenebo Enkai.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Ore pee eibukori osarge neiteng'en iyiook nchere ing'ok o ltung'ani naayautua keeye. Naa entoki naishu ake naye pee elak ina sile oo ng'ok.
- Teneyau oltung'ani olasar netonyorrayie ing'ok enyena nepik osiligi lenye atua Olaitajeunoni olotu.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aiteng'enayu.)

- Kaji kinko pee kipuonu enetii Enkai taata?
- Etii apa Enkai tenebo iltung'ana lenyena te rishata olng'obor netii taata tenebo o iyiook eimu Kristo Yesu. Amaa, kaji eiko ena teneibelekeny enkishui ino? Kaji inko pee incho ninye enashe nikiret pee ibik te nkishui e sinyatisho?

21. ILAIKITALAK, ORPURKEL, ENG'UDI O SUYAI NATAA OLASURAI, ENKOP E NKISILIGATA

**Enkikena 13-21, Enkigilata oo Nkitanapat 4:15 – 31; 6: 1ff; 7:1-16; 8:10-20;
9:4-6; 11:1ff; 34:1-5; Yoshua 1:1 – 7:9**

Ilaikitalak tomon o are ooshomo aikitalan Kanaan:

Ore pee eidip aishoo Enkai Musa inkitanapat toldoinyio le Sinai, nerretena iltung'ana pee ejing Kanaan amu ena apa enkisiligata naishoo Enkai Abraham, Isaak, O Yakobo. Neirriwaa Musa ilaikitalak tomon o are obo ake tiatua lelo gilat, nepuo ninche tiatua ina kop too nkolongi artam egira ayiolou enaika tenerasaki ina kop.

Ore pee eshukunyie lelo aikitalak, nenyorrakino pooki inchere ore Kanaan naa enkop napirr, naruko kule o naishi, kake ore tomon lenye neyau ilkiliku torrok inchere ore iltung'ana leina kop, o suntan e ina kop naa sapuki oleng', negol sii, nemeidim ake Isiraeli atimirr ninche. Ore ilaikitalak aare, Yoshua o Kaleb, neiruko ninche inchere kemirr ina kop to larrabal lelo mang'ati lenye, amu keretu iyiook Enkai anaa enaikuna te Misiri. Kake negolong'u olorere neany ejing.

Negoro Enkai oleng', neyau enkiguana shumata ninche Isiraeli. Neibalunyie sii ina rishata ajo inchere meata obo oitogiroyie ilarin tikitam ojing atua ina kop, enkisiligata. Naa kepuo sii Israeli aman orpukel o metuata ina ishoi pooki – ilarin artam.

Ilarin artam torpurkel/entoki neitu enyorraa Isiraeli

Neaku nemanaa Isiraeli. Nerikoo ninche Musa naa ore too rishat pooki neisho Enkai ninche endaa (manna o ingurlen naing'uaa keperr) o enkare tenkoitoo e nking'asia. Kake neingunyunguny ake olorere. Ore kulie rishat neingunyungunyaki Musa ejo "Kainyioo pee iyawua iyiook te Misiri pee kipuonu aye tele purkel? Amu mikiata enkare o mukateni – nimikiyieu manna!"

Negoro olaitoriani. Neirriu ilasuria atua olerere neiteru aony ninche. Neiteru olorere aaye nepuonu enetii Musa nejoki, "kitaasa iyiook eng'oki aingunyungunyaki Enkai tenebo iyie. Tasayiaki iyiook Olaitoriani, meiwuangakinyie iyiook kulo asuriaa." Neomonoki Musa iltung'ana.

Nejoki Enkai Musa meitayu enkitanyaanyukoto olasurai lo suyai obo neik ninye te shumata olchata. Ore ake pooki ng'ae oony olasurai, ore ake pee eing'or ilo asurai lo suyai, nejeu. Neitayu Musa olasurai lo suyai nepik te shumata ilo shata. Ore ake pee eony pooki ng'ae olasurai, ore ake pee eing'or ilo asurai lo suyai, nepok.

Enjing'ata e Nkop e Nkisiligata:

Ore enabayie, etulusoitie ilarin artam tiatua orpurkel, neyau Enkai Isiraeli olpulosie leina kop e nkisiligata. Nelo Enkai agelu Yoshua metoriko ninche ina kop.

Ore eton eitu eye Musa, neitadamua iltung'ana pee meserem ake aekata inkitanyaanyukot naitae inkaitin natii Kanaan, pee mewuasai ake nerikino ninche ing'ok enye, neitadamu ninche pee edamu enyorrata e Nkai, o enkisiligata naishoo Abraham, Isaka o Yakobo. Neibung' ilo ning'o teneyieu nemayiani. Neitadamu

ninche inchere keitame ninche Enkai tenepuo Aserem kulie aitin, kake ore ake pee eirridu, neing'oru Olaitoriani, nening ninye, neing'urrie ninche Enkai.

Ore eyia nejia, ore tialo erikore e Yoshua, nelang olosho loo Siraeli eim atua olkeju le Yordan ten kop natoyio neiteru arasaki ina kop.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Amaa te nkishui ino, kakua baa duoo oleng' kewan ino igira aingunyunguny?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneitodolua ajo keeta Enkai engolon sapuk? (keata enkitoria, enkidimata)**
 - o Nedamu Enkai ninche, nerreten sii pee epuo Kanaan. Eisiligie sii apa ninche ina kop.
 - o Keata sii apa Enkai enkitoria pee eirriwaa ninche meshomo orpurkel. neitu ninche eany epuo ilo purkel.
 - o Neisho Musa inkitanapat to Idoinyion le Sinai.
 - o Neisho ninche endaa, neisho enkare.
 - o Neata Enkai engolon pee eitame enkingunyunguny enye, airriu ilasuriaa. Meatai hoo obo oidima ailanyai enkitamioto e Nkai.
 - o Keata sii engolon pee eishiunye olorere tialo nena onyot o lasuriaa. Keata Enkai engolon tialo inkitobirunot pooki. Ninye oitobirua ilasuriaa, kake keata eng'olon tialo ninche.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - o Etayiolo Enkai indamunot, o rorei tialo apa kulo tung'ana oingunyungunyita.
 - o Neyiolou Enkai ilkiliku oyau lelo aikitalak, neiyiolo inchere ilkiliku ootem enkirukoto oo Siraeli.
 - o Etayiolo sii Enkai inchere keidim ataretu Isiraeli metimira ilmangati lenye.
 - o Etayiolo inchere kepuo ninche aidapashari tiatua orpurkel too larin artam eton eitu eji ina kop enkisiligata.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Ore tenkaraki enking'ungunyung'uny enye, neiguanare Enkai ninche. Nemitiki Enkai pooki tungani botorr, meteleku ake Kaleb o Yoshua ejing atua ina kop e nkisiligata. Ore enatii, naa pee eidapashari ninche teilo purkel o metuata inaishai pooki.
 - o Keitame oshi ake Enkai eng'oki. Eitamio enkingunyunguny eimu eonyoto o lasuriaa. Neye iltung'ana kumok. Lasima pee eitame Enkai eng'oki.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olng'urr tialo ilaing'okok, nenana oshoke, neton ake eirorie oltung'ani)**
 - o Eitobirua Enkai olasuray lo suyai paa ore pooki ng'ae oing'urr nejeu.
 - o Eishoo ninche endaa, neisho enkare nerikoo ninche tiatua ilo purkel.
 - o Nemitu ninche tialo kulikae oshon egira aidapashari teilo purkel.
 - o Nengiriakino ninche alang enamut ninche pii. Nengiri tialo ninche erishata naado.
 - o Neining ninche, nening enkishirata enye pee eony ninche ilasuriaa.
 - o Neriku ninche enkop enkisiligata eidipa atulusoi ilarin artam.

- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Etejo apa kepuo aye e ishohi e dukuya torpurkel, netaase ake ina.
 - Eibunga ina kisiligata enye e ina kop tialo Abraham, Isaka, o Yakobo anaa enatorripo iltung'ana lenyena. Keibung'ita apa ina kisiligata pee eyau Olaitajeunoni eimu eishohi e nkitok.
 - Nejo, ore pooki ngae oing'urr olasurai nepok, neaku ake nejia.
 - Ore hoo neitamio Enkai ina ishohi, kake eshomo dukuya arrip ninche ilo osho loo Siraeli laa ninche apa etejo kemayianie enkop pooki.
 - Neisiligishore sii tene Enkai inchere keshuku eishohi e are ina kop e nkisiligata, netaasa ake anaa enatejo.

KAINYIOO KINTENG'ENA ENA ATININ NAIPIRTA OLTUNG'ANI?

- **Tia oitohi eitodolu ena atini inchere ore oltung'ani naa olaing'okoni nenarikino enkitamioto e Nkai tialo eng'oki enye?**
 - Neingunyunguny olosho loo Siraeli pooki rishata, hoo netaasaka Enkai ninche imbaa kumok oleng'.
 - Neany enyora inkisiligat e Nkai. Nelau ninche enkirukoto neiteru aining ilng'ashi lenye o enkuretisho enye.
- **Tia oitohi eitodolu ena atini inchere keyieu oltung'ani Enkai, nemeidim aitajeu kewan?**
 - Meidim oltung'ani ailanya arashu atapaashare enkitamioto naa Enkai naishoru. Etdalaikinote aitajeu ate te lelo asuriaa.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- **Tia oitohi kidol tena atini inchere keidim ake oltung'ani ayeu enetii Enkai te nkoitohi e Nkai? (anaa ake anayieu, neterretena Enkai?)**
 - Keidimi ake apa aitajeu ninche teneingorr ilo asurai, tenesuj ake ina oitohi naishorua Enkai.
 - Keidim ake atobik eishu tenenya ake ina naishorua Enkai meinosi, neoki sii.
- **Tia oitohi kidol tena atini inchere lasima pee eata oltung'ani enkirukoto, neirridu pee etumoki aitishipa Enkai, neitajeuni sii?**
 - Teneing'orr ilo asurai, kegira apa airridu tialo ing'ok enye, neibelekenya tenkirukoto aibelekenyakino ina oitohi naishoo Enkai.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kaa pukunoto nagol oleng' kimpoto iyie Enkai? Tia oitohi etagolo te iyie pee isilig ninye? Indim atadamu embae naje ninoto olongunyingunyi tialo Enkai, arashu tialo ae bae nikinchoo ninye iyie?
- Kakua oitohi tiatua enkishui ino igira adamunye imbaa inono makewan alang tenisilig Enkai? Tia oitohi? Kainyioo enkuretisho niata tialo ena bae? Tia oitohi kindim iyie atareto ena atini pee ing'uaa ina kuretisho? Imbalunye enkuretisho ino o enkirukoto nimiata te Nkai.
- **Tadamu tiatua enkishui ino, erubata nabo nigira abatatare misujita enayieu Enkai? Amaa ina nimiyieu nisuj Enkai, keitodolu ina ajo miata enkirukoto te Nkai tiatua enkishui ino?**

22. ILAIGUANAK Yoshua 7-28, Ilaiguanak 1-21

Ore anaa pee eirish, neidimu Isiraeli, iltung'ana le Kanaan, neya ilgilat pokira tomon o are ina kop. Neaku esiai apa enye pee earaa iltung'ana pooki otii atua Kanaan leton apa etii atua ina kop, peyie meshulare ake ninche, neiteru ainyial ninche nena kitanyaanyukot naseremi. Ore peyie eidip Yoshua atua, neitore ate ilgilat le Isiraeli. Ore peyie eiteru ashipakino, neiteru sii akarsisu teina kop ng'ujuk, nerikino ina apa naitanapa ninche Enkai. Inji kiindim atejo ina rishata: "neas pooki tung'ani enaba anaa enayieu too nkonyek enyana."

Nejoki Olmalaika lo Laitoriani iltung'ana, "Ore peyie aitayu intae aitung'uaa Misiri natiaka intae, "Eminchoso ake ile Kanaani emany enkop tenebo intae." Kake itigila intae ilo ning'o tialo iyiook. Inchoo Ilkanaani eshulare intae, neitu igiligili ilperere lenye, neitu ipejoo inkaitin enye. Neaku, mekure sii nanu araa ninche teina kop inyi. Keaku ninche olkikuei te ntae, nerresh intae nkaitin enye."

Naa ina ake nataase. Nerikino ina ishoi pooki kiti Enkai. Neiteru aaserem inkaitin oo ilkanaani, neas imbususi. Neiteru ilmangati airish ninche, neaku ore pooki kata napuo Isiraeli olarrabal, negilunore ninche Enkai, nemiri ninche. Ore pee eitoki aaku isinkan eniare, nedamu ninche Enkai, neipot neomon ninye meeu aitajeu ninche. Nedumu Enkai olarikoni, oji olarishani, oitajewuo ninche aigil.

Kake ore tenkiti rishata, nerikino ninche Enkai. Neiterunye emanaroto aigil naijo enkae. Katitin tomon oo ng'uan eitu ninye ebaya iip uni o onom, neitoki inkera o Siraeli aibelekenya aing'uaa Enkai neiteru aaserem inkaitin o Ilkanaani! Ore te pooki rishata, neitame ninche Enkai anaa apake enatejo pee eisho ninche inkitanapat tomon toldoinyio le Sinai. Kake ore te pooki kata nairridu inkera o Siraeli tialo eng'oki enye neibung olning'o, nepaliki Enkai ninche. Neiteru Enkai amayian ninche aigil. Naa keji ena, erishata oo larishak. Ore kulikae arishak arashu aitajeunok naa ketii Gidion, Debora tenebo Samson. Ore apa olobayie naa Emmanuel.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu enaiko eng'oki teneriku enkae ng'oki, neponari embae aaku torriono oleng' oleng'?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneitodolua ajo keeta Enkai engolon sapuk? (keata enkitoria, enkidimata)**
 - o Etimira Isiraeli ilmang'ati lenye erishata pooki natii Enkai tenebo ninche. Etimiraki ninche Isiraeli erishata nemetii Enkai tenebo ninche. Teng'olon e Nkai ake etimirishote.
 - o Keata Enkai eng'olon naitajeunyie ninche tialo ilmang'ati lenye.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**

- o Etayiolo apa Enkai ajo ng'ae nataasa eng'oki, o ina ng'oki nataasa. Etayiolo pee eas olosho loo Siraeli eng'oki tialo ninye.
- o Neyiolou sii erishata pooki nairridutua ninche, neyiolo sii enaiko teneitajeu.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Eishoo ninche enkitanapata, nejoki ninche pee eibung neas anaa enajo.
 - o Ore apa pee eas Isiraeli eng'oki tialo Enkai, neshukokino ninche Enkai pee errip sinyatisho enye.
 - o Ore too rishat o rishat neitungwaitie Isiraeli Enkai, neitame Enkai ninche.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - o Eitoduaa ninche empiris enye irishat kumok, irishat pooki nairridu eng'oki enye, neisho ninche olarishani orikoo neitajeu ninche.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - o Eisiligie Enkai pee eisho ninche ina kop, netaasa ina, hoo netogolongakita ninche ninye.
 - o Nelo Enkai dukuya errip ninche kulo tung'ana eibung'ita ina kisiligata inchere ninche kenya epukunye Olaitajeunoni oisiligishore apa ninye moitie. Ilo olotu eing'uaa eishoi enkitok.

KAINYIOO KINTENG'ENA ENA ATININ NAIPIRTA OLTUNG'ANI?

- **Tia oitoi kidol tena atini inchere ore oltung'ani naa olaing'okoni, nenarikino enkitamioto tenkataki inkitaruorrot enyena?**
 - o Ore Isiraeli netetemaki irishat kumok oleng' pee eing'uaa Enkai aserem inkaitin, nesioyo nabo kata aing'uaa Enkai nerikino nena pooki apa naitaasaki ninche.
- **Tia oitoi eitodolu ena atini inchere keyieuo oltung'ani Enkai, nemeidim aitajeu kewan?**
 - o Ore irishat kumok, netimiraki olosho loo Siraeli ilmang'ati lenye, nelaikino aitajeu ate. Eishirakita ninche Enkai.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- **Tia oitoi kidol tena atini inchere eidim ake oltung'ani ayeu enetii Enkai te nkoitoi e Nkai (anaa enayieuo Enkai?)**
 - o Eidim ake apa Isiraeli atimirr ilmang'ati lenye, kake teneisho arashu tenesuj ake inkitanapat e Nkai.
- **Kaji eiko ena atini teneutaki iyiook inchere lasima nikiata enkirukoto, o enkirridunoto pee kitumoki aitishipa Enkai?**
 - o Ore irishat pooki nairridu inkera o Siraeli tialo ng'ok enye, neisilig Enkai, neitajeuni ninche.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kaji inko tening'orr eng'oki ino makewan? Keya nidol kulie ng'ok anaa ng'ok kutiti nemedamu Enkai? Arashu aetoki sapuk?
 - o Tia oitoi eata kuna ng'ok "kunini" tipat? Inchere, kaji eiko kuna ng'ok "kunini" teneitodolu empukunoto o ltau lino?
 - o Kaji inko teniyiolou enkiguana e Nkai, teninteru aas kuna ng'ok?
- Kakua temat igira iyie aimaa tiatua enkishui ino? Kelejare? Kempurrorre, kolom? Kaa ng'oki oshi nikisioki aidimu? Tia oitoi einyiala ena ng'oki osotua lino o Enkai? Oo kulikae airukok? Kaji osiligi lino tenirridu, nimbalye ing'ok inono?

23. ETAYIEUTUA ISIRAEEL OLAIGUANANI – OLAIGUANANI SAULO O ILMALEKI 1 Samueli 15:1-23

(Ore apa olarishani obayie oitajewuo inkera olosho loo Siraeli naa keji Samuel. Ore apa aa enkayioni, neirorie Enkai ninye neliki ninye imbaa naasa to nkolongi napuonu. Ore apa egira abulu, netii apa Enkai tenebo o ninye, naa ore apa pooki natejo nepuonu asipayu, neyiolou olosho pooki ajo oloiboni le Nkai ilo.)

Ore pee eaku ninye oltung’ani kitok nejoki ninye Isiraeli, “Ekiyieu sii iyiook olkinki ana ilkulikae oshon.”

Neitu apa eitiship Samueli ena bae, kake nejoki Enkai ninye, “Atanyaita Isiraeli anaa oloiguanani lenye. Ore apa anaa nayau ninche aitupuku te Misiri, natunguatie ninche nanu neibeleyenya kino. Aserem inkitanyaanyukot. Neaku inchoo ninche ina nayieu. Kake inkoo ninche enaiko lelo aiguanak teneitore ninche aita ninche isinkan, neitorogony ninche.

Ore etii nena kikoot, enigil Isiraeli aikilikuanu olaiguanani orik ninche olarrabal. Neitodol Enkai ilo barnoti oji Samueli autaki olbarnoti oji Saulo nebukoki ninye eilata metaa ninye/meitoria Isiraeli.

Neretu Saulo olosho loo Siraeli metimira ilkuti mangati lenye (lelo apa tung’ana otalaikinote Isiraeli aatarai teina kop enkisiligata). Neiteru Saulo aisilig kewan alang enaisilig Enkai. Ore nabo kata, alang’ enaanyu Samueli, olapolosani le Nkai, pee elotu aitayu. Olasarr eton eng’orr olarrabal, neishunye engiriata enye, neureishoyu neitayu ninye openy. Negro Enkai.

Ore ti ae kata, neirorie eimu Samueli, nejoki Saulo meshomo arasaki Ilmaleki, pee epuo aitalaku elap anaa enapa rasakinoto enye tialo Isiraeli te rishata natulusoyie. Naa ilaseremak apa loo nkitanyaanyukot. Nejoki Enkai, “Eishutu pooki toki o metabaiki inchoo enye.” Kake eitu apa ear Saulo olaiguanani lelelo mangati, neya inkishu napir, neitobirr olperere odamunyeeki ninye.

Ore atulusoyie olarrabal, nelo Samueli enetii Saul: Ore pee edolu Saulo ninye nejo “Metamayiani Olaitoriani! Amu ataasa enkitanapata Olaitoriani.

Nejo Samueli, “Kainyioo naa ele toilo loo ntare, o nkishu laningito?”

Nejo Saulo, “Ee, eyautua ilewa lainei intokitin naapirr peyie eitakinnye Olaitoriani, Enkai olasarr. Kake kindipakita kulie tokitin pooki! Kitoning’o Enkai!”

“Entung’uai” neitanap Samuel. “Ijojo intae ilasarr enyorr Enkai alang ening’oto? Aisidai ening’oto alang’ olasarr. Ore eng’olon enkong’u o olwuasa netiu ake anaa eseremata oo nkaitin. Ore amu itemenaitie ororei lo Laitoriani, kitemenayie sii ninye iyie Olaitoriani anaa olaiguanani.” Neibeleyenya Samueli ajo alo, neibung Saulo olcholoji lolkila lenye nepolos nejoki Samuel etopolosayie Olaitoriani enkitoria ino taata pee eisho ole latia ino.

Ore enabayie nejo Saulo, “Ayia, ataasa eng’oki. Atigila inkitanapat Enkai. Aturia apa ole orere naming ninche. Neaku ore taat atasayia, tapalikiaki eng’oki ai nirrinyunye alo tenebo nanu, iyanyitaki tenebo kulo payiani lo lorere lai o tedukuya Isiraeli; wou tenebo nanu, pee alo nanu aserem Olaitoriani.”

Nerrinyo Samueli alo, neserem Saulo Olaitoriani, nesesequan Samueli olaiguanani loo Ilmaleki tedukuya pooki, neisik, neitu eigil aadua o Saulo.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Itiaka aekata oltung'ani, "maigilena", kake ore tiatua kewan neitu isip? Kainyioo apa pee itang'asa ajo maitoki aekata ena?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneitodolua ajo keeta Enkai engolon sapuk? (keata enkitoria, enkidimata)**
 - Keata enkidimata pee eitodol kewan Isiraeli eimu osinka lenye Samueli. Amu ketii apa tenebo Samueli neaku ore pooki naatejo nesipayu. Eitadedeyie sii inchere iltung'ana inchere ore apa Samueli naa oloiboni le Nkai.
 - Keata enkidimata pee eisho Isiraeli olaiguanani negelaki ninche Saulo.
 - Keata enkitoria pee eany Saulo anaa olaiguanani.
 - Neisho Samueli enkiyang'et e ng'olon, nerrip ninye pee elo dukuya olaiguanani Saulo.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Etolikio apa Samueli eton aa elati barnoti nena naapuonu aasa too nkolong'i.
 - Etayiolo apa netolikioo Isiraeli enalotu olkinki aitaas Isiraeli.
 - Etayiolo apa enalotu ilo aiguanani oji Saulo atiu.
 - Netayiolo sii apa inchere eitu eyanyit, nening Saulo ninye peyie epal eitu emut Ilmaleki tenebo inchoo enye.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Etanya Enkai olasarr oitakia olaiguanani Saul ninye amu mme aoa olapolosani ninye. Amu mme apa ninye etegelaka Enkai ena siai. Eitu apa eisilig Enkai oleng' aanyu Samueli.
 - Etanya apa Saulo. Amu etogolong'ua pee eany EMUT Ilmaleki pooki tenebo masaa enye.
 - Ore sinyatisho e Nkai naa keyieu enkanyit nalulung'a, enemetii INKIKILIKUANAT arashu inkitolonyat.
 - Neye Saulo elakuaniki Olaitoriani amu tenkaraki eng'oki enye.
 - Ore te sipata anaa apa enayieunoyu olasarr eton eitu eiterunye olarrabal Sinyatisho e Nkai.
 - Eitamioki apa Isiraeli amu etanyaita eorunye maate aing'uaa lelo Kanaani lemeiruk oipoti apa ajo Ilfilisti. Amu ore Enkai naa keyieu olosho Sinyati, olosho otoorunye maate.
 - **Amaa, kaa pukunoto apa olasarr eyieu Enkai?**
 - Keyieu Enkai olasarr oing'uaa atua oltau, oishorua kewan tenkaraki e Nkai, oltau oisilig Enkai. Ore apa olasarr neme oloropieki Enkai pee emenaa eng'oki. Mme olasarr enkias ake duoo. Kake enkirukoto eing'uaa, naa pee eitayuni tenkoitoi e Nkai ake!
 - Neitamei Saulo amu eishoo kewan enkisisa alang' enaisho enkisisa Enkai.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - Eishoo Isiraeli oloiboni oirorie ninche, neutaa ninche.
 - Eishoo Enkai ninche erishata naitayunye olasarr, aa enkoitoi natumore Enkai ninche.
 - Eininingo iltung'ana lenyena newali ninche.
 - Etungiria tialo Saulo oleng'. Eitu ear ninye ina kata ake, hoo Netanya ninye anaa olaiguanani. Keata apa erishata nairridunyie, neitajeuni teina. Neisho sii ninye enkishui naado.
 - Enoto apa empiris tialo ile Isiraeli pee eisho ninche likae aiguanani oure Enkai.

- o Etolikio ninche, aitadamu inyamalaritin naapuonu teilo kinki.
- o Eitu eing'uaa Isiraeli. Hoo Netanyahu ninche ninye anaa olaiguanani, nepik tenebo ninche.
- **Kaji eiko ena atini teneutaki iyiook inchere KEISILIGAYU Enkai? (meibeleyenya, keibung inkisiligat enyena, keas sii inaajo)**
 - o Etobiko Enkai eisiligayu to ile Isiraeli olorere ogeluno laa ninche kenya eimunyeki olaitajeunoni.
 - o Neitame Saulo pee eitayu olasarr; enkisiyaiare naa enoo ilapolosak ake.
 - o Ore pee eany Enkai Saulo, nesipayu etanyaki ninye.
 - o Eishorua Enkai enkisiligata inchere keirriu olaitajeunoni eimu ele osho.
 - o Etiaka sii Abrahamu inchere kedek lelo oodek ninye. Eitamio apa Enkai Ilmaleki tenkaraki natarasakita Isiraeli, apa epuku ninche eing'uaa Misiri ilarin kumok otulusoitie.
 - o Eishorua sii apa enkisiligata inchere kegolie Isiraeli, negira taata aretu ninche pee emir ninche ilmangati lenye.

KAINYIOO KINTENG'ENA ENA ATININ NAIPIRTA OLTUNG'ANI?

- **Tia oitoi eitodol iyiook ena atini inchere ore oltung'ani naa olaing'okoni, nenarikino enkitamioto tenkaraki eng'oki enye?**
 - o Etanyaita Isiraeli ilo oitobirua ninche neikonyaa sii olaiguanani. Eitu ninche etem aisilig Enkai.
 - o Neas ninye Saulo intokitin anaa enayieu ninye alang' anaa enayieu Enkai, hoo neibala apa pooki toki. Amu etanya apa ear Ilmaleki pooki amut tenebo inchoo enye anaa apa enaitanapa Enkai ninye metaasa.
 - o Eitayio Saulo olasarr lenye makewan, alang' enaisilig Enkai meishoru olasarr lenye.
 - o Neitayu Saulo enkitanyaanyukoto e makewan. Amu keyieu apa neyiolouni ninye alang' enayiolouni Enkai neishori ninye irrepeta.
 - o Eitayio sii Saulo inkitolonyat tenkaraki engolong'u enye. Neiteeniki isikarini, neiteeniki iltung'ana, nenyok airo anaa oltung'ani sinyati amu egira apa aisudoo nena shoo arashu kishu pee eitayunye olasarr; o kulie ake. Neitodolua sii inchere kewan apa eyiewuaki errepet sidai alang' enaishori Enkai errepet. ("Entoning'oki nanu pooki te dukuya iltung'ana pooki").
- **Tia oitoi eitodolu ena atini inchere keyieu oltung'ani, nemeidim sii kewan arashu aitajeu kewan?**
 - o Ore olosho loo Siraeli naa Enkai ake eirishakinote teilo arrabal pooki.
 - o Ore apa Saulo pee eany Enkai ninye, nemeata hoo nabo naidim ataasa.

Kainyioo kinteng'ena tene naipirta ENJEUNOTO? (Enaiko oltung'ani tenelotu enetii Enkai?)

- **Tia oitoi eitodolu ena atini inchere eidim ake oltung'ani ayeu enetii Enkai te nkoitoo e Nkai? (anaa enayieu Enkai, oo enkipankata e Nkai?)**
 - o Ore oltung'ani naa lasima pee eisilig Enkai oleng' pee etumoki atoning'o ninye. Ore oltung'ani naa lasima pee eisilig Enkai ata tenitii irishat nemeningunoyu arashu egol (anaa eanyunoto e Samueli metabau.)
 - o Ore oltung'ani naa pee elotu enetii Enkai te nkoitoo naishorua Enkai. Nejo Enkai ore ilasarri naa ilapolosak ake oitayu.
 - o Ore Enkai naa oltau eing'orr alang enaing'orr enkanyit e oriong o sesen ake.
- **Keitodolu ena atini inchere lasima pee eata oltung'ani enkirukoto, neirridu sii peyie etumoki aitishipa Enkai, neitajeuni sii?**
 - o Kidol tene inchere ore Saulo neitu elotu enetii Enkai te nkoitoo e nkirukoto, o te nkirridunoto nasipa, naa ina pee etanyaki ninye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- **Indim sa atadamu embae nitetema aishoru inkitolonyat engolong'u enyok alimu imbaa kumok e nkilepata** (anaa Saulo – “kigira apaa aiteng'el nkishu naapirr peyie kintayunye ilasarri”)? Anaata apa itaasa nyoo alang nena kitolonyat?
- **Ekeyieu apa Isiraeli olaiguanani anaa ilkulikae oshon. Tadamu sii enkoitoi nabo nikitrikoyie olkuaak linyi taasa embae?** Kainyioo eyieunoyu pee irridu tialo ina? Amaa enkirridunoto nasipa nelioo etui aja tena bae apa nitaasa?
- **Kaa bae arashu kitukujata igira aima (anaa ena apa e Saulo egira aanyu Samueli pee eitodol kewan elotu aitayu olasarr) ketii ewueji nikitetemaki pee ias embae te nkoitoi dorrop arashu iturn olng'ash, nilau engiriata egira aanyu Enkai?**
- **Tadamu erishata nitoduaa oltung'ani erishata e dukuya, ninteru aiguanare ninye te nkoitoi naje too ndamunot mono, nilotu ayiolou te siadi inchere intaalana. Kainyioo pee idamu ajo intaalana apa? Too ndamunot inono?**

24. OLKINKI DAUDI 1 Samuel 16-17, 2 Samuel 6-7, 11-12

Ore pee eidip aateshet olng'obor lo Laitoriani nerasaa Enkop Enkisiligata, neton ake egolong'aki iltung'anak loo Siraeli Olaitoriani. Neas pooki ng'ai anaa enaishiakino te dukuya inkonyek enyena. Neany Olaitoriani anaa olaiguanani lenye neiyieuu oopeny olaiguanani lenye maate. Ore olaiguanani le dukuyu, naa Saulo, nemesuj apa Olaitoriani te lulung'ata. Ore enkolong' nabo neirriwaa Olaitoriani oloiboni lenye Samuel enetii oltung'ani oji enkarna enye Yese te Bethlehem pee eing'oru olaiguanani ogeluno tiatua ilayiok lenyena pokira isiet. Nedamu Samuel ajo kegelu Olaitoriani obo loo layiok sapukin tiatua ninche kake etejo Enkai, "Meneijia. Eing'or tung'ani anaa enaikununo oriong' kake keing'or Olaitoriani iltauja." Negelu Olaitoriani Daudi laa ninye olkiti naa olchekut loontare. Nebukoki Samuel ninye eilata aput nelotu engolon o Laitoriani shumata ninye ebaiki ina olong' neito dukuya.

Ore aa enkiti ayioni Daudi nelo aparan ilalashera lenyena etii olarrabal tenebo Olfilisti. Ore pee ebaiki ilng'obori nedol Goliath ilo Filisti kitok egira aikoroj Isiraeli tenebo Enkai enye tenkaraki etureita enjore pooki erare ninye. Negro Daudi oleng' nejoki ilkulikae, "Kaarare nanu ele Filisti." Ore hoo naa kiti ninye oleng' nemeiyiolo ataasishore empere o lalem oleng', kake keyiolo ajo keret Enkai ninye amu ore apa eton egira airrita intare netareto Olaitoriani ninye nemir ing'uesi anaa ilng'atunyo. Ore pee erare Goliath near ninye metuaa tenkopirisiai o soit neisho Isiraeli emirishoi.

Ore pee eaku oloo larin tomoni uni neaku Olkinki tiatua ilarin artam. Ore apa Daudi naa ololarrabal kitok neisiliga Enkai oleng'. Hoo naa etaasa Daudi ing'ok sapukin tiatua enkishui enye kake eirridua ing'ok enyena nepalikini ninye. Ore pee eidip Daudi atimira ilmang'ati lenyena pooki neyau Osanduku lo Sotua atua Yerusalem. Neiyieuu Daudi neshetaki Olaitoriani enkaji kitok. Kake eirriwaka Olaitoriani Daudi olkilikuai ojo, "Mikindim iyie ateshetaki nanu enkaji amu imbukoyie iyie osarge sapuk kake ekeshet olayioni lino ina aji. Kaaisho enkisiligata nchere itum enkayioni naton to lorika le nkitoo intarasi. Kebik enkitoria ino intarasi." Neisis Daudi Olaitoriani tenkaraki nena kisiligat. Ore hoo duo naa olaing'okoni oiyie empiris Enkai, oltung'ani apa ninye oata oltau le Nkai. Neasishore Enkai ninye meigero ilkirempen le seremare tiatua ororei le Nkai.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Tadamu erishata nitoduaa oltung'ani erishata e dukuya, ninteru aiguanare ninye te nkoitoi naje too ndamunot inono, nilotu ayiolou te siadi inchere intaalana. Kainyioo pee idamu ajo intaalana apa? Too ndamunot inono?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Etareto Enkai olbarnoti oti metimira Olfilisti ata hoo tenaa oltung'ani ogol oleng' ninye.
 - Eitore Enkai engelonoto o laiguanani. Nerrip sii neisho Isiraeli emirishoi eimu ninye.
- **Kaji eiko teneitodolu ena atini nchere keyiolo Enkai pooki toki?**
 - Keyiolo Enkai oltau le Daudi negelu ninye tiatua ilalashera lenyena.
 - Keyiolo sii ing'ok enyena.
 - Keyiolo sii ajo keshetaki olayioni le Daudi enkaji.
 - Keyiolo sii ajo kebik olayioni le Daudi to lorika le nkitoo intarasi.
- **Kaji eiko ena atini teneiteng'en iyiook inchere keata Enkai empiris?** (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)
 - Nerrip Enkai Daudi too ng'uesi entim, te Goliath, o te Saulo.
 - Neisho Enkai ninye emirishoi olarrabal.
 - Nepaliki ing'ok enyena nelo dukuya aasishore ninye.
 - Neishoru enkisiligata nchere keton olayioni lenye to lorika le nkitoo ntarasi. Ore ina naa keutaki iyiook Olaitajeunoni.
- **Kaji eiko ena atini teneutaki iyiook inchere KEISILIGAYU Enkai? (meibelegenya, keibung inkisiligat enyena, keas sii inaja)**
 - Eton ebik enkisiligata Enkai pee eyau Olaitajeunoni lo siligi eimu eishoi e Daudi.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Ore hoo naa ore Daudi naa oltung'ani oata oltau le Nkai netaasa ing'ok sapuki oleng' anaa eloloito, near metua, neng'uar sii.
- Meidim apa Isiraeli aaitajeu aate tiatua Ilfilisti kake eishorua Enkai enkordunoto eimu Daudi.
- Nelo Daudi te nkirukoto. Neiriddu neisilig Olaitajeunoni nepalaki ninye neret sii.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kaji eiko Enkai pee kiasishore iyie ata hoo tenira olaing'okoni? Kaji eiko pee kidol ajo eton ake eata Enkai empiris te iyiook tena rishata?
- Kakua baa nena enkiyang'et sapukin (anaa Goliath) naa te ninche igira aimaa engoloto? Kaji eiko Enkai tenikiret?

25. ELIYA O LOIBONOK LE BAAL

1 Ilaiguanak le Dukuya 18

Ore apa Eliya naa oloiboni yioloti, oirriwayie apa Enkai kopkop e Isiraeli te nena apa olong'I nabore enkarrueisho, naseremitaie nkitanyaanyukot terishata e Ahab. Ore tenkaraki eng'oki e Isiraeli, neibonu Eliya olameyu, neitasheyie Enkai enchan too larin okuni. Ore tena rishata neshomo Eliya aisudori tenkaraki Ahab. Ore pee eishunye ilarin okuni lemetii enchan, neigil aitodolu kewan te dukuya Ahab. Ore pee edolu Ahab, Eliya nejo, "Iyie ilo, olaitanyamalani loo Siraeli?" Nejo Eliya, "Eitu nanu aitanyamal Isiraeli. Itaasa ina amu ishomo aserem enkitanyaanyukoto e Baal!" Nejo Eliya, "Inturrurrokoki Isiraeli to ldoinyio le karmel pee kidol Enkai nasipa tenaa Olaitoriani arashu e Baal."

Ore enkolong nabo nageluno, netii apa ina olaiguanani Ahab tenebo iloibonok iip ong'uan o onom le Baal. Neiturrurro Isiraeli pooki to oldoinyio le Karmel. Neitashe Eliya openy te nkaraki Olaitoriani. Nejoki Eliya olorere, "Entasho maitaki Enkai olasarr metii enkima. Enchoo iloibonok le Baal meitayu sii ninche olasarr metii enkima. Ore ake Enkai nawalu te nkima naa ninye Enkai nasipa." Nejo olorere pooki, "Ayia! Sidai ina damunoto!"

Ore eyia nejia, ore tadekenya neomon iloibonok le Baal aajo inji, "Oo Baal! Toning'o iyiook! Irriwaki iyiook enkima! Oo Baal, Toning'o iyiook!" neishirr o metabaiki enkipirata e nkolong' nemeata entoki nataase. Ore pee eipirr enkolong, neikordodaa Eliya ninche, "ebaiki keirura Baal!" "ebaiki eshomo elototo naado. Entabuaku oleng'!" neiteru iloibonok le Baal aipidipid nerany, nebuaku aajo lelo oibonok le Baal nedung'udung' ate too nkalema, nerukunyie osarge. "Oo Baal! Toning'o iyiook! Irriu enkima! Nebau enteipa, neton ake meata entoki nataase.

Nejo Eliya, "Eidipe! Etaa erishata ai." Neshetu Eliya olperere, ashetaki Olaitoriani too soito tomon o are. Neyieng oloing'oni neiteleiki ilo perere. Netaru eng'umoto aitaman ilo perere, nejoki ilewa metubukoki iltoo tomon o are abukoki ilo asar. Nebukokino ina are ilo oing'oni, nebukokino lelo keek, nebukokino isoito neaku kedoyo teina gumoto. Neitashe Eliya, neomon "Enkai ai. Intodolu iyie ajo ira Enkai, nara nanu osinka lino." Ore ina kata ake, nedou enkima naing'uaa keperr, nepejoo ilo asarr pooki, nepej ilkeek, nepej lelo soito, nepej enkare pooki.

Nebuaku olorere, "Olaitoriani! Ninye Enkai!" nejo Eliya, "Entodumu lelo oibonok iip ong'uan le Baal, niariara ninche metuata." Ore pee eidipayu ina neitoki enchan alotu.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kainyioo eji enkitanyaanyukoto naitae Enkai?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA ENKAI?

- **Kaji eiko ena atini teneitodolua ajo keata Enkai engolon sapuk? (keata enkitoria, enkidimata)**
 - Eitasheyie Enkai enchan too larin okuni. Keata enkitoria tialo nena naitobirua ninye.
 - Etorripo Enkai Eliya tialo Ahab, neitoti ninye too larin okuni.
 - Einosa Enkai olasarr oshal, o metabaiki isoito, tenkirriapata enkong'u.
 - Etashawua Enkai engolon enye pee ewalu enkomono o ltung'ani obo oata enkirukoto, alang iltung'ana iip ong'uaan, ogira aomon enkitanyaanyukoto nemeishu.
 - Keata Enkai enkitoria, nayieunyie Sinyatisho too iltung'ana lenyena.
- **Kaji eiko teneitodolu ena atini nchere KEYIOLO Enkai pooki toki? (netii pooki wueji)**
 - Keyiolo apa Enkai inchere kelotu olameyu, naa keishunye tiatua ilarin okuni.
 - Keyiolo apa Enkai eneisikie Eliya, alo aisudoo ninye.
 - Keyiolo ake apa Enkai enaasayu tialo ilo asarr o tialo iloibonok le Baal.
 - Menyaanyukie Enkai ang', Enkai nemesipa anaa Baal, ore Enkai nasipa nemeirura ninye, aashu elo enelakua. Keyiolo oshi ake, kedol oshi ake pooki toki nagira aasa tiatua enkishui oo iltung'ana.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Eitamio Enkai Ahab, neitame Isiraeli amu eteserema inkitanyaanyukot neyau olaneyu.
 - Neitodolu Enkai inchere Aisinyati pee emut olasarr pooki. Amu ore Enkai naa enkima namutisho.
 - Neany Enkai ewaliki lelo aomonok loo nkitanyaanyukot, neitame lelo oibonok le Baal aitanapisho keeya enye.
 - Eitodoluaki Sinyatisho e Nkai te nkaraki ina yieunoto o lasarr, pee eiwuang'ieki eng'oki, pee etum oltung'ani enyikakinoto e Nkai.
- **Kaji eiko ena atini teneiteng'en iyiook inchere keata Enkai empiris? (kenyorrisho, keata olong'urr tialo ilaing'okok, nenana oshoke, neton ake eirorie oltung'ani)**
 - Eirorie Enkai Eliya, naa ore eimu ninye, neirorie iltung'ana tenebo olaiguanani.
 - Neisho Enkai Isiraeli erishata nairridunye eseremare, naserem Baal.
 - Neitodol Enkai iltung'ana engolon enye pee eretu ninche metushukokinoto ninche ninye.
 - Nerrip Enkai Eliya, hoo naa olaing'okoni sii ninye makewan.
 - Neng'amaa Enkai enkomono e Eliya, nateomono te nkirukoto.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Eibonuo apa Eliya Olameyu anaa enaitanapa ninye Enkai, neewuo ilo ameyu.
 - Keisiligayu Enkai oleng' naa ninye natomituo oloiboni lenye.
 - Keisiligayu Enkai pee eitoduaa Sinyatisho enye tialo Isiraeli.
 - Anyaaka Enkai airriu enchan anaa apeu enatejo kairriu.
 - Nerrip Enkai Isiraeli, iltung'ana lenyena gelunot apa oishorunye enkisiligata inchere kepukunye kenya ake olaitajeunoni. Neipotu ninche aipotoki enkirridunoto.

KAINYIOO KINTENG'ENA ENA ATINI NAIPIRTA OLTUNG'ANI?

- **Tia oitoi eitodol iyiook ena atini inchere ore oltung'ani naa olaing'okoni, nenarikino enkitamioto tenkaraki eng'oki enye?**
 - Ore anaa enaibala, netaasishore Enkai olameyu aitame Isiraeli tenkaraki eseremare enkitanyaanyukoto.
 - Etumutate iloibonok pooki le Baal tenkaraki eomonoto oo nkitanyaanyukot nairae Enkai.
 - Nejo Ahab aitolonyaki, Eliya tialo olameyu sapuk oyewuo, alang' ina nagira apa aomon enkitanyaanyukoto.
- **How does this story show that man needs God and is helpless to save himself?**

- o Meidim olosho loo Siraeli aitajeu ate teilo ameyu sapuk. Enkai ake, te rishata enye, naidim ayau enchan.
- o Meidim apa Eliya atorripo kewan tenemetii Ahab.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- **Tia oitoi, eitodolu ena atini inchere eidim ake oltung'ani ayeyu enetii Enkai te nkoitoi e Nkai ake (anaa enajo enkipankata e Nkai?)**
 - o Keiba Enkai eseremare oo nkitanyaanyukoto meidimayu apa pee epuonu iltung'ana enetii Enkai teina oitoi. Keidim ake aetu enetii ninye te nkoitoi enye – eirridu ing'ok enye, nepik enkirukoto enye atua ilo aitajeunoni olotu.
 - o Etaasa apa Eliya anaa enaitanapa Enkai ninye, nerikoki iltung'ana enetii Enkai anaa enayieu Enkai.
- **Tia oitoi kidol inchere lasima pee eata oltung'ani enkirrudunoto peyie etumoki aitishipa Enkai, neitajeuni teina?**
 - o Ore tena atini, ore metii enkirukoto nemetii enkirrudunoto, neyau Ahab emion sapuk oo iltauja tialo Ilyahudi.
 - o Etonyorryayie Enkai enkirukoto e Eliya eton eitu Eshetu olperere.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Amaa naa taata teneton eata Enkai engolon neton eitore nena pooki naitobirua, kainyioo elimu ina tenkitoria enye naata te shumata iyie? Kainyioo elimu terishata eng'oloto tialo iyie?
- **Kainyioo olameyu otii atua enkishui ino? Kainyioo nena golot nataa ine rishata naado nigira aima? Tia oitoi kintagol iyie ena atini? Toomono Enkai, olaitoriani mikinchoo eretoto o engolon.**
- **Ore enkishui o lairukoni naa entoki nagol. Kakua baa naagol natii oltau lino, naagira agilunore eyieunoto e Nkai? Kainyioo etii osiligi lino alang tenisilig Enkai mikintajeu iyie?**
- Ketii entoki niyieu oleng' tiatua enkishui ino, nitaanyua erishata naado, neton ake igira aanyu? Toliki ilo liboitare teine.
- Kanu itipika kewan ewueji e abori oleng', nemeishiaa pee itumoki ataretu ilkulikae tiatua enkishui ino?
- Kainyioo te nkishui o to ltau lino oshi ing'oru iyie oleng'? kakua wuejitin tiatua oltau lino metii toki arashu naisiu?

26. KELIKI ILOIBONOK ENAIKUNUNO OLAITEJEUNONI

Isaya 7:14, 53:12, Olkerempe le Enkai 16:10, 22:16-18, 41:19, Mika 5:2, Sakaria 11-12, Yeremia 31:31-33, Ezekiel 36:26-28

Neirriu Olaitoriani iloibonok kumok pee eikok iltung'ana le Nkai enaipirta enkiguena Enkai tenkaraki ing'ok enye. Neliki iltung'ana sii enaipirta olng'ur le Nkai teneirridu ninche nepik osiligi lenye atua Enkai. Neitadamu sii ninche enkisiligata o Laitaejeunoni oisiligie apa ninche te rishata nalakua. Nejoki, "Eatae obo laa ninye olotu nelotu aitajeu ntae too ng'ok inyi." Nejo oloiboni le Nkai Isaya, "Ekeiu ninye eselenkei nemeyiolo olee. Keipoti ninye aajo Emanueli nchere Enkai tenebo iyiook. Ekeipoti sii aajo Olkitok le Seriani. Nebik enkitoria enye entarasi." Nejoki sii ore ilo Aitajeunoni ketiu ninye anaa olkuo lo lasar, keisilisili kake meng'or ninye kewan, kesukenyi ninye, neye keeya torrongo oleng' pee elak esile pooki oo ng'ok ang'. Kake nejo sii iloibonok kepiu ninye aing'uaa ilootuata.

Neibonu iloibonok kulie baa kumok naasa tenkaraki Olaitajeunoni. Nchere kepuku Olaitajeunoni eing'uaa Bethlehemu, ore inkaik o nkejek enyena naa keremi ninye, kemiri sii te shekeli tomoni uni enkosholai, kekaldaa sii olchore lenye, keshei sii tenebo ilapurrok, neosh inkukuo tenkaraki olkila lenye.

Nelimu sii iloibonok naipirta olning'o ngejuk laa kitabari eimu Olaitajeunoni lo Siligi. Neuro Enkai eimu Yeremia ejo, "Etigila iltung'ana laainei olning'o lai kake ekaitoki aitobir o likae ning'o ng'ujuk o ninche. Ekapik inkitanapat aainei atua indamunot enye naiger ninche tiatua iltauja lenye. Ekaaku nanu Enkai enye neaku ninche iltung'ana laainei."

Nejoki Olaitoriani oloiboni Ezekiel entoki ake naikununo neijia ejo, "Ekaaisho intae oltau ng'ujuk napik enkiyang'et ng'ujuk atua iltauja linyi; ekaitaiyu tiatua ntae oltau lo soit napik oltau le nkiring'o. Napik Enkiyang'et ai atua ntae naisho intae entusuj inkitanapat aainei."

Ore pee eidip iltung'ana aatushukoto aashom Yerusalem eing'uaa eararoto e Babylon o enchetata Enkaji e Nkai negira Enkai eitu eitoki airorie ninche tiatua ilarin iip oong'uan. Kake ore teina rishata emoyian o sinaitin ti abori enkitoria o loreren netii kulikae Lyahudi leton ake edamu enkisiligata o Laitajeunoni oyoki alotu. Neaku neanyu ninche ninye te enkisiligata osiligi.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Ketii embaa tiatua enkishui ino niata eyieunoto oleng' terishata naado eton ianyita oleng'?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI?

- **Kaji eiko teneitodolu ena atini nchere keisiligayu Enkai?**
 - o Nejo Isaya: keiu ninye eselenkei nemeyiolo olee. Keji enkarna enye Emmanueli nchere Nkai tenebo iyiook, olkitok le seriani.

- Nemeiting' enkitoria enye intarasi. Ketiu ninye anaa olkuo lo lasar.
- Keye ninye pee elak esile oo ng'ok ang' pooki. Neisilisili ninye kake meng'or ninye kewan.
- o Nejo kulikae oibonok: Kepiu ninye aing'uaa ilootuata. Keing'uaa ninye enkanasa e Bethlehem. Keremi inkaik oo inkejek enyena.
 - Kemiri ninye te shekeli tomoni uni enkosholai, kekaldaa olchore lenye, keshei ninye tenebo ilapurrok.
 - Neosh inkukuo tenkaraki olkila lenye.
- o Ainyoo Olning'o ng'ejuk eimu Yeremia tenebo o Ezekiel?
 - Eibeleyenya indamunot enye o iltauja lenye. Keaku Enkai enye neaku ninche iltung'ana lenyena.
 - Neisho oltau ng'ejuk le nkiring'o neitayu oltau lo soit neisho Enkiyang'et sinyati metareto ninche nesuj inkitanapat.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Keata tipat teniyolou ororei le Nkai niashore inkiteng'emat enyenak tiatua nkishui ino. Tena iruk Ororei le Nkai ajo kesipa neisiligayu, amaa, kaji inko pee intodolu ajo keata tipat te iyie?
- Kakua nena kisiligat Enkai? Kakua nena naa kegol te iyie pee isilig? Kaji inko pee irridu tiatua ina kewan ino nemeiruk?
- Keasishore Enkai iltung'ana aashu iloibonok airorie iltung'ana tiatua eararoto. Igira aisho Enkai mikitaasishore pee irorie iltung'ana esipata enye?
- Ore lelo Lyahudi oisiliga Enkai neanyu tenkisiligata teng'iriata ina olong' Olaitajeunoni oyooki alotu. Neisho ninche osiligi. Kaji itumie iyie osiligi te kuna olong'i o too nkolong'i naapuonu?

Enaibon o Lning’o Musana Naipirta Olaitajeunoni Olotu

Isirat loo Nkisiligat

Isaya 9:7
 Mika 5:2
 Daniel 9:25
 Isaya 7:14
 Yeremia 31:15
 Hosea 11:1
 Isaya 9:1-2
 Olkerempe le Nkai 110:4
 Isaya 53:3
 Isaya 11:2
 Sakaria 9:9
 Olkerempe le Nkai 41:9
 Sakaria 11:12-13
 Olkerempe le Nkai 27:12
 Isaya 53:7
 Isaya 50:6
 Olkerempe le Nkai 69:4
 Isaya 53:4-5
 Isaya 53:12
 Olkerempe le Nkai 22:16
 Olkerempe le Nkai 22:6-8
 Olkerempe le Nkai 69:21
 Isaya 53:12
 Olkerempe le Nkai 22:18
 Olkerempe le Nkai 16:10
 Olkerempe le Nkai 68:18
 Enkiterunoto 12:3
 Enkiterunoto 3:15

Isaya 11:11

Enaibon

Kejung’ ninye olorika lenkitoo le Daudi.
 Etoiuoki te Bethlehemu
 Kanu eini
 Keiu eselenkei nemeiyiolo olee
 Keari inkera kumok.
 Neisik alo Misiri
 Keisiaisho te Galilaya
 Olapolosani laaijo Melkizedek.
 Neany Isiraeli ninye.
 Kulie pukunot enyena.
 Elotunoto enye e Yerusalem.
 Kekaldae orchore lenye
 Nemiri te shekeli tomoni uni.
 Neiteenikini ninye.
 Negira ninye
 Neari nenotakini.
 Neibayuni pesho.
 Neisilisili tenkaraki ilkumok.
 Etashoki tenebo ilapurrok.
 Neremi inkaik o nkejek enyena.
 Neikoroji ninye.
 Neishori ninye enaisho o suguroi.
 Neomonoki ilmang’ati lenyena.
 Neosh inkukuo tenkaraki olkila lenye.
 Kepiu aing’uaa ilootuata.
 Keilepieki aaya shumata.
 Ore eimu ninye nelotu enkisiligata e Abraham.
 Ninye eishoi e nkitok napurd elukunya o lasurai

Eing’uaa olgilata le Daudi

Isirat le Nkitabaroto

Matayo 1:1
 Matayo 2:1
 Luka 2:1-2
 Matayo 1:18
 Matayo 2:16
 Matayo 2:14
 Matayo 4:12-16
 Ilhebrania 6:20
 Yohana 1:11
 Luke 2:52
 Matayo 21:1-11
 Marko 14:10
 Matayo 26:15
 Matayo 26:59-62
 Matayo 26:62-63
 Marko 14:65
 Yohana 15:23-25
 Matayo 8:16-17
 Matayo 27:38
 Yohana 19:37, 20:25-27
 Matayo 27:39-44
 Yohana 19:29
 Luka 24:34
 Marko 15:24
 Luka 24:1-8
 Luka 24:50-51
 Ilgalatia 3:14-29
 Ilhebrania 2:14,15;
 Embolunoto 20:2,3,10
 Matt 1:1-17

Neiger olkipaaret Paulo ajo ore Irorei loo Lning’o Musana naa oloip le nena naapuonu tiatua Yesu. (Ilgalatia 2:17).

27. ELIMUNOTO O EINOTO E YESU

Luka 1:5-2:20; Matayo 1

Negiroo ilarin iip oong'uan eidipa Enkai airorie Israeli eimu iloibonok. Negira Enkai pi, naa ore Ilyahudi nejing' atua enkitoria o Ilroma. Kake ore enkolong' nabo, neitoki airo Enkai! Neirriwaa olmalaika meirorie Zakaria, obo lo lopolosak le Nkaji e Nkai. Neliki ajo ore Elisabet, enkitok enye,naa keiu enkayioni nalotu alimu elotunoto o Laitajeunoni lo siligi. Kake eitu eiruk Zakaria Enkai amu etaa morua ninye o nkitok enye nemeata hoo enkerai nabo. Kake etaasa Enkai enetejo neu Elisabet enkayioni naji Yohana. Naa ninye olikioo ti ong'ata enaikununo elotunoto o Laitajeunoni.

Ore eidipa ilapaitin ile eirorie olmalaika Zakaria, neitoki Enkai arriu olmalaika oji Gabrieli enkop e Galilaya enkanasa e Nazareti enkaji entito nemeyiolo olee naji Mariamu. Ore ninye naa enkanashe Elizabet. Etisiraki Mariamu olupayan oji Yosef laa ololmarei le Daudi.

Nejoki olmalaika Mariamu, "Taku enya, na kirotet e Nkai." Ore Mariamu neing'asia neurishoyu. Nejoki Gabrieli "Miurishoyu. Kitamayiana Enkai naa iuu enkayioni nimpot ajo Yesu. Naa keaku kitok neji Oinoti lo Lotii Shumata aisul. Keisho Enkai ninye olorika le nkitoo le Daudi menye lenye. Neitore olgilata le Yakobo intarasi. Nemeiting' enkitoria enye."

Ore pee eiylou Yosef enaikununo enutai e Mariamu, nemeyieu nesul ninye amu oltung'ani loo sipat neiyieu neleliari aing'uaa. Kake ore eton eitu eas neijia, nelotu olmalaika tenkidetidet nejoki, "Yosef, miurishoyu iya Mariamu anaa enkitok ino amu, ore enutai naata Mariamu eno ltau Sinyati. Naa keiu enkayioni naa impot enkarna enye ajo Yesu, enkipirta enye 'Olaitoriani oitajeu,' amu keitajeu iltung'ana lenye too ng'ok enye." Ore pee edumunye Yosef tenkidetidet enye, nerik Mariamu anaa enkitok enye kake eitu eirrag o ninye eton eitu eini Yesu.

Ore etolusoitie ilapaitin ile etoiwuoki Yohana netaa keisho Mariamu. Ore ina kata nejo olkinki lo Roma inchere lasima ore iltung'ana pooki pee eshuko eneing'uaa too nkuapi enye pee etumi aakena tenkaraki kodi. Ore Yosef neshuko alo enkanasa e Bethlehem naing'uaa olmarei le Daudi pee etumi aigero tenebo Mariamu.

Neaku kumok iltung'ana ootushukote aapuo Bethlehem neaku metii ewueji neirragie Yosef o Mariamu amu eipute. Neaku enotito olale airragie. Ore etii ine, neu Mariamu enkayioni neishopoki inkilani e keraisho neirragie te mpeut oo inkishu.

Ore te ina kop netii ilchekuti ootoni aarip intare kewarie. Neipang'aki olmalaika lo Laitoriani neimerlelu esikar o Laitoriani too nkaloli pooki, neiuureishoyu ninche oleng'. Nejoki olmalaika ninche, "Emiureishoyu amu ilomon supati le ng'ida kitok ayau, neaku too ltung'ana pooki, amu ore te nkang' e Daudi, etoiwuoki Olaitajeunoni, te nkaraki intae, laa ninye Kristo, Olaitoriani. Naa ele omonekie te intae; itumutumu elooyo naishopokino nkilani e keraisho, neirragita te mpeut oo nkishu." Neboitare ilo malaika, olorora kitok le shumata oisis Enkai ejo, "Meisisi Enkai te shumata naisul te pooki, neaku osotua tena kop, too ltung'ana pooki laa ninche eshipakino ninye!"

Ore pee epuo lelo malaika shumata aaing'uaa ninche, nejokino ilchekuti, "Enyeito emape aabaya Bethlehem, aadol ena bae nataase naitayiolo iyiook Olaitoriani." Neisarrisar aapuo neinepu Mariamu o Yosef, neirragie elooyo te mpeut. Ore pee edol neinosu ninche lomon ootiaakaki te nkaraki ina looyo. Ore lelo pooki ootoning'o nena naatolimutuo ilchekuti neing'asia. Kake eiteng'ela Mariamu nena baa pooki edamu to ltau lenye. Neshuko lelo shekuti eisho Enkai enkitoo neisis too mbaa pooki naatoning'o o naatoduaa anaa enatiaakaki ninche.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Amaa, indim atadamu erishata tiatua enkishui ino nintadou kewan pee iret ilkulikae?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI O YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Keisho Enkai Elisabet enkidimata pee eisho ata tenaa moruo.
 - Eishoo Enkai Mariamu metunutayu to Ltau Sinyati.
 - Etaasishore Enkai enkitanapata o Laiguanani lo Roma pee epuono Mariamu o Yosef Betlehem anaa enetejo iloibonok lo Israel.
 - Etareto apa Enkai Mariamu metoiu Yesu ata tiatua ewueji nemesidai.
 - Neirriu Enkai ilmalaika pee elimu einoto o Laitajeunoni.
 - Neisho Enkai Mariamu o Yosef ewueji pee eisho o pee errip Enkerai.
 - Etegelua Enkai ang'as alikioo ilomon supati too lchekuti aaisinak mme too ilkarsisi.
- **Kaji eiko teneitodolu ena atini nchere keyiolo Enkai pooki toki?**
 - Keyiolo apa Enkai erishata o ewueji neinyeki Mesia. Neyiolou sii Enkai iltung'anak oasishore pee eyau Olaitajeunoni.
 - Etolikioo Enkai Zakaria enaikununo einoto e Yohana. Neas enetejo.
 - Neliki Enkai Mariamu o Yosef neasayu ake anaa anatiaka.
 - Neyiolou Enkai iltauja loo lchekuti ajo kelikioo ilomon supati.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Eibale enkitoo e Nkai o esinyatisho enye tiatua ilmalaika.
 - Neitame Enkai Zakaria tenkaraki neitu eiruk.
 - Eturishote ilchekuti amu etodua esinyatisho o magilisho e Nkai!
 - Ore amu esinyati Enkai naa olaing'okoni oltung'ani, kiyieu Olaitajeunoni oleng'!
 - Ore Yesu, Olaitajeunoni le Nkisiligata etoiwuo entito nemeyiolo olee. Ore papai lenye naa Enkai, mme oltung'ani otoiwuoki too ng'ok.
- **Kaji eiko teneitodolu ena atini nchere keata Enkai empiris? (enyorrata, neata olng'ur too laing'okok, esupatisho, neuro o ltungana)**
 - Eewuo Enkai pee eaku tenebo iyiook. Etijing'a enkop ang' natii inyamalaritin o ng'ok kumok amu kenyor iyiook oleng'.
 - Neisho Enkai Zakaria, Elisabet, Mariamu, o Yosef omom ata tenaa ilaing'okok ninche.
 - Nebaiki Enkai iyiook too ltung'ana liabori anaa too ilchekuti, olfundi, entito aisinani.
 - Etoiwuoki Olaitajeunoni te mpeut oo inkishu pee eitodol enyorrata oo ltung'ana.

- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Eitabayie Enkai enkisiligata enye pee eyau Olaitajeunoni.
 - Nejo Enkai inchere eini Olaitajeunoni te Betlehem.
 - Nejo sii eini te ntito nemeyiolo olee.
 - Nejo sii eini te ishoi e Daudi.

KAINYIOO KINTENG'ENA ENA ATINI NAIPIRTA OLTUNG'ANI?

- **Kelimu ena atini nchere keata oltung'ani tipat te Nkai?**
 - Eirriwua Enkai Enkerai enye metareto iyiook.
- **Kelimu ena atini nchere ore oltung'ani naa olaing'okoni neiririkino tesipata enkitamioto tenkaraki ng'ok enyena?**
 - Eee, amu keyieu oltung'ani Olaitajeunoni oleng'!
 - Ore Zakaria naa oltung'ani le Nkai, kake neton ake enyok aarare aasuj Enkai.
 - Neurishoyu ilchekuti tenkaraki inkitoo e Nkai amu ilaing'okok netinyikaka ninche esinyatisho e Nkai.
- **Kelimu ena atini nchere keyieu oltung'ani Enkai amu meata enkidimata naitajeunye kewan enye?**
 - Meidim oltung'ani aitobira enkoitoi enye openy. Kake Enkai ake naidim airriu Olaitajeunoni.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- **Kelimu ena atini nchere elotu ake oltung'ani enetii Enkai te nkoitoi e Nkai? (Teyieunoto o enkipangata Enkai?)**
 - Elotu enjeunoto eing'uaa Olaitoriani. Metii ai oitooi nikintajeu too ing'ok inono.
 - Amaa, inchoo Olaitajeunoni erishata pee ejing enkishui ino, ata atua inyamalaritin inono.
 - Amaa, itang'amua Olaitajeunoni oirriwua Enkai! Anaa irridua in'gok inono nisilig Kristo.
 - Amaa keya nijo mikiyiolo Enkai amu itii abori alang' kulikae tung'ana? Arashu mikinyor amu miata tipat anaa kulikae? Idol tiatua ina atini ajo kenyor Yesu ilotii abori oleng'. Etoiwuoki tenebo ilaisinak.

28-A. YOHANA OLAIBATISANI O EIBALUNYE YESU

Yohana 1:19-31; Mattayo 3

Ore ena naa shakenisho e Yohana te Yesu. Ore pee ebulu Yohana neitayiolu kewon Israel. Nebuaku torpurkel nejo “Erridutu amu etinyikua enkitoria e shumata.” Neibatisa lelo pooki oirridutua tolkeju le Jordan.

Nedumakino ninye isiamon olorere epuo aaning’ nkiteng’ enat enyena neibatisai. Kake ore lelo apolosak kituak olaiteng’ enak loo nkitanapat, olarikok loo Israeli netobiko ninche te Yerusalem neirriwaki Yohana Olaibatisani ilkiliku lenye. Nejoki ninche ninye, “Iyie doi Kristo?” Newaliki Yohana ajoki, “Mara nanu Kristo.” Neikilikuan aajoki, “Ira Eliya?” Newal Yohana ajo, “A’a” “Paa ira naa ng’ae!?” Nejoki Yohana, “Ara oltoilo lolobuaku tióng’ata, ‘Entorioi enkoitoi o Laitoriani.’ Etii ilo olotu tesiadi nanu, olaa ninye olkitok tenanu, amu etii ninye tedukuya nanu.”

Ore ake teina rishata, nelotu sii ninye Yesu neibatisa Yohana ninye. Ore ake pee eilepu tenkare, nedou Enkiyang’et Sinyati anaa enturkuluo adoiki ninye, nebolo shumata, nepuku oltoilo te shumata nejo, “Enkerai ai ena nanyor, natishipe teninye.”

Ore tenkolong’ nasujita ina, nedol Yohana Yesu eloito tenebo esiamo kitok, nejo, “Ing’ura! Olkuoo le kerr le Nkai oya ing’ok enkop! Ele taa atolimuo ajo, ‘Ore tesiadi nanu elotu o ltung’ani oituruk tenanu. Ninye olkitok tenanu amu etii ninye tedukuya nanu!’”

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Amaa, kakua tokitin tiatua oltau lino arashu enkishui ino nindim aing’oru oleng’? Ketii iwuejitin naisiu titua enkishui ino? Kakua?

ENKATINI: Toliki enkatini ningiligili tenebo anaa olturrur pee eyiolo pooki ng’ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG’ENA ENA ATINI NAIPIRTA ENKAI ARASHU YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?**
 - o Etoriko Enkiyang’et Sinyati iltung’ana pee epuo tiatua olpurkel ainining’ Yohana.
 - o Nejo Yohana inchere oltung’ani osujita ninye kitok oleng’ alang’ ninye.
 - o Nebol Enkai keper pee eirriwaa Enkiyang’et anaa enturkuluo.
 - o Nejo Enkai, “Ore Yesu naa Enkerai ai, neaku Enkai ninye.” Nejo sii, “Natishipe te ninye.”
- **Kaji eiko teneitodolu ena atini nchere keyiolo Enkai pooki toki?**
 - o Neyiolou Enkai enaiko Yohana pee eibalunye Yesu too ltung’ana.
 - o Neyiolou sii ajo aing’ai Yesu.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing’ok, neipotu keeya metaa olekoisiayio loo ng’ok)**
 - o Etegelua Enkai Yohana pee eas eisiai sinyati oleng’ pee eitobir enkoitoi o Laitajeunoni.
 - o Neipot Yohana iltung’ana meirridu too ng’ok enye neibatisa sii pee eituku iltauja lenye tialo ng’ok enye.

- o Ore Yesu naa kitok oleng' alang' Yohana. Ore amu olaing'okoni Yohana naa eisinyati Yesu, menare pee eibung' inamuka e Yesu.
 - o Neitodolu Enkai sinyatisho e Yesu pee ebol shumata neirriu Enkayiang'et Sinyati anaa enturkuluo naa pee eipot ajo Enkayioni Nanyorri.
 - o Nejo sii Yohana, "Ing'ura! Olkuoo le kerr le Nkai oya ing'ok enkop!" Te kulo rorei eitadamu iyiook enaikununo ilkuoo loo lasarri tiatua Osotua Musana anaa olkuo le Pasaka. Lasima pee eaku kila olkuo bayaroti. Meidimayu tenayau olkuo oata entoki kiti nemesidai oleng'. Meng'amu Enkai pi negoro teneas neijia! Neibukoo osarge lo lkuo tenkaraki ing'ok oo ltung'ana pee eiwooyo engoro e Nkai.
 - o Ore amu Yesu Enkerai Enkai, ore Yesu, naa Enkai, neata sii impukunot enyena.
 - o Ore Yesu naa supat pi naa oloitashe sii too sipat, etijing'a enkishui anaa oltung'ana ata hoo tenemeata ing'ok.
- **Kaji eiko teneitodolu ena atini nchere keata Enkai empiris? (enyorrata, neata olng'ur too laing'okok, esupatisho, neiro o ltungana)**
 - o Eirorie Enkai iltung'ana tiatua Yohana.
 - o Neramat Enkai Yohana tiatua olupurkel
 - o Neibeleyen Enkai iltauja loo ltung'ana tiatua olupurkel pee eirridu neibatisai.
 - o Neisho Enkai ilaing'okok erishata pee eirridu too ing'ok enye.
 - o Ore Yesu, Enkerai Enkai, naa eitadoyie kewan pee elotu enkop anaa oltung'ani pee eishu tenebo iyiook. Neaku "Enkai tenebo o iyiook."
 - o Ore Yesu, naa "Olkuo le Nkai oya ing'ok enkop." Neitadamu iyiook ajo kelak osarge le nkerr esile oo ing'ok. Kake tiatua Osotua Musana, lasima neigil ilapolosak olasar kila enkolong', kake ore Yesu, naa Olkuo Oitabayie! Olasar otabayie!
 - Eetijing'a Yesu enkishui ana oltung'ana ata hoo nemeata ing'ok
 - **Keitodolu enkatini ajo keisiligayu Enkai? (meibeleyenya, neas inaja, neitabaya nkisiligat.)**
 - o Ore apa tiatua oloiboni le Nkai Isaya, neishoru Enkai osiligi ajo kelotu "oltoilo oishirita to lpurkel, 'Intobira enkoitoo o Laitoriani." Ore Yohana, naa ninye ilo.
 - o Nejo Enkai tiatua Yohana ajo kelotu likai kitok alang' ninye. Ore Yesu, naa ninye ilo.
 - o Ore Yesu, naa enkitabaroto o lkuo lo lasar tiatua Osotua Musana pooki – Pasaka, olkuo le Abel, ing'uesi natuata tialo nkilani e Adam o Hawa, o kulikae kuoo. Ore Yesu enkiting'oto o lasari!
 - o Ore Yesu naa Olaitajeunoni oisiligishore Enkai te nkurma e Eden nelotu tiatua eishoi e nkitok amir Shetani.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- **Kelimu ena atini nchere ore oltung'ani naa olaing'okoni neiririkino tesipata enkitamioto tenkaraki ng'ok enyena?**
 - o Neipotito apa Yohana ilaing'okok pee eirridu too ng'ok enye pee eitobir ate tenkaraki elotunoto e Nkitoria e Nkai.
- **Amaa, Kelimu ena atini nchere elotu ake oltung'ani enetii Enkai te nkoitoo e Nkai? (Teyieunoto o enkipangata Enkai?)**
 - o Ketii enkoitoo nabo ake pee etum oltung'ani empalakinoto, naa Yesu, olkuo le Nkai.
- **Amaa, Kelimu ena atini nchere keishiaakino pee eata oltung'ani enkirukoto o enkirridunoto tenkaraki pee eitiship Enkai neitajeuni?**
 - o Keitobira Yohana iltung'ana tiatua enkirridunoto o enkibatisa pee eng'amu Olaitajeunoni eitukuo iltauja lenye.
 - o Eitagolo Yohana iltung'ana pee epik osiligi lenye tiatua olkuo le Nkai, Yesu.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aiteng'enayu.)

- o Amaa,, irridua too ng'ok inono nimbeleyenya enkishui ino te Yesu pee itum mpalakinoto?

- o Amaa, iyiolo iyie ajo aing'ae Yesu te sipata? Oltung'ani pooki, naa Enkai pooki sii. Olkuo le Nkai? Amaa, teniruk ina, keidimayu pee eibelekenya enkishui ino?
- o Amaa, tiatua enkishui ino, ainyioo igira aing'oru? Anaa iltung'ana oshomo olupurkel pee eing'oru toki.
- o Keas Enkai enajo. Nebayie osiligi lenye pee eyau Olaitajeunoni. Amaa keidim Enkai aitabai eneyieu tiatua enkishui ino? Kebaya inkisiligat enyena te iyie?
- o Amaa, iyiolo inkisiligat e Nkai te iyie? Indim atayiolo pee iyiolo ororei le Nkai. Keata inkisiligat kumok sidain oleng'!!!

28B. Etetema Shetani Yesu (*metii empisha)

Matayo 4:1-11, Luka 4:1-13

Ore pee eidip Yohana aibatisa ninye, nerikoo Enkiyang'et Sinyati atua orpurkel oti pee erisha Yerusalem o Yeriko. Nebik teine nepukoo inkolong'I artam o nkewaritin artam pee elotu shetani atem ninye. Neitu ninye enya toki nelioo ajo ore etulusoyie ina rishata pooki netiru ninye esumash.

Nejoki Shetani Yesu "Tena kesipa ira enkerai e Nkai, oloyala lenye, intodolu naa. Tiaki kulo soito metaa mukateni."

Kake nejoki Yesu Shetani "Ejo ilkegerot, meishuyie oltung'ani emukate ake, kake pooki rorei opuku tenkutuk e Nkai."

Nerik Shetani ninye Yerusalemu, neisho ninye meitasho te ntopij enkaji, "Tena ira iyie enkerai e Nkai, tusulai kewan enkop! Amu ejo ilkigerot 'keitanap Enkai ilmalaika pee king'or ninche iyie'. Kejo sii, 'eikinap ninche too nkaik enye, pee mikinkob osoit enkeju ino'".

Kake newaliki Yesu, "Kejo sii, 'mitem iyie Olaitoriani Enkai ino'".

Ore aigil, nerik Shetani, Yesu oldoinyio oado neitodol ninye inkitoriat pooki e nkop o enkitoo. "Enkaisho nanu iyie intoria kuna pooki kitoriat o enkitoo pooki. Amu aishooki, naa kaidim nanu aishoo iyie arashu likae ake tung'ani ayieu. Keaku inono pooki. Ore ake enias naa pee kigilaki kung aserem nanu."

Newaliki Yesu ninye te rishata nabayie, "Shomo Shetani, amu etisiraki! Teserema Olaitoriani Enkai ino aa ninye ake openy."

Ore pee eidip Shetani atetema ninye ina rishata nelo aing'uaa Yesu nepuonu ilmalaika aisiai ninye. Ore te nkishui enye, netem shetani te ng'oki oshi nataasa iltung'ana ... arashu etadamutua pee eas. Kake ore Yesu neirisha aanyare pooki rishata natetemaki shetani ninye, neitu aekata eas eng'oki.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Tia oitoi idol anaa enkitema shetani te ngolon tiatua enkishui ino taata oshi?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

Kainyoo kigira aayiolou naipirta Yesu?

- **Keitodol iyiook ena atini inchere ore apa Yesu naa oltung'ani ake sii ninye? Ti ai oitoi?**
 - Etetemaki ake sii ninye anaa ake kulikae tung'ana.
 - Etotiro apa esumash.
 - Keyieunoyu apa pee eomon pee eirishakino Enkai. Keyieu apa Enkiyang'et Sinyati pee eretoo ninye.
 - Etetema Shetani ninye anaa oshi ake enaiko tenetem ilkulikae tung'ana. Eimu iyieunot osesen, olwuasa, tenebo olorika sapuk.
- **Kainyioo pee eata tipat inchere ore apa Yesu naa oltung'ani?**
 - Eimayie Yesu nena golot emion o ntemat narikok metaasa ing'ok anaa pooki likae tung'ani/tung'ana.

- Ninye Yesu oidim aimai inikigura aimaa.
 - Eirishakine sii ninye Yesu enking'urata e Nkai natii engolon pee errip ninye, neisiai ninye tenebo ilmalaika.
 - Ore Yesu naa eishoi arashu olantererai otupukunye enkitok, anaa apake enaisiligishore Enkai to lchamba le Eden. Neini ninye anaa oltung'ani.
 - Ore ele antererai le nkitok naa peyie emir shetani. Neshuk olapa deket otupukuo tolchamba le Eden, amirr ninye. Ore tiatua ena atini nikidol eiterua Yesu amirr shetani.
- **Amaa ekidol tena atini inchere ore apa Yesu naa Enkai nasipa?**
 - (ORE TIATUA KULIKAE ROREI ...)
 - Tia oitoo eitodolu ena atini inchere keata sii ninye **Yesu engolon anaa Enkai?** (inchere keata enkitoria ninye oitoreisho, naa kitok neata enkitoo pooki)
 - Keata apa Yesu enkitoria pee ebuaki, neirish shetani pee emiraa ninye metung'uai ninye.
- **Kaji eiko teneitodolu ena atini nchere keyiolo Enkai (Yesu) pooki toki?**
 - Keyiolo apa Yesu shetani, o losekin lenyena.
 - Keyiolo apa Yesu isirat, o enaiko pee easishore ninche, aasishore ororei le Nkai aarare shetani o elejare enye te sipata.
 - Neitodolu apa Yesu eng'eno enye sapuk e Nkai too nkoitoo apa natawalikinye shetani. Naa keyiolo apa shetani oina nemetii toki atua ina lejare enye shetani.
 - Neyiolo apa Yesu inchere Enkai ake enare neseremi.
- **Kaji eiko teneitodolu ena atini nchere eisinyati Enkai (Yesu)? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Ore Yesu naa aisinyati. Meata eng'oki nataasa ninye, hoo neimayie intemat sapuki.
 - Etaasishore apa Yesu isirat le Biblia aitobiraki te nkoitoo sidai, nejo, "Etisiraki ajo...."
- **Kaji eiko teneitodolu ena atini nchere keata Enkai (Yesu) empiris? (enyorrata, neata olong'ur too laing'okok, esupatisho, neuro o ltungana)**
 - Nebik Yesu aa Sinyati, olkuo le ker lemeata entibili, laa ninye olotu aaku olasarr loo ng'ok ten kop nalulung'a.
 - Ore tenkaraki empiris enye neitadou kewan, neitorok kewan aaku oltung'ani peyie etum aisiayia, neitajeu tung'ani.
 - Neitanyaanyukie Yesu kewan iyiook iltung'ana eimu emion naimayie o ntemat naimayie.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Ore Yesu naa ninye apa ilo antererai apa oisiligishore Enkai, peyie edek Enkai olasurai tolchamba le Eden.
 - Nemirr Yesu shetani, anaa apake enaisiligishore Enkai inchere ekemir.
 - Keisiligayu Yesu pee easishore ilkigerot. Osootua musana apa Biblia nagira Yesu aasishore.

KAINYIOO KINTENG'ENA ENA ATINI NAIPIRTA SHETANI?

- Ore Shetani naa olalejani.
 - Ore Shetani naa keasishore intokitin sidan anaa ilkigerot, alejie iltung'ana pee etum atusuj ninye.
 - Ore Shetani naa keasishore ilkigerot, kake kekordil ninche, aibelekeny esipata aita emonkoi.
 - Ore Shetani netetema Yesu, tenapa oitoo ake netetemie Adam o Hawa tiatua olchamba. Netem Yesu eimu esumash osesen, netem eimu olwuasa le nkiyang'et, netem eimu olwuasa le nkitoo aa inchere enkerai e Nkai ninye. Netem ninye meitoria kewan makewan, metorikinoyu Enkai enye.
 - Ore Shetani naa keyiolo enchalan eng'. Neyiolo enaiko tenetem iyiook.
 - Ore Shetani naa kepi oleng' inchere meata oltung'ani lemebaiki ninye, o metabaiki Yesu.
- **Tia oitoo etaarare Yesu nena temat?**

- Ore Yesu naa keyiolo apa ilkigerot newaliki Shetani eutaki ninye anaa enajo ilkigerot inchere kesipa kulo kigerot neata engolon sapuk.

○

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- **Keitodolu ena atini inchere keishiaakino neata oltung'ani enkirukoto tenebo enkirridunoto peyie etum aitishipa Enkai, neitajeuni te ina?**
 - Ore Yesu naa kenarikino, osiligi lang', nenarikino enkirukoto ang'. Amu etetemaki ninye, kake eitu ninye eas eng'oki.
 - Ore Yesu naa Enkai, nenarikino osiligi lang'.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- **Kakua oitoi etaasishore Shetani kitem iyie alej, nikitem aitapong'oo te nkishui ino? kakua oitoi kitetemie iyie, nanyaanyukie nena oitoi natetemie Yesu?**
- Tiakua oitoi arashu irubat enkishui ina ishal iyie, nena rubat oshi nikitemie Shetani iyie oleng'? (enkite lejare, ekintaapash enyorrata tialo ilkulikae, enkiborra oo nkonyek, enturreisho, olwuasa, enyorrata e kewan, olmarenke, o kulie natiu nejia?)
- Amaa iyie, kebaa empijan niata igilunore iyieunot o sesen lino pee itumoki airisha Shetani? **Tia oitoi kindim teniyiolo ororei le Nkai tenkiputakinoto atareto isiligi Enkai alang' tenisilig kewan ino?**

29. EIPOTO YESU ILOOITENG'ENI LENYENA

Luka 5:1-11, 27-31; 6:12-15

Ore eiding'akino iltung'ana aamanita Yesu einining'u ilomon le Nkai, neitashe Yesu te mbata e naiposha e Galilaya, nedol impeuti are eirrag te mbata e naiposha. Netupukutuo ilarreshok loo sinkir aapuo aaisuj irresheta lenye. Nejing atua empeut nabo, naa ene Simon, nejoki meturumoi peno aitalam enkop natoyio. Neton Yesu aiteng'en olorere etonita ninye ti atua empeut.

Ore pee eidip airoro nejoki Simon, "Terewa enegut nintadoikiki irresheta linyi enaiposha aabung' isinkir." Nejoki Simon, "Lo Kitok, kitaasishote enkewarie nalulung'a neitu kitum toki, kake ore amu itejo, kaitadoyio irresheta." Ore pee eiko neijia neibung olkito turrur loo sinkir neiteru aang'era irresheta lenye. Neyuku ilchoreta lenye Yohana o Yakobo otii enkae peut meetu aaret. Nepuonu, neiput impeuti pokira are, o metaa keimis.

Ore pee edol Simon Petero ina nebatata too nkejek e Yesu, ejoki, "Olaitoriani, tung'uayioki nanu amu, kara oltung'ani loo ng'ok." Amu eing'asie ninye o lelo ooboitare, te nkumoi oo sinkir oobung'a.

Nejoki Yesu Simon, "Miureishoyu; ore ebaiki taata, *iltung'ana* intorioo aibung." Neyau mpeuti enkop natoyio, neing'uaa pooki toki nesuj ninye.

Ore pee elusoo inkolong'i kuti nelu Yesu, nedol oltung'ani osotu kodi oji Lawi (ashu Matayu), eton te wueji nesotunye kodi; nejoki, "Tusujuaki nanu." Neing'uaa pooki toki, neinyototo asuj Yesu.

Neitoomon Lawi ninye to sirua kitok netii esiamo kitok oo loosotu kodi o kulikae ake oodaa te nebo ninche. Neing'unyung'unyaki Ifarisayo o lasirak aajo, "Ainyoo pee ing'arierie endaa niokishosho te nebo iloosotu kodi o laing'okok?"

Newaliki Yesu ajoki, "Imeyieu iltung'ana biyot olkitari, iloomuoi ooyieu. Eitu alotu aipot lelo supati kake ilaing'okok meetu aairridu."

Ore nabo olong', neilep Yesu alo oldoinyo aomon, neton enkewarie pooki eomonito Enkai. Ore pee ekenyu neipot ilooiteng'eni lenyena negelu tomon o aare ti atua ninche nejo ninche Ilkipaareta. Naa Simon (keipoto Yesu ninye ajo Petero) o Anterea olalasho lenye; o Yakobo o Yohana, o Matayo o Ikulikai tenebo Yuda Iskariot.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Amaa, naji matejo ira Yesu, tenilo agelu ilkipaareta tomon o are, kaji pasa etui iltung'ana ligelu iyie?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- Kaji eiko teneitodolu ena atini nchere keata Yesu enkidimata sapuk?
 - o Eshomo Yesu enetii Simon o Lawi,
 - o Engolon te shumata enkitobirata enkop. Nepik isinkirr atua irreshata

- o Engolon pee eitore Simon pee eshukokino atua enaiposha neitoki anyok.
 - o Etaasishore isinkirr neipot ilkipaareta lenyena neing'uaa esiatin enye nesuj ninye.
 - o Nedol Simon Petero inchere ore Yesu naa Enkai! Neing'asia! Neipot ajo, "Olaitoriani."
 - o Engolon pee eipot Lawi. Nesuju Lawi Yesu nemeata inkikilikwanat.
 - o Keata engolon pooki, neaku Enkai kewan.
- **Kaji eiko teneitodolu ena atini nchere keyiolo Enkai (Yesu) pooki toki?**
 - o Etayiolo ajo kaji eiko pee eibung' iltauja looloo Petero, Yakobo, o Yohanna.
 - o Etayiolo enaiko pee erresh isinkirr kumok.
 - o Keyiolo enkipangata enye pee eitaa kulo payiani ilarreshok loo ltung'ana.
 - o Neyiolou oltau le Lawi ajo kesuj ninye.
 - o Keyiolo pooki toki, neaku Enkai.
- **Kaji eiko tenitodolu ena atini nchere eisinyati Yesu? (Kaasipani, eibayoroti, keishoru nkitanapaat, keiba ng'ok, neitame ilaing'onkok, neyau enkeeye anaa elakinoto oo ng'ok.)**
 - o Ore pee edol enataasa Yesu neureshoyu Petero nedol esinyatisho e Nkai o ing'ok enyena. Nedol ajo meishiakino pee etii tenebo Yesu te sinyatisho enye.
 - o Ata isinkirr lasima eas enatejo Yesu!
 - o Ore esinyatisho e Yesu naa sapuk alang' ene Lfarisayo amu mme entoki o iasat osesen ake, kake entoki oo Itauja! Keyieu neibeleyen iltauja pee etum aitisinya iltung'ana oleng'!
- **Kaji eiko teneitodolu ena atini nchere keata Enkai empiris? (enyorrata, neata olng'ur too laing'okok, esupatisho, neuro o ltungana)**
 - o Eshomo Yesu enetii Simon o Lawi pee eipot ninche.
 - o Neisho ilarreshok sinkir kumok! Keleng' Yesu oleng'!
 - o Neitoduaya kewan too ltung'ana loo ng'ok anaa Simon o lkulikae.
 - o Negelu ilaing'okok, iltung'ana lemeata tipat te kulikai tung'ana, ilaisinak, pee easishore te siai enye kitok!
 - o Neitagol Simon nejoki, "Miureishoyu!"
 - o Keipot Enkai Simon Petero metarresho iltung'ani. Negira aitajeu iltung'ana kumok. Neasisho tenebo olaisiayani lenye Petero.
 - o Neipot Lawi, oltung'ani osotu kodi, oltung'ani lemenyor iltung'ana ninye, pee ejing esiai enye.
 - o Neiput Lawi te nchipai, hoo ninye tenaa etalama esiai neata dupoto sapuk! Empiris Enkai to Itau lenye! Neaku etoosho entaleng'o!
 - o Ore amu eibeleyenya Yesu enkishui e Lawi, Neyieu Lawi ilchoreta lenyena neyiolo Yesu sii!
 - o Nanya endaa tenebo ilaing'okok, ilemenyorri too ilkulikae tung'ana.
 - o Keyieu Yesu neaku oldaktari too ltung'ana oomoi too ng'ok, iltung'ana onyorraa ajo ilaing'okok.
 - o Keyieu ilaing'okok nepuonu enetii Yesu.
 - o Ketii intaleng'o tenenbo Yesu too ltung'ana oata emboron.
- **Keitodolu ena atini ajo keisiligayu Enkai (Yesu)? (meibeleyenya, neas enajo, neitabaya nkisiligat.)**
 - o Kegira Yesu aendelea eas enki'ang'ata enye pee eipot ilkipaareta.
 - o Neliki Simon o lkulikai pee eitoki aapik irresheta te nkare neisho isinkirri kumok.
 - o Etejo Yesu eewuo pee eret iltung'ana oomoi too n'gok.
- **Keitodolu enkatini ajo ore Yesu naa oltung'ani sii?**
 - o Etijing'a empeut pee elang enkare.
 - o Einosa endaa neok enkare.
 - o Keyieu eretoto e papa. Neomon Enkai.

KAINYIOO KINTENG'ENA ENA ATINI NAIPARTA OLTUNG'ANI?

- **Kelimu ena atini nchere keata oltung'ani tipat te Nkai?**
 - o Keyieu neasishore iltung'ana pee eas eisai enye, hoo naa ilaing'okok.
 - o Kenyor iltung'ana oomuoi too ltauja lenye. Nyena endaa tenebo ninche.

- **Kelimu ena atini nchere ore oltung'ani naa olaing'okoni neiririkino tesipata enkitamioto tenkaraki ng'ok enyena?**
 - o Keata Simon ilng'ashi te Yesu teneliki metipika irresheta enkare enkata e are.
 - o Nejo Simon, "Kara olaing'okoni. Meishiaakino natii tenebo iyie!"
 - o Kenyor Yesu teneret iltung'ana onyora ajo keata inyamalaritin oo ng'ok.(anaa Petero o Lawi)
 - o Eigurenare Ifarisayo kulikae tung'ana.
 - o Keiba Ifarisayo ilkulikae tung'ana.

- **Kelimu ena atini nchere keyieu oltung'ani Enkai amu meata enkidimata naitajeunye kewan enye?**
 - o Keureisho Petero te dukuya Yesu.
 - o Meata iloosotu kodi o ilaing'okok osiligi amu keata oloirerio!
 - o Ore ilaing'okok naa etiu anaa iltung'ana oomuoi oiyieu olkitari. Ore ing'ok naa emueyian nemeidim iltung'ana aishiu!
 - o Meyieu Yesu neret iltung'ana lemeidim atonyorrai ajo keata enyamali oo ing'ok. Eitu elotu enkop tenkaraki ninche, arashu "iltung'ana biyot."
 - o Eisiliga Yesu Enkai pee eret agelu ilikipaareta.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- **Kelimu ena atini nchere keishiaakino pee eata oltung'ani enkirukoto o enkirridunoto tenkaraki pee eitiship Enkai neitajeuni?**
 - o Eipanga Yesu ashet enkirukoto oo ilkipaareta. Neitodol eyieunoto enye pee eirridu nepik osiligi lenye atua ninye.
 - o Ore iltung'ana otinyikakitia Yesu te nkirukoto o enkirridunoto naa ketum omom enye.
 - o Ore iltung'ana lemeisilig Yesu naa iltung'ana oany aanyoraa ing'ok enye naa meng'amu Yesu ninche.
 - o Ata Yesu eisiliga Enkai Papa tiatua enkomono. Eisiliga shoreisho enye.
 - o Neing'uaa Simon, Yohana, o Lawi intokitin pooki nesuj Yesu! Ebaiki etapala Lawi biashara sidai oleng'. Keipotoki Yesu iyiook te nkirukoto eneba nji.
 - o Kindim atodol ajo meata inchere pee meng'amu Lawi ilchoreta lenyena aayiolou Yesu sii!
 - o Eton eata Enkai enkidimata? Keidim aibelenya oltau lino o enkishui ino? Ketii osiligi tiatua Yesu?
 - o Amaa, indim atoduaa ing'ok inono? Indim atonyorayie ajo imuoi too ing'ok? Naa miata osiligi tiatua kewan? Indim airridu too ng'ok inono?
 - o Amaa ijo ira kuti oleng' arashu olaing'okoni sapuk pee mikiyieu Enkai? Ekintagol ena atini? Amaa, ekindim Enkai ataasishore ata iyie?
 - o Amaa, iata olwuasa? Indim aigurenare kulikae tung'ana anaa ilaing'okok alang' iyie? Kainyoo kigira Enkai akiliki iyie tenakata?
 - o Keidimayu ajo ekimopotito Enkai ajo, "Intadoiki irresheta linono"? Arashu "Taasa entoki naje te nkirukoto"?
 - o Keing'uaa Simon Petero o Lawi intokitin pooki nesuj Yesu. Amaa, kainyoo doi eidimayu nikimopotito Enkai pee ing'uaa pee isuj Yesu?

30. ENKISHIUNOTO OLTUNG'ANI OILENYA, EMPALAKINOTO OO NG'OK Mark 2:1-12, Luke 5:17-26

Ore pee eidip Yohana aibatisa Yesu, nemanaa Yesu aiteng'enisho te nkanasa o nkanasa. Neaku ore pooki wueji nelo Yesu nesuj ilororani. Neman ninche ninye ometaa keitanyamal oleng'. Ore nabo olong' nejing' Yesu enkaji te Kapernaum. Neiteng'enisho, neiput olorora enkaji oleng' o metabaikei boo. Neaku kerumisho iltung'ana too lusien oo too nkutukajini enkaji. Negira pooki aaininingu' inkiteng'emat e Yesu.

Netii apa oltung'ani oilenya otii Kapernaum. Neata ilchoreta oong'uan, nedumu ninche ilo tung'ani oilenye o endapash enye aayaki Yesu. Kake eitu etum ninche empaash pee eitabaiki enetii Yesu. Neaku etakedo ninche shumata enkaji pee eng'er neitadoyio oltung'ani oilenye tedukuya Yesu tenebo endapash enye. Ore ake pee edol Yesu eneba enkirukoto e kulo shoreta nejoki, "Kitapalikiaki ing'ok inono." Netii ine ilaiteng'enak loo nkitanapat oogira aainining' Yesu. Ore ake pee ening' kulo rorei, negorokino Yesu oleng'. Nejo tiatua iltauja lenye, "Kainyoo pee eidim ninye atejo inji? Enkai ake makewan naidim atapalaki ing'ok!"

Kake etayiolo ninye Yesu indamunot enye, nejoki ninche, "Kaa nalelek?" Etenajo nanu, "Kitapalikiaki ng'ok inono," ana tenajoki, "Inyo! Tudum erruat ino! Shomo ang'!"? Kake ore pee itumutumu aatayiolo nchere keeta Enkerai e Tung'ani enkidimata tenkop napalakinyie ng'ok."

Ina pee ejoki Yesu ilo tung'ani oilenye, "Tudumunye! Tudum erruat ino! Shomo ang'!" Nedumunye oltung'ani alo, nedumunye nabo kata, nedum erruat enye neipung' alo tedukuya ninche pooki! Neing'asia ninche pooki oleng' neisho Enkai enkisisa nejo, "Eitu aikata kidol embae enking'asia naaijio ena!"

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Amaa, indim atadamu erishata itareto olchere lino ataa tenaa kegol te iyie? Arashu kitarreto olchere lino ataa tenaa kegol te ninye?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol ajo ore Yesu naa Enkai?

- **Kaji eiko teneitodolu ena atini nchere keeta Yesu enkidimata sapuk?** (engolon, enkitoria)
 - o Enkidimata pee eishiunye oltung'ani oilenye. Engolon too seseni.
 - o Engolon pee epaliki ing'ok.
 - o Keret ena kishiunoto iltung'ana pee edol engolon e Yesu too mbaa oo ltauja sii.
- **Kaji eiko teneitodolu ena atini nchere keyiolo Enkai (Yesu) pooki toki?**
 - o Keyiolo Yesu indamunot oo laiteng'enak.
 - o Neyiolo sii iltauja leilo oilenye o lchoreta lenyena. Neyiolo enkirukoto enye.

- o Neyiolo sii enaiko pee eitodolu engolon enye pee epaliki ing'ok. Eishiunye osesen leilo oilenye.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - o Meyieu Yesu ilng'ashi, kake eyieu enkirukoto.
 - o Meata ilaiteng'etakloo nkitanapat enkirukoto neaku eitashe te enkiguenana.
 - o Ore Enkai naa bayaroti. Etaramata Yesu mme osesen ake kake o nkiyang'et sii. Neyieu neitajeu ilo oilenye too ng'ok enye.
- **Kaji eiko teneitodolu ena atini nchere keata Enkai (Yesu) empiris? (enyorrata, neata oing'ur too laing'okok, esupatisho, neuro o ltungana)**
 - o Etapalikia Yesu ilo oilenye ing'ok enyena.
 - o Neishiunye osesen sii.
 - o Neibalayu ing'ok oo laiteng'etak loo nkitanapat tenkaraki enyamali e Yesu. Neisho erishata pee eirridu.
 - o Eting'iria olorere, ata ilpayiana otijing'a ina tumo enye te shumata enkaji.
 - o Neibalunye kewan too ltung'ana, ata te iyiook.
 - o Neiteng'ena iltung'ana teng'iriata.
 - o "Enkai ake naidim atapaliki ing'ok!" Kesipa, Ore Yesu, naa Enkai.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - o Etejo Yesu inchere keidim aishunye ilo oilenye neas neijia.

KAINYIOO KINTENG'ENA ENA ATINI NAIPIRTA OLTUNG'ANI?

- Kenyor Yesu oltung'ani. Kenyor aitoduaa oltung'ani enyorrata enye.
- Ore enyamali kitok o ltung'ani naa ing'ok enyena. Keor ing'ok oltung'ani o Enkai.
- Anaa ilo oilenye meidim oltung'ani atareto kewan neijia sii etiu kulikae tung'ana. Meidim aitajeu ate te nkitamioto oo in'gok.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Keng'amaa Yesu lelo tung'ana ooisilig ninye.
- Eitu eitanyamal ilchoreta leilo oilenye Yesu pee eitadoiki ninye dukuya Yesu. Keata apa Yesu enashe tenkaraki enkirukoto enye.
- Ore ilng'anayio le nkirukoto naa nkiasin. Kindim atodol enkirukoto oo lchoreta leilo oilenye tenkaraki enataasa pee eyau enetii Yesu.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aiteng'enayu.)

- o **Amaa, eata Enkai engolon arashu enkitoria te shumata iyie? Keidim atodua ing'ok inono? Keishiankino pee kintame tenkaraki ing'ok?**
- o **Indim atodua ajo miata enkidimata pi pee intajeu kewan too ng'ok?**
- o **Amaa, ketii imbaa tiatua enkishui ino oshi taata niyieu enkirukoto. Indim atusuja enkoitai enkirukoto, nias eniyiolo ajo keyieu Enkai? Indim aisilig ninye?**

31. EIRORIE YESU ENKITOK OO SAMARIA

Yohana 4:1-45

Ore pee elusoo osirua le Pasaka, neshuko Yesu o looiteng'eni lenyena aapuo Galilaya. Neim ninche enkoitoni naimaa enkop e Samaria. Naa keiba apa Ilyahudi Isamaria amu etushulare apa kulikai oreren. Neaku ore too indamunot oo Lyahudi, ore Isamaria naa iltung'ana lemesinyat.

Ore ina kata etii Samaria, nelotu Yesu oo loiteng'eni lenyena enchorro enkare natuturuo apa kakuyiaa lenye Yakobo. Ore pee ebaya erishata endama nenauro Yesu. Neton ayeng'iyeng'a tembata enchoro naokuni, nepuo ilooiteng'eni lenyena olduka aainyang'u endaa.

Nelotu enkitok oo Samaria enchorro aoku enkare, neng'amaa Yesu ajoki, "Inchooki enkare naok!" Neing'asia enkitok o Samaria. Nejoki ina kitok e Samaria Yesu. "Kaji etiu pee kiomon iyie Olyahudi enkare nara nanu Esamariai?" (Amu mejing'a Ilyahudi o Lsamaria).

Newaliki Yesu ajoki, "Tena iyioloo enkishorunoto e Nkai naa eing'ai ilo likijoki 'Inchooki enaok', anaata aa iyie naomon ninye naa eikincho ninye enkare naishu." Nejoki enkitok ninye. "Lo kitok, miata toki niokunye negut olkesumet. Ai tiaji iata enkare naishu?"

Newaliki Yesu ajoki ninye, "Ore pooki ng'ai ook ena are naa keitoki atir enkure. Kake ore ilo ook ina naisho nanu, nemetir enkure intarasi; amu ore ina are naisho nanu keaku enchorro tiatua ninye naitootuakino enkishui oo ntarasi."

Nejoki enkitok ninye, "Lo kitok, inchooki ina are, pee maaitoki atir enkure, nemaitoki alotu eneba inji aoku enkare."

Nejoki Yesu ninye, "Shomo impoto olpayian lino wootu ene." Newaliki enkitok ajoki ninye, "Maata nanu olpayian." Nejoki Yesu ninye, "Intorioko ina nitejo, 'Maata nanu olpayian.' Amu imiet ilpayiani likiwaita, neme olino olikiaata taata. Ore tena iroro esipata." Nejoki enkitok ninye, "Lokitok, adol ajo ira iyie oloiboni. Eteseremishote loo papa tele doinyo, nijoyo intae eji atua Yerusalem etii ewueji nemeata kata nemeseremishoreki."

Nejoki Yesu ninye, "Kelotu esaa neme te le doinyo, neme te Yesuralem iserememe Papa. Iserememe intai enimiyoilolo, nikiserem iyiook enikiyoilo, amu Ilyahudi eing'uaa enjeunoto. Amu kelotu esaa, netaa taata, naserem Ilaseremak oosipa te nkiyang'et o te sipata; amu kitejo lelo oing'oru Papa pee eserem ninye tenkiyang'et e Nkai, ore ilooserem ninye, nenare ake naserem te nkiyeng'et o te sipata."

Nejoki enkitok ninye, "Ayiolo ajo kelotu Mesia, laa ninye eji Kristo. Na kelotu neboloki iyiook imbaa pooki."

Nejoki Yesu ninye, "Nanu doi, ele laairorie iyie." Neing'uaa ina kitok oltoo lenye le nkare tembata enchoro neshuko alo ena anasa aliki pooki ng'ae. "Wootu entodol oltung'ani laatolikio mbaa pooki apa nataasa: Kebaiki naa ele Mesia?" Neshukunye iltung'ana tenebo ninye omeetu enchorro aadol Yesu.

Neiruk ina kata iltung'ana kumok Yesu tenkaraki nena naatejo enkitok. Nesai ninche ninye pee melo aing'uaa ninche neijia. Nebik nkolong'i are teine, neiteng'en

iltung'ana, neitoki aairuk kulikai ake kumok ninye. Nejoki ninche enkitok, "Kiruk taata, kake mme tenkaraki enitejo. Kitoning'okito taata ate kuna baa, nikitayiolito taata nchere ore ele tung'ani naa kesipa ninye Kristo Olaitajeunoni le nkop pooki."

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kaji oshi ias iyie arashu kanisa inyi tialo lelo tung'ana otanyaita emurua inyi?
- Kakua wuejitin, arashu kakua baa indim atoduaa ajo eishiakino niseremie Enkai te nkoitoi sidai?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Etigila nkitanapat olkuuak meata enkuretisho nchere kesurdeeny ninye Ilyahudi.
 - Keata enkitoria naishorie enkare enkishui enkitok oo Samaria pesho meata olgela arashu enkiba.
 - Etiaaka Yesu enkitok oo Samaria pee elo aipot olupayian lenye.
 - Keata Yesu enkidimata naibeleyenye iltauja. Eibeleyenyeate iltung'ana ootoduaa ninye neiruk.
- **Kaji eiko teneitodolu ena atini nchere keyiolo Enkai (Yesu) pooki toki?**
 - Keyiolo Yesu pooki toki nataasa ena kitok. Keyiolo oltau lenye.
 - Keyiolo Yesu nkolati ena kitok. Keyieu pokira are enosenen neisulaki enkare enkishui.
 - Keyiolo Yesu erishata naasi eseremata nasipa. Neyiolo sii enaikununo eseremata nasipa.
 - Etayiolo Yesu enkoitoi sidai nabaiki nkolati eina kitok neutaki ninye enkirridunoto o enkirukoto. Netishilayie nkolati ena kitok o empukunoto enye.
 - Etayiolo enaiko pee epaashare enchankar enye nejing' atua oltau lenye. Netayiolo enaiko pee eirorie tenyorrata o tesipata.
- **Kaji eiko teneitodolu ena atini nchere eisinyati Yesu? (Kaasipani, naa bayaroti, neishoru nkitanapaat, neiba ng'ok, neitame ilaing'okok, neyau enkeeye anaa elakinoto oo ng'ok.)**
 - Euloko enkitok eng'oki enye e nkiborra oonkonyek.
 - Keyieu oleng' eseremata nasipa, mme ake duoo pee esuj olkuaak loo Lyahudi aashu loo samaria.
- **Kaji eiko teneitodolu ena atini nchere keata Enkai empiris? (enyorrata, neata olng'ur too laing'okok, esupatisho, neuro o ltungana)**
 - Eiroro Yesu o enkitok te mpiris, tenkanyit, o tesupatisho.
 - Eirorie enkitok hoo naa Esamariyai neata errepet e ng'oki.
 - Etonyorrarayie ninye ayanyit mpaasharot enyena. Neirorie ninye tenkoitoi sidai naitabaikia ninye enkirridunoto o enkirukoto.
 - Eishoo enkitok enkare enkishui, enkare naitabaiki enkishui oo ntarasi. (Isa 12:3, Ps 42:18; Jer 2:13)
 - Neibalakinyie kewan ina kitok, nchere ore ninye naa Mesia tesipata.
 - Etobiko nkolong'i are tenebo o ltung'ana, elikioo neisho enkishui nemeish IIsamaria, laa ninche ilmang'ati loo Lyahudi.
- **Kaji eiko ena atini teneutaki iyiook inchere KEISILIGAYU Enkai? (meibeleyenya, keibung inkisiligat enyena, keas sii inaja)**
 - Etonyorayie Yesu ayiolou ena kitok neret ninye pee eyiolou ng'ok enyena o mpiris e Nkai.

- o Eisiligie Enkai apa Abraham nchere ekemayiani iloshon pooki tiatua lling'anayio lo sesen lenye. Neisiligie sii eimu iloibonok le Nkai inchere ore ilo aitejeunoni le nkisiligata nemeaku oloo Yahudi ake, kake keaku sii oololoreren. Neitajeu Yesu enkitok oo Samaria tenebo elatia enye.
- o Keisiligayu Yesu neibalunyie kewan too ltung'ana nchere ninye Mesia oisiligie Enkai ninche.

KAINYIOO KINTENG'ENA ENA ATINI NAIPIRTA OLTUNG'ANI?

- Nchere keata oltung'ani tipat te Nkai.
 - o Etonyorryayie Yesu ena kitok. Netaasishore ena rishata ayeng'iyeng'a pee ebaiki ninye te nyorrata enye.
- Nchere ore oltung'ani naa **olaing'okoni** neiririkino esipata enkitamioto tenkaraki ng'ok enyena?
 - o Eewuo ena kitok enchorro enkare tenkiuloto enkolong' pee epaashare kulikai tung'ana. Amu Keata errepet e ng'oki.
 - o Etigilaki enkiyama enye nkatitin kumok, naa ore teina rishata netii likae lee oasita eng'oki.
- Nchere keyieu oltung'ani Enkai amu meata enkidimata naitajeunyie kewan enye?
 - o Meeta apa ena kitok endamunoto enkishui oo ntarasi aashu enaiko pee etum "enkare empuaan." Ore enkare naata naa enabik ake enkiti rishata dorrop pee eitoki ake atirir enkure.
 - o Eitoduaa enkitok Yesu iyieunot naasipa e nkiyang'et naata pee eiruk ninye, nekuet ashuko aliki sii elatia enye.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Nchere elotu ake oltung'ani enetii Enkai te nkoitoo e Nkai.
 - o Meitajeuni oltung'ani tenkaraki ewueji neseremie ashu ewueji nemanya, kake tenkoitoo e Nkai ake e nkiyang'et o sipata.
 - o Lasima nejing esipata Enkai iltauja lenye tenkirukoto.
 - o Eibelekenyaki.. Meekure eureisho pee tenetii tenebo o ltung'ana le murua enye. Neyieu pee eliki ilkulikai tung'ana enaikununo ena jeunoto kitok. Ore tekulie kirorot, ore ake pee eok tenkirukoto ena are empuaan te Yesu nerukunye tenchoro esipata o enkishui tialo elatia enye!
- Nchere keishiaakino pee eata oltung'ani **enkirukoto o enkirridunoto** tenkaraki pee eitiship Enkai neitajeuni.
 - o Etonyorryayie ena kitok Yesu pee eulokino aliki ng'ok enyena, neiruk sii nchere ninye Kristo.
 - o Ore etonita ilkulikae tung'ana tenebo o Yesu, neiruk sii ninche.
 - o Eitajeuwoki iltung'ana tenkaraki iltauja lenye oibelekenyate te sipata mme tenkaraki ilkuaki lenye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aitag'enayu.)

- Amaa ining' kulie katitin anaa ekiany kulikae tung'anak? Ashu ining' anaa mikindim aitajeu Enkai tenkaraki kumok ing'ok inono? Tenindipa atoning'o ena atini, ainyoo ijo pee kiliki Yesu? Indim atang'amu ena are e nkishui e Yesu tenkirukoto?
- Amaa, ing'oraa Enkai tenkaraki iyienot oo sesen ake? Itipika osiligi lino atua Yesu anaa Olaitajeunoni lino?
- Olairukoni, amaa iruk ajo eton eata Enkai olng'ur te iyie ata tenias ing'ok kila enkolong tenirridu oshiake te sipata?
- Amaa, tiatua kanisa ino, indim atang'amu iltung'ana ootanyita iltung'ana le nkop inyini?(Anaa ilamerak, iltung'ana oata bitia, ashu iloata ilkuuaki torrok?) Anaa, inyokinyoko aabaiki ninche pee inyorrinyorro ninche anaa Yesu? Pee iretirete aayiolou ninche?
- Amaa, indimidimi atodol aajo keata inkituak tipat anaa Yesu? Amaa inchoo ninche enkanyit anaa inkanashera tiatua Yesu tenkisiayiare e Nkai?
- Indim aishoo Enkai erishata pee kirik tiatua inkishui oo ltung'ana oata inyamalaritin naagut to rorei Le Nkai?

32. EITOTIO YESU ILTUNG'ANA INKALIFUNI IMIET

Marko 6:30-44, Matayo 14:14-21, Yohana 6:1-14, Luka 9:10-17

Ore nabo olong' eboitare Yesu ilkipaareta lenyena nepuonu iltung'ana kumok enetii nemeata erishata nainosie endaa. Nejoki Yesu ninche, "Wootu oopeny emaape eneliyio, ayeng'iyeng'a enkiti kata."

Nepuo te mpeut ewueji neliyio aa ninche ake oopeny. Kake etodua iltung'ana kumok ninche, neyiolou ninche, neipirri aapuo too nkejek, neng'asie ninche ine wueji. Ore pee edou Yesu te mpeut nedol olorora kitok, neing'urrie ninche, amu etiu anaa intare nemeata olchekut; neiteru aiteng'en mbaa kumok.

Ore pee emutu, nepuonu ilooiteng'eni lenyena enetii, nejoki, "Keliyio ene wueji, nemuto; intanapa ninche, meshomo kuna ang'itie naamanita ene aainyang'aki ate entoki nanya." Kake etawalikia ninye ajoki ninche, "Enchoo intae ninche entoki nanya."

Neing'asi ninche! Nejoki, "Ai! Mikindim! Eikumok kulo tung'ana oleng'! Mikiata iropiyani naaidip." Nejoki ninche, "Kaja mukateni niatata intae? Enchom eng'urai." Ore pee eing'oraa neyiolou, nejoki, "Imiet o sinkir aare."

Neitanap meitotona olorere too nkujit naanyori, anaa iltimito. Ore pee edumu Yesu nena mukateni imiet o sinkir aare neraposhu inkonyek aing'or shumata, nemayian, nebel imukateni neisho ilooiteng'eni lenyena meishoo lelo tung'ana; neoriki lelo sinkir aare ninche pooki. Nanya pooki neraposhu. Nesotu imbelat naatelekuaki o noo sinkir sii neiput inkikapuni tomon o aare. Ore lelo oinosa nena mukateni nera nkalfuni imiet ilewa, netii sii intomonok o nkera.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nikinchoo Enkai nena niyieu te nkoitoi e nking'asia? Tia oitoi itoduaa iyie Enkai kigira aisho intokitin niyieu tiatua enkishui ino?

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBQ: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Pee eponaa Yesu imukatini o isinkiri.
 - Pee eisho Yesu iltung'ana endaa sapuk alang' eneyieuni. Keleng' Yesu oleng'.
 - Keata engolon te shumata enkitobirunoto e nkop.
- **Kaji eiko teneitodolu ena atini nchere keyiolo Enkai (Yesu) pooki toki?**
 - Keyiolo inchere keitoti iltung'ana pooki netem enkirukoto oo iloiteng'eni nabo kata.
 - Keyiolo enaikununo iltung'ana inchere, etiu anaa intare nemeata olchekut. Neyieu ninche ninye anaa Olchekut Supat.
- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neuro o ltungana)**
 - Eishoo iltung'ana endaa te kumoi.
 - Neitodolu engolon enye pee eiruk iltung'ana

- o Neisho iltung'ana oling'ur hoo tenaa etanaure apa oleng'. Neing'oraa anaa intare nemeata olchekut.
 - o Neiteng'en ororei le Nkai.
 - o Netem enkirukoto oo looiteng'eni.
 - o Neasishore enkiti naata ilooiteng'eni lenyena pee eas entoki enking'asia!
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - o Eisiligie Enkai oltung'ani apa tiatua olchamba le Eden nchere keyau Olaitajeunoni ogil oldeket oyawua Shetani enkop. Ore tene neitodolu Yesu ajo keidim atigila oldeket lo lpayiani pee etum endaa.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- o Neitegemea ilooiteng'eni o ilkulikae tung'ana Yesu pee eisho ninche endaa.
- o Nemeata ilkipaareta enkidimata pee eitoti iltung'ana. Meidip intokitin enye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- o Amaa, itodua ajo mindim ataramata kewan. Enkai ake naidim. Amaa, kulie katitin, ijo nchere miata toki pee intaiki Enkai? Nchere mikindim Enkai atasishore te Siai enye? Ore enkiti niata, keidim Enkai atasishore neponaa sii!
- o Amaa, ketii entoki nagol tiatua enkishui ino inchere ekigira Yesu aliki pee isilig ninye? Amaa, koloisiligayu Yesu? Kindim ataramata ninye?

33. EISHIUNYE YESU ENKAYIONI NAATA OLOIRIRUA OIDURUK

Marko 9:14-32; Matayo 17:14-20, Luka 9:37-43

Ore nabo olong', ketii Yesu o ilkipaareta okuni oldoinyo neshukoo enetii ilkulikae ooiteng'eni, nedol emanita olorere kitok, neishankarrarre ilaiteng'etak loo nkitanapat ninche. Ore ake pee edol ilo orere Yesu, neing'asia oleng', nekuetiki aairoroki. Neikilikuan ajoki ninche, "Ainyoo doi ena shankar niaatata o ninche?" Newaliki oltung'ani obo te ina siamo ajoki, "Olaiteng'enani, atorikuo duoo enkayioni ai enitii, eeta oloirirua lemeiro; olaa ore pee eibung' nenang'ie enkop; neitayu ilabur, nyena lala neikaolo; najo ajoki ilooiteng'eni linono metaarai, nelaikino."

Newaliki ajoki ninche, "Wooi ena ishoi nemeeta enkirukoto! Kebaa aton aboitare intae? Kapal intae o anu? Entoriku ninye ene natii." Nerikokini; ore pee edol ilo oirirua Yesu neiterreyie nabo kata, nebatata ten kop neiperipera, neitayu ilabur te nkutuk. Neikilikuan Yesu menye enkerai ajoki, "Kebaya aa nkat eeta ena pukunoto?" Nejo, "Te kereisho eiterua. Naa katitin kmok etanang'aka ninye atua enkima nenang'anki ankare ejo aar; kake te nindim iyie ataasa ae, ing'urrie iyiook taretu iyiook." Nejoki Yesu ninye, "Eji te nindim! Eidimayu imbaa pooki to loiruk." Nebuak nabo kata menye ina ayioni nejo, "Airuko, ore eneton eitu airuk taretokoki!"

Ore pee edol Yesu olorere ekuetu aasotokino, neing'ode ilo oirirua oiduruk, nejoki, "Lo oirirua ming'ani lemeiro, nanu laaitore, tupuku tung'uai, nimingil ajing' ae kata." Nebuaku aishir neiterreyie aipushupush oleng', nepuku, netiu enkayioni anaa olmeneng'ani o metejo ilukumok, "Ae etua!" Kake eibung'a Yesu enkaina nedumu, nyenyototo aitashe. Ore pee ejing' atua aji, neikilikuan ilooiteng'eni lenyena too iyiook aataarai ninye?" Nejoj, "Meararoyu ena pukunoto ti ae neme te nkomono ake."

Nepuo te ine neimaa Galilaya. Nemeyieu Yesu neyiolou hoo oltung'ani: amu ilooiteng'eni lenyena eiteng'enita, ajoki, "Eitarasakini Enkerai e Tung'ani nkaik oo ltung'ana, near ninche ninye metua; ore pee eidipi aatar metua, neishari nkolong'I uni nepiu." Kake eitu ening'u ninche ina natejo, neureyu sii eikilikuan."

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kebaa enkirukoto naishiaakino nikiata pee eretu iyiook Enkai tenkata engoloto?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk? (engolon, enkitoria)**
 - o Keata engolon pee eyaraa oloirirua.
 - o Etaasa te engolon o rorei enye.
 - o Lasima pee eas iloirirua enejo Yesu.

- **Kaji eiko teneitodolu ena atini nchere keyiolo Enkai (Yesu) pooki toki?**
 - Etayiolo Yesu oltau le menye enkayioni inchere keyieu neiruk kake kegol.
 - Netayiolo Yesu enaikununo oloirirua otii atua enkayioni.
- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neuro o ltungana)**
 - Neishiunye Yesu enkayioni, newal enkirukoto nashal e menye.
 - Neirorie Yesu ilooiteng'eni lenyena neret pee eyiolou enaikununo enkirukoto o enkomono.
 - Neng'iri Yesu oleng' tialo menye o ilooiteng'eni lenyena.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Ore apa, ti olchamba le Eden, neisilig Enkai oltung'ani ajo keyau Olaitajeunoni te eishoi e enkitok. Ore ele Aitajeunoni naa kemir Shetani o loiriruani lenyena. Kidol tene inchere ore Yesu naa Olaitajeunoni. Keata engolon te shumata oloirirua.
 - Teneiruk oltung'ani Yesu, neng'amaa Yesu enkirukokto enye newal enkomono enye anaa ene menye ena Ayioni.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Kelotu enjeunoto tiatua enkirukoto ake. Keidimayu pooki toki too ltung'ana oiruk.
- Keshal enkirukoto o ltung'ani, kake kewal Enkai enkomono e nkirukoto ata teneshal. Tenenyoraa oltung'ani ajo olaing'okoni naa meidim atajeu kewan nepik osiligi lenye tiatua Yesu ake, keikenaki Enkai ena kirukoto ana oloitashe too sipat.
- Meata menye enkidimata nemeata sii ilooiteng'eni. Enkai (Yesu) ake oidim aitajeu enkayioni.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkilikuanata nabo arashu aare niindim aiteng'enayu.)

- Nejo menye, "Airuko, ore eneton eitu airuk taretokoki!" Ining' iyie neijia kulie katitin? Anaa iyieu niruk kake iyieu eretoto e Nkai pee iruk? Keidimayu pee ewal Yesu ata enkirukoto nashal?
- Amaa, kaa oitoi eyieu Yesu nikiasishore pee kintodolu enkirukoto ang'? Mme enkomono? Amaa, iomon Enkai oshiake tiatua intemat o enkishui ino?
- Amaa, iruko Yesu ake pee kintajeu te engolon e Shetani?

34. EITOPIWUOKI LAZARO

Yohana 11:1-44

Etii apa emuyei oleng' oltung'ani oji Lazaro, olalashe le Marisa o Mariamu naa olchore le Yesu. Neirriwaki inkanashera Yesu olkilikuai ejo, "Lo Kitok, ng'urai, emuei oloshi linyor." Ore pee ening' Yesu ina nejo, "Mme ene keeya ena mueyan, kake ene nkitoo e Nkai."

Nenyor apa Yesu Lazaro o inkanashera enye, kake etobiko enetii inkolong'i are eton eitu elo enkang' e Lazaro tenebo iloitung'eni lenye. Nelike ninche, "Etua Lazaro, nang'ida nanu te nkaraki intae inchere matii ine, pee itumutumu aairuko. Kake enyeito maape enetii ninye." Ore pee elotu Yesu nenyorriki etobiko Lazaro te nkurare inkolong'i ong'uan. Ore pee ebaiki enkang' nedol ajo etii iltung'ana kumok aaitigir inkanashera. Nelotu Marisa enetii Yesu nejoki, "Lo Kitok, te naa itii apa ene anaata eitu eye olalashe lai. Kake ore o taata, ayiolo ajo ore embae pooki niomonu te Nkai, aikincho iyie."

Nejoki Yesu ninye, "Kepiu olalashe lino aitoki." Nejoki Marisa, "Ayiolo ajo keitoki apiu te mpiunoto e nkiting'oto." Nejoki Yesu ninye, "Ara nanu empiunoto nara enkishui. Ore ilo laairuk nanu, ore ninye te neye, neishu; ore pooki oishu laairuk nanu nemeye intarasi. Iruko iyie kuna?" Nejoki, "Ee Olaitoriani, airuko inchere ira Kristo, Enkerai e Nkai nalotu enkop." Nelotu sii Mariamu enetii Yesu nebatata too nkejek enyena nejoki, "Lo Kitok, te naa itii apa ene anaata eitu eye olalashe lai." Ore pee edol Yesu enkurare neishir. Nejo iltung'ana, "Eng'ura eneba enyorrata nanyor ninye!"

Ore pee ebaiki Yesu enkurare nejo, "Ewuang'ie osoit te nkurare." Ore Marisa nejoki ninye, "Lo Kitok, etong'ua taata, amu inkolong'i ong'uan anaa neye." Nejoki Yesu ninye, "Tiniruk iyie nidol enkitoo e Nkai." Neaku, eiwuang'ie ninche osoit; nedumu Yesu inkonyek aing'or shumata nejo, "Papa aaisho enashe amu kitoning'o pee eiruk kulo tung'ana nchere iyie likirriwua." Ore pee eidip atejo neijia, nebuak ninye to ltoilo sapuk ajo, "Lazaro, tupuku boo!" Nepuku lido otua. Nejoki Yesu ninche, "Entalak too nkarash naanukarieki iltung'ana ninchosho ninye meshomo." Neaku keiruk iltung'ana kumok Yesu ena olong'.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Indim atadamu erishata nitoduaa Enkai easisho te nkoitoo engolon? Tia oitoo eidim ena aibeakenya enkishui ino?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - o Eitopiuo Yesu Lazaro te nkeeya
 - o Kaji eiko? – te ororei lenye (anaa eitobirua Enkai enkop apa!)
 - o Kainyoo? – pee eitodol enkitoo enye.

- o Keitodol inchere keitore enkishui neitore sii enkeeya
- o Keata enkitoria te enkeeya
- **Kaji eiko teneitodolu ena atini nchere keyiolo Enkai (Yesu) pooki toki?**
 - o Etaiolou kaji etiu eton eitu etiu. Etolikio iloiteng'eni
 - o Neyiolou ajo etua Lazaro ata eton eitu elo enkang' enye.
 - o Neyiolou sii enkipirta enkeeya enye – pee eitagol enkirukoto enye naa pee edol iltung'ana enkitoo e Nkai neyiolou ajo Enkai airriua ninye.
 - o Neyiolou iltauja oo ltung'ana naa iyieunot enye.
- **Kaji eiko teneitodolu ena atini nchere keata Enkai (Yesu) empiris? (enyorrata, neata oling'ur too laing'okok, esupatisho, neuro o ltungana)**
 - o Kenyor apa Mariamu o Marisa or Lazaro. Nenyor sii iyiook pee kidol enkitoo enye
 - o Oling'ur lenye – keishira ilkiyio tenkaraki emion oo ltung'ana
 - o Oling'ur tenkalo ilaing'okok – Lazaro, inkanashera enye o ilkulikae
 - o Nenyor iltung'ana tiatu enkitanyanukoto
 - o Nejo, “Kara nanu empiunoto nara enkishui. Ore ilo laairuk nanu, ore ninye ten eye, neishu. Ore Yesu, naa olaisho enkishui, yaani, Enkai kewan.
- **Keitodolu enkatini ajo keisiligayu Enkai? (meibelekenya, neas inaaajo, neitabaya nkisiligat.)**
 - o Ana etiaka ilooiteng'eni lenye, eitu eiting' enkeeya e Lazaro te nkeeya. Etaasa enetejo.
 - o Keipanga Yesu pee etum Enkai enkisisa! Keata Yesu enkitoria.
 - o Etabaya Yesu enkipirta enye.
 - o Kidamu osiligi le Nkai to lchamba le Eden ajo kerriu Olaitajeunoni oidim atimira enkeeya or Shetani.
 - o Keibala ajo ore Yesu naa Olaitajeunoni laisiligi Enkai ti olchamba le Eden!

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- o Eitodol Mariamu o Marisa teneipot Yesu aret olalash lenye
- o Neiruk Mariamu o Marisa ajo keidim Yesu aibooyo enkeeya. Neiruk sii Marisa inchere ore Yesu naa Kristo, Olaitajeunoni o Siligi. Kake keing'ash sii peno. Kake kenyoraa Yesu ata enkirukoto kiti!
- o Neitodol Yesu enkitoo enye pee eiruk iltung'ana ajo eirriwaa Enkai ninye.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- o Amaa, ekinyamal tinidamu enaikununo enkeeya ino? Ajo etii aji nilo? Indim atisipe enilo teniye? Igira apik osiligi lino ti ai?
- o Amaa indim airukoo osiligi le Yesu kulie katitin naa keing'ash ai kata tenkaraki enchalan ino anaa Marisa or Mariamu? Keata Enkai oling'ur too iltung'ana anaa iyie?

35-A. YESU o LBARNOTI KARSIS
Matayo 19:16-26, Luka 18:18-30, Marko 10:17-27)

Ore nabo onlong' eewuo olbarnoti karsis enetii Yesu nejoki, "Olaiteng'enani supat, kaa bae naikishiaan aas pee atum enkishui nemeish?"

Nejoki Yesu, "Ainyoo pee kinkilikuan nanu inenkishiaa? Obo ake eetai aa supat; kake te naa iyieu nijing' atua enkishui, imbung'a inkitanapat."

Nejoki, "Akua?" Nejoki Yesu, "Kajo iyilou. Miar metua, miloloito, mipurrisho, minchakenoki elejare. Iyanyita minyi o ng'utunyi, tonyorra ole latia ino anaa kewan."

Nejoki ilo barnoti ninye, "Aidipa aibung'a nena pooki ebaiki apa ara enkerai: amaa, ainyoo ae naatong'orikia?"

Neing'or Yesu olbarnoti akurraki inkonyek nenyorru nejoki, "Te naa iyieu niaku bayaroti, shomo timira masaa pooki niaata, inchoo ilaisinak, neaku iata olchumati te shumata, nikilotu asuj."

Ore pee ening' ilo barnoti ilo rorei, nelo eisininuo amu eata masaa kumok.

Nejoki Yesu ilooiteng'eni lenyena, "Esipa ajoki intae nchere egol pee ejing' olkarsis enkitoria e keper. Naitoki ajoki intae, kelelek te ntames eim enaudoto o ltidu alang' olkarsis ejing' enkitoria e keper."

Ore pee ening' ilooiteng'eni lenyena neing'asia oleng' nejo, "Aing'ae naa oidim atajeu?"

Nekurraki Yesu nkonyek nejoki ninche "Meidimayu ina too ltung'ana, kake eidimayu pooki te Nkai."

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Ira iyie karsis? Tia oitoi? Ore te kulikae rorei, kakua mayianat arashu kidimata iata, arashu inkishoorot iata tiatua enkishui ino?

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBQ: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keyiolo Enkai (Yesu) pooki toki?**
 - Neyiolou Yesu enaikununo empukunoto o lbarnoti karsis. Neyiolou sii ajo metaaniki oltau lenye enjeunoto anaa enadamu ninye. Neikilikuan ninye INKIKILIKUANAT pee eret ninye atayiolo enaikununo oltau lenye.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Teniyieu nintiship Enkai eimu enkibung'ata oo nkitanapat lasima nias nimbung' pooki inkatitin pooki nemipang'ori ai kata! Ore amu etanya eing'ueki ina karsisho enye neitodolu ina ajo etabatate eitu eanyit inkitanapat enyorrata o lkulikae. Kepiak ninye to ltau lenye.
 - Meidimayu pii pee eibung' iltung'anak inkitanapat e Nkai pooki kata. Ore ilo barnoti karsis nedamu ajo eibung'a neanyit inkitanapat anaa enaishiakino pee eitajeu. Kake eitu edol ajo lasima pee eibung' inkitanapat tiatua oltau lenye kake me tioriong' ake. Ore oltau

lenye neton etii ing'ok. Ore tenkitanyaanyukoto, isoma Matayo 5:21, 22, 27,28, 31, 32, 43, 44.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Ketem oltung'ani ajo aitiship Enkai tenkarsisisho aashu too inkiasin sidain. Nedamu olbarnoti ajo ore enkarsisisho enye naa olmonokie oitiship Enkai. Kake meidimayu.
- Kelej oltung'ani kewan eiruk ajo etabaikia iyieunot e Nkai neishiakino nejeu.
- Kake meidim oltung'ani atajeu kewan. "Ore te tung'ani nemeidimayu." Lasima pee eishoru Enkai enkoitoi.
- Eketem oltung'ani ajo alotu enetii Enkai too nkoitoi enyena. Nejo ilo barnoti, "Kaa toki aidim ataasa pee atum enkishui nemeish?" Keyieu apa neing'uraa tenaa keatae ai kiti toki neidim atoponye nena siaitin enyena sidain pee eitiship Enkai.
- Kake meng'amu Enkai nena kiasin ang' sidian eji pee kitumie enjeunoto. Eitu eng'amu Yesu nena kiasin enyena sidain. Kake enyaaka aliki kulie kumok!
- Amaa, idamu iyie ajo keyieu Yesu nemir pooki tung'ani nena masaa enyena pee ejeunye? (a-a) Ainyoo?
- Ore pee ejoki Yesu ninye, "Timira masaa inono pooki," keyieu Yesu neitodol ninye ajo keisilig nena masaa enyena alang' enaisilig Enkai. Keata apa olbarnoti masaa kumok enkarsisisho neiwuasayu. Orrindik apa ninye too nena Masaa enyena.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kakua mayianat iata iyie tiatua enkishui ino? Masaa? Enkidimata? Enkisuma? Enkisisa? Amaa inchoo iyie kuna tokitin metaa mindim aing'ura Yesu niomon empalikinoto o eretoto.
- Nejo Yesu te pooki tung'ani, "Timira pooki." Kainyoo idamu ajo keipirta tenejo "Timira pooki"? Ainyoo igira aenikino? Ainyoo igira amitiki Enkai? Ainyoo igira agolie pee miminie?
- Kaji kitelejie ing'ok inono tenkaraki enkewan ino? Kakua kiasin sidain iyieu nirridu tenkaraki neishoo ninche oltau lino metawuasayu?

35-B. NIKODEMO Yohana 3:1-21 (o Numbers 21:4-9)

Ore nabo olong' ketii Yesu te Yerusalem te rishata e Pasaka. Eiteng'ena iltung'ana tiatua enkolong' pooki. Ore teipa, nelo ewueji neiragita. Etii apa oltung'ani lo Lfarisayo oji enkarna Nikodemo. Ore enkewarie, nelotu Nikodemo enetii Yesu, nejoki ninye, "Rabbi, kiyiolo aajo ira iyie olaiteng'enani oing'uaa Enkai; amu meetae oltung'ani oidim ataasa kuna kitoduaat nias iyie te nemeboitare Enkai ninye"

Newaliki Yesu ninye, "Esipa, esipa, aajoki iyie, te neitu eini oltung'ani aagil te inoto naing'uaa shumata, nemeidim atoduaa Enkitoria e Nkai."

Nejoki Nikodemo ninye, "Kaji eiko pee eidimi aatoiu oltung'ani etaa moruo? Keidim ninye atushukokinoyu eniare enkoshoke e ng'otonye metoini?"

Newaliki Yesu ajoki, "Esipa, esipa, aajoki iyie, te neitu eini oltung'ani te nkare o te Nkiyang'et, nemeidim atijing'a Enkitoria e Nkai. Ore ina natoiwuoki to sesen, naa osesen, ore enatoiwuoki te Nkiyang'et naa enkiyang'et. Ming'asia te naajoki iyie, 'Meeta nchere pee miking'ili aaiu.'"

Eton Nikodemu meibung' enetejo Yesu nejoki ninye, "Kaji eiko pee eidim aataa kuna baa?"

Neaku eitadamua Yesu Nikodemo enaikununo enkatini oo inkera e Israeli apa pee etii tiatua ong'ata tenebo Musa. Neuro ninche imbaa torrok ti alo Enkai o Musa. Neing'unyung'uny ninche ejo, "Kainyoo pee iyaua iyiook aitupuku te nkop e Misiri maetu aaye tene tiong'ata? Amu metii endaa nemetii enkare, neitirika iyiook ena daa nemeeta tipat." Negoru Enkai tenkaraki engolong'u enye neirriu ilasuriaa oopi atua iltung'ana. Neony ninche iltung'ana o metaa etuata ilkumok.

Nepuonu iltung'ana enetii Musa, nejoki, "Kitaasa iyiook eng'oki, amu kiroro iyiook mbaa torrok ti alo Olaitoriani o tialo iyie; toomono Olaitoriani pee eiwuang'ie ninye ilasuriaa te iyiook." Neaku etoomonoko Musa iltung'ana. Nejoki Olaitoriani Musa, "Intobira olasurai lo suyai nipik shumata e ng'ape; naa te nelo neony olasurai likae tung'ani, neing'or ninye ilo asurai lo suyai nepok."

Nejoki Yesu Nikodemo, "Ore anaa enailepie Musa olasurai ti ong'ata meeta nchere pee eitu eilepieki Enkerai e Tung'ani aaiko neijia, paa ore pooki ng'ae oiruk ninye netum enkishui nemeish. Amu etonyorra Enkai enkop aiko nji o meishoru Enkerai enye nabo, paa ore pooki ng'ae oiruk nemeimin kake netum enkishui nemeish. Ore ilo oiruk ninye nemeiguanareki, ore ilo lemeiruk neidipaki aaiquanare, amu eitu eiruk enkarna e Nkerai inoti nabo e Nkai."

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kainyioo idamu iyie anaa keji einoto e are?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?**
 - Keata Enkai engolon naibeleyenye iltauja.
 - Eitamio Enkai lelo apa Siraeli oogolong'u te keeya.
 - Etuutayie ilasuriaa meetu aony ile Siraeli.
 - Eitobirua enkoitoi to losho loo Siraeli pee eitajeuni tenena onyot o ilasuriaa.
 - Keata ninye eng'olon pee eisho iltung'ana oltau ng'ejuk. Inchere peyie eigili aiu ninche.
 - Keata engolon pee eishoru enkishui nemeish.

- **Kaji eiko teneitodolu ena atini nchere keyiolo Enkai (Yesu) pooki toki?**
 - Etayiolo apa Yesu ina nayieu Nikodemu.
 - Etayiolo apa Enkai enkingunyunguny oo Siraeli, neyiolou enaiko teneitame ninche nerikoo ninche metijing'a atua enkirridunoto.
 - Keyiolo Enkai e mpukunoto e pooki tau too iltung'ana pooki.

- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Eitamio Enkai Isiraeli oogira apa aing'unyunguny tenkaraki engolong'u enye.
 - Ore lelo apa otanyaita eiruk tialo enkoitoi enjeunoto naitobirua Enkai, neiguanareki ninche o metabaiki keeya tenkaraki nkiasin enye torrok. Ore lelo otanyaita ewang'an nebibk tiatua enaimin.

- **Kaji eiko teneitodolu ena atini nchere keata Enkai (Yesu) empiris? (enyorrata, neata oling'ur too laing'okok, esupatisho, neuro o ltungana)**
 - Ore enkoitoi enjeunoto naa tenikiini aigil eniare, aiu te nkiyang'et, naa Enkai ake naidim ataasa ena.
 - Neitobiraki Enkai Isiraeli enkoitoi najeunyie, hoo duoo apa nenare ninche keeya tenkaraki enkingunyunguny enye, nemeata sii apa enkirukoto.
 - Keitobiru Enkai enkoitoi too laing'ok pee meimin kake pee engamu enkishui oo ntarasi, eiruk ninche Yesu, enkerai e Nkai.

- **Kaji eiko ena atini teneutaki iyiook inchere KEISILIGAYU Enkai? (meibeleyenya, keibung inkisiligat enyena, keas sii inaajo)**
 - Neitabaya Yesu enapa kisiligata inchere keaku ninye eisho e nkitok (Enkiterunoto 3:15), olaa ninye omirr keeya.
 - Neitabaya Yesu enkisiligata te Abraham pee emayian enkop pooki eimu eishoi enye. (Enkiterunoto 12:3)
 - Ore tiatua olning'o musana pooki, neishorua Enkai inkitodolunot o Laitajeunoni apa oisiligishoreki. Ore anaa enailepieki olasurai tolpurkel pee eing'or olorere peyie eitajeuni tialo enkitamioto too ng'ok enye, naa enkitodolunoto naibala nautu inchere keilepieki sii ninye Yesu to Salaba tialo ilaing'okok. Ore lelo "oing'orr" osalaba tiatua enkirukoto neitajeuni. Kegira apa Enkai aasisho tiatua enkatini sapuk eimu inkaatini e biblia pee esaru tung'anisho.

KAINYIOO KINTENG'ENA ENA ATINI NAIPIRTA OLTUNG'ANI?

(tenkitanyaanyukoto. Keata oltung'ani tipat te Nkai; olaingokoni; meidim aitajeu kewan.)

- Etonyorra Enkai oltung'ani oleng' pee eishoru enkerai enye nabo peyie elotu aye tialo oltung'ani.
- Ore oltung'ani naa olaing'okoni. Ore eng'olong'u oltung'ani netooro ninye o Enkai. Etogolong'utua Isiraeli tialo enkingunyunguny enye.
- Meidim oltung'ani aitajeu kewan. Meidim apa Isiraeli aitajeu ate. Ore eyia nejia, meata olaing'okoni arashu ilaing'okok oidim aitajeu ate te nkiyang'et. Lasima pee eini aigil, amu eshomo aapuku tiatua o ewang'an.

- o Ore pee elotu embatatata, netonyorra oltung'ani enaimin alang ewang'an amu torrok inkiasin enye. Etanya ninche ewang'an te nkiterunoto.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

(Enkitanyaanyukoto. Keidim ake ayeu enetii Enkai anaa enajo eyieunoto enye o enkipankata enye. Lasima pee elotu enetii ninye te nkirukoto, neirridu pee eitajeuni.

- Ore enjeunoto naa ketumi ake teneisiligi ina oittoi naishoru Enkai. Eing'ura apa Isiraeli olasurai te ng'ape anaa enaishorua Enkai, aisilig Enkai tialo eyieunoto enye. Ore ilaing'okok pooki nenarikino neisilig Yesu, olaa ninye apa etudumuaki aik to salaba pee elak olekoisiayio loo ng'ok ang'.
- Ore oltung'ani naa lasima neini aigil eniare. Netum oltau oibelekenye, oyau Enkiyang'et Sinyati netum atayiolo ing'ok enyena, neirridu nepik osiligi lenye atua Yesu.
- Ore einoto e are naa pee ilo aing'uaa keeeya nijing atua enkishui.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- **Kaa oittoi tiatua enkishui ino itonyorra iyie enaimin aitalang' ewangan? Ketii inkoittoi tiatua enkishui ino nikipigira aitodol keeya arashu enkiturrarroto o siligi tiatua enkishui ino tenkaraki ing'ok inono? Tia oittoi kindim atareto ilo kilikuai apa oishooki Nikodemu?**
- Ekitoiwuoki iyie aigil? Keibelekenya Enkai oltau lino pee indim atoduaa ing'ok inono o eyieunoto niata tialo olaitajeunoni? Ore paa keng'orr, indim atang'arie likae airukoni, nining'u inchere kainyioo eitodolu tenincho enkishui ino Yesu.
- Amaa ira iyie Olairukoni, amaa ketii imbaa/embae tiatua enkishui ino nagira aiwuang'ie inkonyek inono te Yesu? Kainyioo nanarikino nirridu te nkishui ino? Inyaaki tipika osiligi lino atua empiris e Nkai.

36. KEITUKU ENKAING'ONG'KONI INKEJEK OO YESU

Luka 7:36-50

Neipot oltung'ani obo loo Lfarisayo Yesu pee eitoomon te nkaji enye. Nejing' enkaji e ilo Farisayoi neton anya endaa.

Naa ng'ura, etii enkitok ina anasa, naa enkaasani oo ng'ok; ore pee iyiolou ajo einosita Yesu endaa te nkaji e ilo Farisayoi, neyau oltulet sidai le ilata narropil, neitashe te siadi ninye too nkejek enyena, neiter aituku inkejek enyena too lkiyio, nejut too lpapit le ndukuya enye, neng'utut nkejek enyena, neelie ina ilata.

Ore pee edol ilo Farisayoi oitoomono nejo to oltau, "Te naa koloiboni le Nkai ele tung'ani anaata etayiolo ajo aing'ae anaa kaa pukunoto e nkitok ena aibung' ninye!" Neirorie Yesu nejoki, "Simon, aata embae naaliki." Nejoki, "Ee Olaiteng'enani."

Nejoki, "Eisilenoko oltung'ani aisilenoni iltung'ana aare eropiyiani enyena, neisho obo indinari iip imiet (matejo inkeek iip imiet), neisho olikae onom (matejo inkeek onom). Ore pee elau pokira aare entoki nalakie, nepalaki pokira aare. Amaa te pokira aare, kalo onyorru ninye oleng?"

Newaliki Simon ajoki, "Ajo, elde otapalakaki nkumok." Nejoki Yesu, "Etisipa ewalata." Neibelekenyakino enkitok, nejoki Simon, "Idol ena kitok? Aewuo enkaji ino neitu kincho enkare oo nkejek; kake aaitashala ena kitok inkejek aainei too ilkiyio nejut too lpapit lenyena. Eitu king'utut; ore ninye, anaa duoo pee ajing'u eitu aapal maang'utut inkejek aainei. Eitu kiel endukuya te ilata, kake aaela ninye nkejek te na ilata.

Aajoki naa te nkaraki ina, etapalakaki ng'ok enyena, aa kumok, amu etonyorrishe oleng', amu ore doi olopalakini nkuti naa kiti enyorrata enye." Nejoki ninye ina kitok, "Kitapalakaki ng'ok inono."

Ore lelo ootoni aadaa te nebo ninye neiter aajo maate, "Ai ng'ae ele eji opalaki oltung'ani ng'ok?"

Nejoki ina kitok, "Kintajewuo enkirukoto ino; shomo te seriani!"

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Ketii oltung'ani litayiolo oshi onoto enkurruna tialo embae naje, neiterutua aisudoo ate te kulikae tung'ana? Arashu aisudori te kanisa? Ore erishata tenitum, ilmakinyie ilo liboitare tenebo iyie.

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?**
 - Keata Yesu enkidimata, neata enkitoria nepalikinyie, neitajeunye lelo aing'ok oisul. Ninye oibelekenya enkishui e nkitok, pee metum enkurruna najing'ie atua ma aji e Olfarisayo.

- **Kaji eiko teneitodolu ena atini nchere keyiolo Enkai (Yesu) pooki toki?**
 - Etayiolo entoki apa nagira ilo Farisayoi oji Simoni adamu, o enaikuna pee eiguanare Yesu.
 - Etayiolo oltau leina kitok o tialo empukunoto oo ng'ok enyena.

- **Kaji eiko teneitodolu ena atini nchere keata Enkai (Yesu) empiris? (enyorrata, neata oling'ur too laing'okok, esupatisho, neuro o ltungana)**
 - Eitoomono ina kitok aingokoni nayewuo enetii ninye te nkirukoto.
 - Neitoomon Olfarisayoi tiatua enkishui enye, pee elo ajing atua enkaji enye neitoomon ninye atua enkirukoto, hoo neitu kidol enkirridunoto enye.
 - Neishoru enkisiligata inchere ore ilo otapalikiaki inkumok naa keata enyorrata sapuk tialo ilkulikae tenkiputakinoto.

- **Kaji eiko ena atini teneutaki iyiook inchere KEISILIGAYU Enkai? (meibeleyenya, keibung inkisiligat enyena, keas sii inaajo)**
 - Ore ilo Aitajeunoni oisiligishore Enkai naa keidim atapaliki eng'oki, negil oldeket le ng'oki. Etaasa ena tena kitok. Etigila oldeket le ng'oki tiatua enkishui enye.

- **KAINYIOO KINTENG'ENA ENA ATINI NAIPIRTA OLTUNG'ANI?**
 - **Era kulo tung'ana boi are (metii Yesu) tiatua ena atini. – Kalo obo otaasa eng'oki?**
 - Ore boi pokira are naa ilaing'okok ore ina ng'oki eina kitok neyawua enkitapongoroto e nkishui, eidimayu paa malayaisho. Ore eng'oki e Simon naa olwuasa, esupatisho – e – makewan nenyorr aiguanare ilkulikae.

- **KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)**
Enaiko shoruetchisho nikiata o Enkai teneibeleyenya shoruetchisho nikiata o ilkulikae tung'ana?
 - **Keng'ae etapalikiaki? Aing'ae eitu epalikini?**
 - Etapalikiaki enkitok. Eitu epalikini ilo lee oji Simoni.
 - **Neaku kainyioo empaashata naata peyie eoro iltung'ana pokira aare? Tialo enkoitoi naing'urarie arashu natodolie ing'ok enye?**
 - Ore empaashata tialo kulo tung'ana pokira aare, naa inchere ore ina kitok netayiolo, neibalie eng'oki enye. Neyiolou inchere ekeyieu taa ninye olaitajeunoni, nekuet aing'oru olaitajeunoni neshipa oleng' pee etum ninye.
 - **Tia oitoi epaasha ninche tialo enaikuna teneitiship ilkulikae tung'ana?**
 - Ore ena kitok netoduaa ninye enyorrata, nedol oling'urr lo Laitajeunoni. Ore tenkaraki ena, netum enkidimata naitodolunyie enyorrata enye sapuk te mbolokinoto sapuk. Eitu eitoki aurei ajo kejaa ilkulikae tung'ana. Neitodolu enyorrata kitok te ilo Aitajeunoni lenye. Neitodolu sii ina inchere enoto enkidimata pee eitodolu enyorrata tialo ilkulikae tung'ana. Neliki ninche enenotie o enaikuna sii pee eretoto naa inchere teneing'oro sii ninche naa ketum ina retoto.
 - Ore ilo Farisayoi naa kebare ninye kewan. Oltung'ani oata olwuasa, oltung'ani obore enkiguana tialo ilkulikae, oltung'ani oibaisho. Eitu apa eyiolou ninye inchere keata enkolat nayieu tiatua enkishui enye. Oltung'ani modooni tialo batisho enye. Oltung'ani lemeata enyorrata tialo ilkulikae. Oltung'ani oiba ilkulikae nenyorr kewan oleng'.
 - Enkirukoto tiatua llomon supati egilunore enkirukoto Tolut-nemetii.
 - Etapalikiaki (enakitok) egilunore (Olfarisayoi) oimina.
 - Enyorrata tialo ilkulikae tung'ana naata (ena kitok) egilunore enyorrata nemetii katukul tialo ilkulikae nemeata (Olfarisayoi)
 - “Ore tenkaraki ing'ok enyena kumok nenoto ninye empalikinoto amu kenyorriso oleng'”
Keitodolu sa ena inchere ketaasua empalikinoto nanoto ninye ainosie enyorrata enye?
 - A-a! Etejo Yesu, “Kinchiunyie (kintajewuo) enkirukoto ino.”
 - Ore ina nyorrata enye netaa enkitisipata enkitodolunoto e empalikino, o enjeunoto.
 - **Nejo Yesu: “Etapalikiaki ing'ok enyena kumok – amu kenyorriso oleng', kake ore ilo opalikini inkuti naa amu kenyorriso penyoo.”**

- **ENKITULULUNG'ATA E NABO KATA::**
 - Ore ilo otapalikiaki, neyiolo, neiruk nebiki tiatua ine – naa kenyorru ninye Enkai o iltung'ana. Ore enyorrata naa enkitodolunoto e oriong' ninyorrunyie, nikipalikinyie iyie Enkai.

- Kainyioo Ilomon Supati? Eitu anaa oltung'ani aomononi oriku iltung'ana kulikae aomonok enetii osirua obore endaa otayiolo enetii. Meibok ilo sirua arashu ina daa aibooki kewan!

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- **Kaing'ae idol iyie anaa kegol inyorru?** Aing'ae oshi ing'uanare iyie oleng' te mpijan? Aing'ae iata olom tialo ninye? Aing'ae ilo leton eitu ipaliki iyie? Keidimayu pasa metaa ore enyamali niata iyie naa keton eitu iyiolou iyie empalikinoto naata Yesu? Amaa teniyiolou empalikinoto naata Yesu? **Tia oittoi kiret iyi eina tonyorra likae tung'ani?**
- **Amaa teniyiolou kewan ajo ira olaing'okoni iyie makewan o eyieunoto niyieu Olaitajeunoni irishat pooki, tia oittoi kindim ena atareto tialo enibaikinore ole latia ino arashu olmang'atinta lino? ENKIPANGATA E NKISOMA**

37. EMISA NABAYIE

Luka 22:1-22; Matayo 26:26-30; 1 Korintio 11:23-25

Ore ena naa enkatini e Endaa o Laitoriani. Kegira apa ilapolosak kitok o ilaiteng'enak loo nkitanapat aing'oru enkoitoi mear Yesu metua. Etijing'a Shetani Yudas Iskariot, olaa obo le lelo tomon o aare, nedumunye alo aning'ore ilapolosak kituaak o sikarini eneiko pee ekaldae Yesu te ninche. Nenyorraa pee eisho mpesai.

Ore pee ebaya esaa, neton adaa Pasaka, netoni ilkipaareta lenyena te nebo ninye. Nejoki ninche, "Atayiewua oleng' nanya ena Pasaka te nebo intae eton eitu aaisilisili. Amu ajoki intae, meekure aitoki ai kata anya o meitabari te nkitoria e Nkai... Kake eng'ura amu etii ilo laaitarasaa ena mesa te nebo nanu. Amu eikunari Enkerai e Tung'ani anaa enatejoki apake; kake ee kake aiya ilo laa ninye oitarasaa!"

Neiteru ilooiteng'eni lenye aaikilikuana maate, aajoki kalo pasa oiko neijia. Newaliki Yesu ajoki, "Ilo laisho endung'oti aidipa aitadoiki." Ore pee eidip aitadoiki, neitayu neisho Yudas Iskariot. Ore pee eidip Yudas atang'amai endung'oti nejing' Shetani atua ninye. Neaku etiaka Yesu ninye, "Tasioki taasa eniaas." Ore pee eng'amaa ninye endung'oti neipang' nabo kata; naa kewarie.

Neaku edumu Yesu emukate, ore pee eisho Enkai enashe nebel neisho ninche ejo, "Osesen lai ele oishoori te nkaraki intae. Entaas ena kidamumu nanu." Neiko neijia enkikompe eidipa endaa, ejo, "Ore ena kikompe osotua ng'ejuk oitaiki intae osarge lai, oibukori te nkaraki intae te mpalakinoto oo ng'ok.

Ore pee eidipa ainosa emukate naok enkikompe, nejoki Yesu ninche, "Isikisiki ade pooki aailanyisho, kake ore pee aaitopiuni, naituruk te intae alo Galilaya." Nejo pooki ajo meidim aisika. Ore pee erany osinkolio neipung aapuo olchampa le Gatsemene ti oldoinyo loo Loirienito.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kainyioo tipat e ndaa o Laitoriani te iyie? Ijo iyie kainyioo oshi pee kias ina too nkanisani ang'?

ENKATINI: Toliki enkatini ningiligili tenebo anaa olturrur pee eviolo pooki ng'ae

INKIKILIKUANAT NAIMAKINI TENEBU: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keyiolo Enkai (Yesu) pooki toki?**
 - o Neyiolou Yesu ajo keisilisili kake keitoki apiu aing'uaa ilootuata.
 - o Ajo keisik ilasujak lenyena.
 - o Ajo kejing' Shetani Yudas pee ekaldae ninye.
 - o Ajo keitoki aadol ilkipaareta lenyena ninye.
 - o Ajo ore empalikinoto oo ng'ok nelotu eimu enkisilililot enyena.
- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neuro o Itungana)**
 - o Neishooyo Yesu osesen lenye metigili neibukori osarge lenye pee etumi empalikinoto oo ng'ok.

- o Neishooyo imukateni tenebo enaisho pee eiteng'en neitadamu ilkipaareta o iyiook enkeeya enye o lasar.
- **Kaji eiko ena atini teneutaki iyiook inchere KEISILIGAYU Enkai? (meiblekenya, keibung inkisiligat enyena, keas sii inaajo)?**
 - o Neitadamu iyiook emisa o Laitoriani osirua le ngiroroto o enkisiligata e Nkai Olaitajeunoni.
 - o Keitadamu iyiook enaisho olasar lo sarge le Yesu tenebo ilasari lo Lning'o Musana.
 - o Neimaki Yesu Osotua lo Lning'o Ng'ejuk. Neitadamu ninche or iyiook enaikununo enaibon e Yermia.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- Nebatata Yudas tiatua intemat. Hoo netaboitare Yesu tiatua ilarin okuni kake eitu eiruk ninye. Ore oltau lenye nenyoraa meidimu Shetani.
- Neibonu Yesu ajo ore ilkipaareta pooki keing'uaa ninye amu keshal pooki nemeidim aataret ate tiatua inkisililot enye. Meidim oltung'ani aitajeu kewan.
- Kepalikini oltung'ani ake tenkaraki naishorua Yesu osesen lenye tenebo osarge lenye.
- Kelotu ake oltung'ani enetii Enkai eimu enkirukoto tiatua olasar le Yesu. Ore emisa o Laitoriani keret iyiook matadamu Kristo nikintagol enkirukoto ang'.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Etua Yesu pee kitum enchula tenebo o Nkai. Amaa, igira iyie aing'oru enchula e Nkai eimu Ororei lenye, enkomono, eseremare, tenebo o Emisa o Laitoriani?
- Keishorua Yesu enkisiligata ajo ore enkolong' nabo nikitum enchula te shumata tenebo o ninye. Iata enkitisipata ajo iaku iyie tenebo o ninye? Kaji eiko ena tenikiret te nkishui ino? Ekintagol iyie?

38. EOMON TE GETSEMANE; EIBUNG'AKI YESU NEIGUENAREKI Matayo 26:36-50; Yohana 18:12-19:16; Marko 14:32-53, Luka 22:39-53

Ore pee eidip ainosa emisa e Pasaka, nelotu Yesu o ilooiteng'eni lenye ewueji neji Getsemane nejoki ninche, "Entotoni tene mashomo ende aomon." Nerik Petero, Yakobo, Yohana ewueji nataana. Nejoki, "Eeta oltau lai osina kitok o metaa kaye; entotoni te ne enchololoto te nebo nanu." Nelo openy aigut neirrabalaakino enkop neomon nejo, "Papa lai, te naa keidimayu intapaashaki ena kikompe, kake mme anaa enayieu nanu kake anaa eniyieu iyie."

Nelotu enetii ilooiteng'eni neinepu eirurate, nejoki Yesu, "Amaa ai mindimidimi hoo aaishololoto te nebo nanu esaa nabo? Enchololoto niomono pee mijing'ijing'i intemat; esipa eyieu oltau, kake eshal osesen." Neitoki alo enkata e are neomon. Neitoki alotu, neinepu ninche eirurate. Neitoki aing'uaa ninche nelu aomon enkata e uni. Neitoki ashukokino ilooiteng'eni lenyena nejoki, "Keton doi ake irurara aayeng'iyeng'a! Eng'ura etinyikua esaa napikieki Enkerai e Tung'ani inkaik oo looata ng'ok. Enyeito emaape; eng'ura, nelde olaakaldae otabawua."

Ore eirorita, ng'ura, nelotu Yudas eboitare isikarini laaing'uaa ilarikok oo Lyahudi. Neiroroki Yudas Yesu neng'utut pee eitodol isikarini. Neibung' Yesu neya enetii ilarikok loo Lyahudi. Neisik ilooiteng'eni le Yesu pooki tenkuretisho.

Neng'as aya Yesu enkaji o Lapolosani Kitok. Nepuonu iltorrok kumok meiteeniki elejare enaikununo Yesu, kake etigire neitu ewaliki Yesu. Neitoki aikilikiuan olapolosani kitok, "Ira iyie Kristo?" Nejo Yesu, "Ee, ara." Ore pee ening' neijia nepolos olapolosani kitok ilkilani lenyena nejo, "Ainyoo kintoki aayieunye lchakenini? Itoning'okito ate emoroto namor Enkai. Ijoja aa?" Nedung'oki pooki enkiguana aajo keishiakino keeya.

Ore ake pee ekenyu, neya Yesu enetii olkitok loo Lroma oji Pilato. Neikilikuan Pilato, "Ira doi iyie Olaiguanani loo Lyahudi?" Newaliki ajoki, "Ee, kara, kake ore enkitoria aim me ene ena kop."

Nerik Pilato Yesu neidong' te nkeene; neiroro Ilyahudi nejo, "Eitu atumie hoo enkitarruorroto." Kake nebuak Ilyahudi, "Tasho! Tasho!" Neureshoyu Pilato neishoo Yesu meshomo aashe.

ENKIPANGATA E NKISOMA

ENE DUKUYA: Inkilikuanana ena kilikuanata eton eitu iliki enkatini

- Tia oitoi aekata kitanyaki iyie arashu kinonokoki imbaa nemesipa aajo itaasa? Tia oitoi itoduaa ajo meata oltung'ani likitii enkoriong'?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keyiolo Enkai (Yesu) pooki toki?**
 - Etayiolo Yesu ajo kepuono inkisilisilot. Neyiolou ajo, "Eeta kebau esaa."
 - Enkipirta enye pee eewuo enkop. "Pee eing'oru neitajeu ina naimina."
 - Enaasita Yuda tenebo o larikok loo Lyahudi.

- **Kaji eiko teneitodolu ena atini nchere keata Enkai (Yesu) empiris? (enyorrata, neata oling'ur too laing'okok, esupatisho, neuro o ltungana)**
 - Eitu eimit Enkai Enkerai enye nabo metala esile oo ing'ok ang'.
 - Eting'iria Yesu tenebo olkipaareta lenyena o enchalan enye o enkuretisho enye. Eitu eany ninche tenkaraki embatatata enye.
 - Ataa hoo tenaa ore Yesu naa Olaitoriani le shumata o enkop, eimayie inkisililot naagol tenkaraki enyorrata o ltung'ani.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Keyiolo Yesu enkipang'ata e Nkai neitu eany eimaa ninche ataa hoo tenaa keitodolu enkitamioto sapuk.
 - Keitabari enaibon tiatua eimu Iloibonok kumok. Olkerempe le Nkai 41:9 – kekaldaa olchore lenye; Isaya 53:3 – neany Isiraeli ninye; Sakaria 11:12-13 – Shekeli tomuni uni; Olkerempe le Nkai 27:12 – neiteenikini ninye; Isaya 53:7 – negira ninye.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Keata oltung'ani tipat te dukuya Enkai neitobiru Enkai enkoitoi naitajeunye.
- Negolong'aki oltung'ani Enkai neiyieu neitore kewan o enkishui enye. Ore ilaibung'ak loo nkitanapat nemeing'or ing'ok enye.
- Keshal oltung'ani nemeidim sii aitajeuo kewan o metabaiki ilkipaareta lelo otaaniki Yesu, lelo ootoning'o ororei lenye, nedol sii inkitoduat enking'asia. Ore lelo tung'ana naa keshali neurisho metaa meidim aitasho tenebo ninye.
- Nenyoraa Yesu aimaa enamion pooki tenkaraki ing'ok oo ltung'ana.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Kakua temat inotore iyie tiatua enkishui ino? Kaji eiko ena atini tenikinteng'en iyie anaa enigira aimaa atua ingolikinot?
- Ekinteenikiaki ai kata too mbaa nemesipa otodua ajo meata oltung'ani oti tenebo iyie? Kaji eiko pee kintagol iyie enkitanyaanyukoto e Yesu?
- Amaa itadamua iyie ai kata oleng' enaikuna Enkai pee kintajeu iyie? Tadamu engoloto enjeunoto ino? Amaa kaji inko pee iany ina jeunoto? Imbelekenyakine ninye eimu enkirukoto tiatua Enkerai enye?

39. ETASHOKI YESU TE SALABA

Luka. 23:26-56; Yohanna 19:16b-42; Matayo 27:27-61; Marko 15:16-47

Ore isikarini o Roma naa etara Yesu oleng' nepik sii olmarisian loo ilkiku elukunya enye pee esurdaany ninye. Newo osarge te nkomon o ti oriong'. Ore pee eidipa Pilato aishoo isikarini metoriko Yesu metashei, nearaki Yesu anap Osalaba lenye te inkoitoi e Yerusalem. Ore pee enauru oleng' pee meitoki aidim atanapa, nearaki likae tung'ani anap. Nepuo auluo mpaka endoinyo nataaniki Yerusalem.

Ore pee ebaiki ele doinyo, neshe ninche Yesu tenebo ilapurrok oare. Nepik isikarini ilkeek aare te nkop aikonji anaa esalaba nepik Yesu te dukuya ninche. Neen naa neudo sii inkaik o inkejek enye to lkeek too Imushumari. Neilepie msalaba shumata nepik te nkumoto meitashie. Neton isikarini te nkop neorikino inkilani lenyena, neoshie enkukuo pee etum oloya.

Ketii iltung'ana kumok aing'orita kuna baa. Netii inkituak naatusujutua Yesu. Netii sii ilapolosak o ilaiteng'etak oo inkitanapat. Negira aikordodisho nejo, "Eitajeuo ilkulikae nemeidim aitajeu kewan.

Nemor sii olapurroni obo Yesu kake etejo olikae, "Tigirayu amu ore iyiook kitaasa intorrok. Eishiakino pee kiye, kake eitu eas ele tung'ani entoki torrano." Neliki sii ninye Yesu, "Tadamuoki tinijing' enkitoria ino." Newaliki Yesu, "Esipa aajoki iyie, ata taata, ijing' Paradiso te nebo nanu."

Neaku saa ile enaipirie enkolong', nerip enaimin enkop pooki o metabaiki saa naaudo, neimis ewang'an e nkolong'. Ore Yesu, nebuaku to ltoilo sapuk, nejo, "Papa, inkaik inono apik enkiyang'et ai!" Nejo sii, "Eidipe! Ore pee ejo neijia nedung'o tau. Ore ena kata, neiperra nabo kata olkarasha le nkaji e Nkai aaku are, aiteru te shumata o metabaiki abori, neikirikira enkop nedanya ndapidapo. Ore ilo kitok loo sikarini oorripito Yesu o lelo ootii te nebo ninye, pee edol eikirikire enkop o kulie baa naatotiwuo, neureishoyu oleng' ejo, "Esipa Enkerai e Nkai ele tung'ani."

Ore too lkuaak lo Lyahudi, meing'uari seseni te shumata o salaba te nkolong' e sabato. Neomon Pilato metigili ninche inkejek neiwuang'ieki aaya. Neaku eetuo isikarini apa negil inkejek o ilapurrok pee esioki aaye. Kake ore pee epuonu enetii Yesu, nedol aajo eidipa atua, neitu egil inkejek enyena. Kake etaremo osikari obo ematua te remet, nepuku osarge o enkare.

Ore te siadi nena, neisho oloiteng'eni le Yesu olmeneng'ani lenye nepik atua enkurare ng'ujuk neton eitu ae kata eirragieki likae. Neiken to soito sapuk. Ore tenkaraki Sabato enkolong' nasuja, neirragie Yesu te ine.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Tia oitoi kiret iyie enkishui ino tenidamu arashu ining'u inchere etua Yesu to salaba te nkaraki iyie?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBQ: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Neimisimisu oloing'ang'e tempolos endama, neikirikira enkop, nepolosa olkarasha lo lng'obor.
- **Kaji eiko teneitodolu ena atini nchere keyiolo Enkai (Yesu) pooki toki?**
 - Eibalunye Yesu keeye enye o ingolikinot enyena too nkatitin kumok.
 - Neiyiolou ajo kejing' ilapurok tenebo ninye Paradiso.
 - Nelimu iloibonok nchere ore Olaitajeunoni nemeata entioto arashu ing'ok, keikenakini atua ilaing'okok, keremi ninye tenkaraki ing'ok ang', nemeng'or kewan, neikoroji, neisilisili, neoshoki olkila lenye inkukuo.
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
 - Ore Yesu naa olasar bayaroti lemeata entioto arashu ing'ok, olasar oidim aiboi engoro e Nkai.
 - Anaa olkuo le kerr le Pasaka, nemegili iloik lenyena. Ore ninye naa olmonokie osipa too lasari pooki lo Lning'o Musana. Ore lelo asari nelimu aautu Yesu.
 - Nejo Yesu, "Eidipe!" Neidip Yesu etaa ninye olasar oyieunoyu pee eidip engoro enye neidimie pee eisho enyorrata ilaing'okok.
 - Nepolosa olkarasha le Nkaji Enkai. Neaku ore ewueji sinyati oo sinyat naa kebaikinoyu taata eimu Kristo tiatua keeya enye.
- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neuro o ltungana)**
 - Etonyorayie Yesu inkisilililot pooki teng'iriatu pee eitajeu iyiook ilaing'okok. Nenotakini ninye, neikoroji, neari ninye, neitanapi osalaba, neoshokini ilmushumaani neilili ninye to salaba nedung'o tau tenkaraki iyiook.
 - Etonyorra Enkai enkop neishoru Enkerai enye nabo paa ore pooki ng'ai oiruk neimeimin kake netum enkishui nemeish.
 - Nepolosa olkarasha le Nkaji e Nkai katitin aare. Neaku kebaiki ilaing'okok ine Wueji Sinyati oo Sinyat ine netii entii Enkai.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - Ore apa Yesu naa Olkuo le Kerr le Nkai oya ing'ok e nkop.
 - Olkuo le Kerr lemeata entioto nemeata eng'oki. Neitu egili iloik lenyena.
 - Eitabayie Yesu esiai e Nkaji e Nkai. Nepolosa olkarasha le Nkaji e Nkai katitin aare. Neaku kebaiki ilaing'okok ine Wueji Sinyati oo Sinyat ine netii entii Enkai. Eitabayie Yesu ilasari pooki!
 - Eitabaya Yesu intarasi ilasari pooki loo sarge lo Lnging'o Musani. Neutu ilasari pooki te dukuya Yesu Kristo o lasar lenye te msalaba.
 - Eitabaya enkisiligata oo loibonok. Te nkitanyaanyukoto:
 - Neremi ninye tenkaraki ing'ok ang' (Isaya 53:4-6)
 - Neari nenotakini. (isaya 50:6)
 - Etashoki tenebo ilaing'okok (Isaya 53:12)
 - Neremi inkaik o inkejek (Olkerempe le Nkai 22:16, Sakaria 2:10)
 - Neikoroji ninye. (Olkerempe le Nkai 22:6-8)
 - Neosh inkukuo tenkaraki olkila lenye. (Olkerempe le Nkai 22:18)
 - Eitabaya enkisiligata e Nkai tiatua Olchamba le Eden nchere kerriu Enkai Olaitajeunoni.

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- Ore oltung'ani naa olaing'okoni. Neata iltauja oogol negolong'aki Enkai. Neibaa Ilyahudi Yesu.

- o Lasima neiruk iltung'ana enetaasa Yesu te msalaba pee eitejeuo.
- o Lasima nisudori te siadi osarge lo lkuo le kerr mikintajeuo anaa iltung'ana le Israeli apa te Pasaka.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Eidipe! Etaasa Yesu pooki toki nayieuni pee kitum enjeunoto aing'uaa ing'ok o keeya. Egira kimpot pee irridu nirruk. Indim atajeuo taata?
- Tenikintajeu nintukuo too ng'ok, amaa kaji eikunono enkishui ino? Ekiret pee kitum emboron niret ilkulikai aaiyiolou Olaitajeunoni?

40. EMPIUNOTO E YESU

Matayo 28:1-15, Marko 16:1-8, Luka 24:1-12, Yohana 20:1-18

Etunukayioki Yesu eton eitu edoyioroto enkolong' Ijumaa, nepik Pilato isikarini oong'uan te nkurare. Neyeng'iyeng'a inkituak naairiamunore Yesu eing'uaa Galilaya enkolong' nasuja tenkaraki Sabato. Ore te nkolong' e uni, arashu te enkolong' e dukuya e wiki, enasirie, nepuo enkurare meitobira osesen le Yesu. Ore pee epuo enkurare nejokino maate, "Ae ng'ae ade oret iyiook aibeleleng'oo osoit te nkutuk e nkurare?" Ore ina kata nejing' enkikirikirata kitok enkop, amu etadowuo olmalaika lo Laitoriani oing'uaa shumata, nelotu neibeleleng'oo osoit netonie enchumata. Neikirikira ilarripok te nkaraki ninye, netiu anaa ilootuata.

Nejoki ilo malaika inkituak, "Emiureishoyu intae; amu ayiolo ajo Yesu ing'oruru otashoki. Metii ene amu etopiwuo anaa enatejo ninye. Wootu eng'urai ewueji neirragieki. Naa enchom entasiooi entoliki ilooiteng'eni lenyena entiaaki, "Etopiwuo aing'uaa lootuata; neituruko alo Galilaya, naa te ine idolidolo." Nepuo nabo kata aing'uaa enkurare te nkuretisho o te ng'ida sapuk, nekuet aaliki ilooiteng'eni.

Ore pee ebaiki inkituak ilooiteng'eni lenye, neliki pooki tooki nataase. Kake eitu eiruk ilkumok. Kake nekuet Petero o Yohana enkurare. Ore pee ebaiki Petero enkurare nejing' nedol ilkarash le kitani eirrag oopeny, nerrinyo alo ang eing'asia te nena naatotiwuo.

Ore pee eshuko enetii ilkulikae looiteng'eni neliki imbaa naatodua. Neing'asia ilkulikae sii tenkaraki etopiwuo Yesu. Ore pee elusoo erishata dorop neipang'aki Yesu ninche ewueji neisudori maate neitashe ti atua ninche. Neing'asia, neiruk sii! Kake metii oloiteng'eni oji Tomas. Ore pee eliki ninye ajo eipang'anki Yesu nemeiruk, nejo, "Te neitu adol nanu inkiporo oo lmushumaani too nkaik enyena napik olkimojino lai ine wueji oo lmushumaani napik enkaina ai ematua enye, mairuk nanu katukul!

Ore etulusoitie inkolong'i isiet neitoki aatii lelo ooiteng'eni atua aji, netii Tomas te nebo ninche. Nelotu Yesu eikeno nkutukie e ina aji, neitashe te mpolos nejo, "Entaseriana." Neitoki ajoki Tomas, "Tipika olkimojino lino ene, ing'ura inkaik aainei, nipik enkaina ino ene mbung'a ematua ai nimiaku olemeeta enkirukoto kake iruko." Newaliki Tomas ajoki, "Olaitoriani lai naa Enkai ai!" Nejoki Yesu ninye, "Iruko iyie te nkaraki nikitoduaa nanu? Emayiani lelo leitu edol neiruko."

ENKIPANGATA E NKISOMA

ENE DUKUYA: Inkilikwana ena kilikuanata eton eitu iliki enkatini

- Kainyioo pee tipat empiunoto e Yesu too lootuata?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBQ: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- Kaji eiko teneitodolu ena atini nchere keata Enkai enkidimata sapuk? (engolon, enkitoria)

- o Nepiu Yesu te nkeeya! Neata engolon te enkitobirata enye. Neiture isikarini
- **Kaji eiko teneitodolu ena atini nchere keyiolo Enkai (Yesu) pooki toki?**
 - o Etejo keye neitoki apiu too knolong'i uni. Neas neijia.
 - o Neiyiolo iltauja loo lkipareta. Neiyiolo aitagolo ninche.
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaajo)**
 - o Nejo Yesu inkatitin kumok ajo eitoki epiu te kneeya. Neas.
 - o Eitabaya enkisiligata e Nkai tiatua Olchamba le Eden nchere kerriu Enkai Olaitajeunoni te ishoi e nkitok. Nemir Shetani o keeya. Neas enetejo!

KAINYIOO KINTENG'ENA ENA ATINI NAIPARTA OSOTUA OLTUNG'ANI O ENKAI? (ENJEUNOTO)

- o Nepiu Enkai Enkerai enye te nkeeya pee eitoki atum enaboisho o Enkai.
- o Te mpeunoto e Yesu, neisho Enkai oltung'ani enkoitoi e jeunoto. Enkai ake naidim atopiuo Yesu.
- o Neiruk intomonok olmalaika. Etajeuo oltung'ani eimu enkirukoto tiatua Olaitajeunoni.
- o Teneitu epiu Enkai Yesu, meidim atalaa esile nikiata too ng'ok ang'.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Etaasa Enkai nena baa pooki tenkaraki iyie! Neishorua Enkerai enye nabo metasheiki pee elak esile oo ng'ok inono. Neitoki apiu Yesu pee emir enkeeya. Amaa, mindim airuko ninye?
- Teneata Enkai enkidimata pee epiu Yesu te nkeeya, keata enkidimata pee kiret too nyamalaritin inono. Kaji indo pee irridu too ng'ok o lng'ash lino nipik osiligi tiatua ninye taata?
- Ore tenkaraki empeunoto e Yesu kiyiolou ago kiata enkishui nemeish. Amaa kaji inko kintagolo ina baa enkoitoi e nkishui ino o inkiaasin inono o enkirukoto ino? Indim aisilig Enkai?

41. ELOTOTO E EMMAUS

Luka 24:13-43, Marko 16:9-14, Yohanna 20:11-31, Matahyo 28:9-10, 1 Cor. 15:5

Ore te ina onlong' ake, juma pili, epuo aare lenye enkanj' naji Emmaus, naa kilomita naapishana ing'uaa Yerusalem, neimaki pokira aare nena baa naatotiwuo. Ore einosaa lomomone neinepu Yesu openy airiamariyie ninche. Neikeno inkonyek enye pee meyiou.

Nejoki Yesu ninche, "Kakua omon kulo liimakiki ipuopuo pokira aare?" Neitashe neisinanu. Ore obo lenye newaliki ajoki ninye, "Keiyie doi ake olomoni te Yersusalem lemeyiolo kuna baa naatotiwuo te ine te kuna onlong' i?"

Nejoki, "Akua baa?"

"Nejoki ninche ninye, "Mbaa e Yesu le Nasaret, ora apa oloiboni le Nkai ogol, kake eitarasaa ilapolosak lang' kituaak o laitoriak metudung'okini enkiguana metari metua, neshei ninye. Kake kisilig apa iyiook aajo ninye olaku Siraeli.

Ee pae naa ore etii nena pooki, enkolong' e uni duoo taata anaa netiu nena baa. Ore sii, etayookito inkituaak tiatua iloitent'ena lenye enkurare duoo enasirie neitu einepu ilo sesen; neshukunye aajoki iyiook eji etoduaa ilmalaika, ootiaakita keishu. Nepuo sii kulikae lang' enkurare, nepuo ainepu etiu ake anaa ina natolimutuo nkituaak; kake ninye ake eitu edol."

Nejoki ninye ninche, "Lo tung'ana moda, nirara yietuti ltauja mirukuruku nena pooki naatejo loibonok le Nkai! Keeta apa kata nemeitamei Kristo aaiko neijia pee ejing' enkitoo enye?" Neiteru too mbukui e Musa o too loibonok pooki, neibalakinye ninche ilkigerot oopirta Olaitajeunoni O Siligi.

Ometaa nenyikaki ina ang' apa napuo. Neiko ninye anaa keyieu negiroo. Kake neibok ninche ninye, aajoki, "Irraga iyiook amu emuto netaa kewarie." Nejing' taa aton te nebo ninche.

Ore enya endaa te nebo ninche, nedumu emukate nemayian, negil, neisho ninche. Nebolo inkonyek enye neyiou ninye; neimisilori ina kata ake neitu eitoki nkonyek enye aadol. Nejokino, "Keitu eyupuyup ltauja lang' eirorie iyiook te nkoitoi, eboloki iyiook, ilkigerot?"

Neinyototo ake te ina saa nerrinyo Yerusalem; neinepu lelo tomon o obo o lelo oobotare, ootiaakita, "Etopiwuo taa ninye Olaitoriani neipang'aka Simon!"

Neliki taa ninche nena baa naatotiwuo te nkoitoi, e eneikuna pee eitayiolu kewan ninche ebelaki emukate.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Ketii erishata tiatua enkishui ino nemegira imbaa aitobirari anaa eniyieu iyie? Tia oitoo kitaretuo iyie Enkai tialo nena baa nigira aimaa arashu niimayie?

ENKATINI: Toliki enkatini ningiligili tenebo anaa olturrur pee eyiolu pooki ng'ae

INKIKILIKUANAT NAIMAKINI TENEBU: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPIRTA YESU? Kaji kinko pee kidol aajo ore Yesu naa Enkai?

- **Kaji eiko teneitodolu ena atini nchere keata Yesu enkidimata sapuk?** (engolon, enkitoria)
 - Neata Yesu engolon pee eipang'u o pee elo erishata nayieu.
 - Neata engolon pee eibelenky iltauja loo ltung'ana.
- **Kaji eiko teneitodolu ena atini nchere keyiolo Enkai (Yesu) pooki toki?**
 - Neyiolo Yesu indamunot oo lkipaareta, neyiolo sii Ororei le Nkai.
- **Kaji eiko teneitodolu ena atini nchere keata Enkai (Yesu) empiris? (enyorrata, neata olong'ur too laing'okok, esupatisho, neuro o ltungana)**
 - Neirorie iltung'ana oare te ng'iriata neibalunye enkipirta o rorei le Nkai.
 - Neitodol ajo ore Ororei le Nkai pooki eitodol empiris e Nkai
- **Kaji eiko ena atini teneutaki iyiook inchere KEISILIGAYU Enkai? (meibelekenya, keibung inkisiligat enyena, keas sii inaja)**
 - Neitodol nchere ore Ororei le Nkai pooki naa kegira autaki Olaitajeunoni Osiligi, naa Yesu mwenyewe nchere lasima neye Kristo tenkaraki ing'ok oo ltung'ana.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Kegira mwanadamu aing'oru empukunoto o Laitajeunoni oje. Megira adamu ing'ok enye kake kegira adamu elakunoto e losho lenye. Ore oltung'ani naa modooni te ng'ok enye.
- Meidim atayiolo oltung'ani Enkai meteleku teneibalunye Enkai eimu ororei lenye.
- Meidimayu nikitum enjeunoto teneitu eimu Kristo enkisilisiloto anaa enetejo Ororei le Nkai.
- Neisho Yesu kulo tung'ana oare enkirukoto teneirorie enaikunono Ororei le Nkai. Meidim atayiolo Enkai tenemeata enkirukoto.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Amaa, keidimayu kulie katitin pee miata osiligi tiatua enkishui ino? Amaa kaji eiko ina atini pee kintagol iyie?
- Amaa tenidamu Enkai, idol ninye kama Papai oata eng'iriata oyieu nikining' o nikiolou? Amaa indim aigarakino Enkiyang'et sinyati pee imbung'a ororei le Naki aitobiraki?

42. KEIPANG'AKI YESU ILAITENG'ENAK LENYE, ENKILEPATA E YESU

Luka 24:36-53

Ore ejoito iloiteng'eni le Yesu imbaa o ilalashera oing'uaa Emmaus, neitashe Yesu makewan ti atua ninche, nejoki, "Entaseriana!" Kake eirriang'a ninche, neureishoyu, ejo koloip etoduaa. Nejoki Yesu ninche, "Ainyoo pee inyamalala? Naa kaji etiu pee etii olng'ash iltauja linyi? Eng'ora nkaik aainei o nkejek nchere kewan ai nanu ele; embung'aki pee idolidolo; amu meeta enkiyang'et nkiri o loik anaa kulo lidolitata aata." Ore pee ejoki neijia, netoidol nkaik enyena o nkejek. Ore eton ake meiruk te nkaraki eng'ida e nking'asia nejoki ninche, "Iatata tene toki nanyae?" Neisho embelati o sinkirri oyiera, nedumu nanya te dukuya ninche.

Nejoki ninche, "Ilapa rorei laainei kulo latiaaka intae, eton atii te nebo intae, inchere ore mbaa pooki naatisiraki aaipirta nanu too nkitanapat e Musa o too loibonok le Nkai o to Lkerempe le Nkai, meeta nchere meitabari. Nebol iltauja lenye metayiolo ilkigerot, nejoki ninche, "Etisiraki aajo, keitamei Kristo naa ore te nkolong' e uni nepiu aing'uaa lootuata, naa te nkarna enye elikiori enkirridunoto o empalakinoto oo ng'ok loo loreren pooki, neiteruni te Yerusalem. Irara intae shakeni le kuna baa. Naa ng'ura, kairriwaki intae ilo otejo Papa keisho intae; kake entotoni te na anasa, o meishopokini intae engolon naing'uaa shumata."

Neitoki arik o metabaiki Betania, neilepie nkaik enyena nemayian. Ore emayianita ninye ninche, neilep aing'uaa ninche. Nerrinyo ninche aapuo Yerusalem te ng'ida sapuk, netii anaa ake enkaji e Nkai eisisita Enkai.

ENKIPANGATA E NKISOMA

ENE DUKUYA: Inkilikuana ena kilikuanata eton eitu iliki enkatini

- Kainyioo tipatisho pee kias kipaaretisho arashu aita ilkulikae ilkipaareta le Yesu?

ENKATINI: Toliki enkatini ningiligili tenebo anaa olturrur pee eyiolo pooki ng'ae

INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini

KAINYIOO KINTENG'ENA ENA ATINI NAIPARTA ENKAI?

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
 - Neipang'aki ilkipaareta lenye tiatua olgilata oikeno. Etopiuo aing'uaa enkeeya to sesen lenye. Neitodol ina ina kata.
 - Neipang'aki iltung'ana kumok eidipa atopiuo.
 - Neibelekeny iltauja loo ilkipaareta lenya. Netum ninche enchapai sapuk.
- **Kaji eiko teneitodolu ena atini nchere keyiolo Enkai (Yesu) pooki toki?**
 - Neyiolo Yesu ilng'ashi lenye neiyiolo sii aitagolo ninche. Neyiolo ajo ore Enkiyang'et Sinyati naa aidim aishoo ninche engolon.
 - Neyiolo sii ajo lasim neing'uaa ninche. Neyiolo sii kaa naasayu too nkolong'i naapuonu.
 - Neyiolo Ororei le Nkai oleng' neidim aishoo eutaroto enaikununo pooki tooki nataase.
 - Neiyilo sii ajo keisho Enkiyang'et sinyati ilkipaareta engolon pee eaku ilshakenini lenyena.

- **Kaji eiko teneitodolu ena atini nchere keata Enkai (Yesu) empiris? (enyorrata, neata olng'ur too laing'okok, esupatisho, neiro o ltungana)**
 - Neing'aki ilkipaareta oshal oturia ooata ilng'ashi kumok pee eitagol ninche. Keng'iri ninye oleng'neliki pooki tooki temboron pee etum eseriani.
 - Nemayian ilkipaareta lenye eton eitu elo keper.

KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)

- Ata hoo ilkipaareta, iltung'ana otobiko oleng' o Yesu, neshal oleng' neata sii apa ilng'ashi kumok. Nemeidim aitaaju ate. Neiyieu Yesu aitagol ate.
- Ore eidipa Yesu aipang'aki ilkipaareta neitagol ninche, neata ninche enchipai sapuk neaku tayari aisiaia Ninye.
- Keidimayu enjeunoto tenkaraki enkeeya o mpiunoto e Yesu ake. Metii ai oitoi.
- Neasishore Enkai iloiteng'eni lenye anaa ilshakenini lenye pee elikoo iloshon enaikunono enkirridunoto o empalakinoo oo ng'ok.

INKIKILIKUANAT NIKIASISHORE TE NKIBELEKENYATA E NKISHUI: (Tegelu enkikilikuanata nabo arashu aare niindim aiteng'enayu.)

- Amaa kulie katitin keidimany teniata ilng'ash anaa apa ilkipaareta le Yesu? Keidimayu teniata olng'ash enaikunono enyorrata Enkai te iyie arashu engolon ake tiatua enkishui ino? Amaa ina tinin, keidim kintagolo pee isiaia Enkai?
- Amaa, inoto ai kata enkirridunoto o empalakinoto e Kristo tiatua enkishui ino? Itaa tayari pee iaku olshakeni lenye pooki wueji kipikie Enkai iyie? Amaa igira alikoo ilchoretta linono enaikunono enyorrata Enkai tiatua Yesu?

INKIKILIKUANAT E MBOLUNOTO au ENING'UNOTO
tenkaraki INKITENG'ENARE oo LAIRUKOK NG'EJUKO

ENKAI

1. **Kaji eiko ena atini teneutaki iyiook inchere keata Enkai engolon pooki?** (keata enkitoria pooki, netii shumata pooki, neata enkitoo pooki.)
2. **Kaji eiko teneitodolu ena atini nchere KEYIOLO Enkai pooki toki?** (netii pooki wueji)
3. **Kaji eiko teneitodolu ena atini nchere eisinyati Enkai?** (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)
4. **Kaji eiko ena atini teneiteng'en iyiook inchere keata Enkai empiris?**(kenyorriso, keata oing'urr tialo ilaing'okok, nenana oshoke, neton ake eirorie oltung'ani)
5. **Kaji eiko ena atini teneutaki iyiook inchere KEISILIGAYU Enkai?** (meibeleyenya, keibung inkisiligat enyena, keas sii inaajo)

OLTUNG'ANI

1. **Tia oitoo eitodolu ena atini inchere keata oltung'ani tipat te Nkai?**
2. **Tia oitoo eitodolu ena atini inchere, ore oltung'ani naa olaing'okoni nenare enkitamioto e Nkai tenkaraki ing'ok enyena?**
3. **Tia oitoo eitodol iyiook ena atini inchere keyieu oltung'ani Enkai, nemeidim oitajeu kewan?**

OSOTUA lo LTUNG'ANI o ENKAI au ENJEUNOTO (eneiko oltung'ani tenelotu eneti Enkai? au eneiko Enkai pee eitajeu ilaing'onkok.)

1. **Tia oitoo kidol tena atini inchere keidim ake oltung'ani ayeu enetii Enkai te nkoitoo e Nkai?** (anaa ake anayieu, neterretena Enkai?)
2. **Kaji eiko ena atini teneitodol iyiook inchere pee eata oltung'ani enkirukoto, neirridu pee etumoki aitishipa Enkai, neitajeuni taa?**

ENKOITO NALELEK OLENG' pee IMBUNG'A KUNA kilikuanat:

Tadamu kulo rorei imiet tialo ENKAI!!! -

1. **ENGOLON**
2. **EYIOLOUNOTO**
3. **ESINYATISHO**
4. **EMPIRIS**
5. **ENKISILIGATA**

Toponai irorei aare: OLTUNG'ANI, ENJEUNOTO

Ore kuna kilikuanat naa ewueji sidai pee interu aisoma inkatinin pooki e Biblia! Ore pee ilo dukuya aasishore ninche, indim ategelu INKIKILIKUANAT sidain te nkatini naje. Tadamu ajo keikash tenetum ilooiteng'eni maate isipat tiatua inkatinin pee easishore te nkishui enye.